

Apokarip

Juãw kot Jejus nhỹ hã mẽmoj kukamã harẽnh

Juãw na pre mẽ pamã kagàja nhĩpêx. Juãw Paxis kêt axtem Jejus nhỹ hã hkrajê jahkre ho mẽ pa xwỳnhjê hô pê Juãw na pre hipêx. Na pre Jejus ã mẽ kãm hkurê xwỳnhjaja unê nê ma gô hipôk pê Patos wỳr kumê nhũm kêp prês nê gô hipôk kãm pa ho pa nê aa kurũm kator kêt rãhã ty.

Jakamã kormã htír ri nhũm Tĩrtũm kapêr o wrỳk xwỳnhjê hô gô hipôkja wỳr wrỳ nê kãm mẽmoj kukamã awjarê nhũm kuma nê hkôt mẽmoj pumu. Te hpimtir kãm mẽmoj pumunh pyrãk. Hãmri nê omu nê kuma nê amnhĩ xô ri mẽ pamã hã kagà. Na pre mẽmoj to axkrunêpxi nê hã kagà. Mẽ kot Jejus kutã amnhĩ xunhwỳr xwỳnhjaja kot Jejus ã tanhmã kêp hkwyjê to ho pa nhũm mẽ hkwyjaja pikaprãr ã kagà. Nê Jejus kêp Pahi Maati hã kot nhỹrmã mẽ kot Tĩrtũm kutã amnhĩ xunhwỳr xwỳnh piitã ma mẽ kot amnhĩ xà htỳx kamã hamak tũm xà hwỳr mẽ rẽnh par ã kagà. Nê Tĩrtũm kot nhỹrmã hkrajê ho mex kumrêx ã nhũm mããnẽn hã kagà. Hãmri nê mẽ pamã hã kagà o:

1 1-2E kot paj mẽ amã awjarê nê hã kagà. Ixpê Juãw ixte Tĩrtũm mã tanhmã amnhĩ anhĩpêx to ho ixpa xwỳnh kot paj mẽmoj jarê nê hã kagà. Na pre Tĩrtũmja Jejus mã mẽmoj kukamã tanhmã ujarẽnh to ho ra kãm ho amnhĩrĩt pa. Kot amnhĩ xô ri mẽ pahte hkôt amnhĩ xunhwỳr xwỳnhjê mã harẽnh kaxyw. Hãmri nhũm kuma nê kot amnhĩ xô ri inhmã ujarẽnh kaxyw man ixwỳr kapêr o wrỳk xwỳnh mẽ nhũm man ixwỳr wrỳ nê ô ri inhmã mẽmoj to amnhĩrĩt pa. Âm hãmri ã inhmã mẽmoj to amnhĩrĩt anê. Tã kot paj amnhĩ xwar mẽ apê Jejus kôt ri mẽ apa xwỳnhjê mã harê nê hã kagà. Mẽ ate mar nê axkãm ajamak rom nê ri apa kaxyw. Nà ixte hã kagà mã xwỳnhja koja tanhmã amnhĩ to nê tokyx mẽ pahwỳr wrỳ. ³Jakamã kwa kêt ka mẽ aprĩ hã kagàja kamã harê nê ama nê hkôt pix mã amnhĩ nhĩpêx nê mẽ piitã mẽ kãm kamã harẽnh o ri mẽ hkôt apa. Kot kaj mẽ ã amnhĩ nhĩpêx anê nhũm Tĩrtũm ja hã mẽ ato mex ka mẽ akĩnh nê apa ho apa. Nê mẽ kot mẽ axujarẽnh mar nê hkôt amnhĩ nhĩpêx xwỳnhjaja koja Tĩrtũm ja hã mẽ omu nê mẽ ho mex nê nhũm mẽ apyrã nê hkĩnh nê pa ho pa.

Juāw kot krī pê 7 kôt Jejus kwỳjê hwỳr kagà rēnh

4E ixpê Juāw kot paj atar pika pê As kamā krī pê 7 piitā hkôt mẽ apê Jejus kwỳ hã axpên wỳr mẽ apikuprõnh xwỳnhjê hwỳr kagà nê kurê ka mẽ kamā harê nê ama.

Na pa hte mẽ ato Tirtũm wỳr rãhã ho ri ixpa. Nê mẽ ato hwỳr o:

— Pa Tirtũm. Kwa kêr ka pika pê As kamā akrajê ho mex nê mẽmoj to mẽ kutã anojarêt rãhã ho apa. Kê mẽ hamakêtkati nê àmnhĩx ri pa ho pa. Ja na inhmã hprãm. Anê.

Tirtũmja rãhã ho rãhã. Amnepêm kormã mẽmoj kêt ri nhũm pre ra rãhã ho rãhã. Nê koja nhỹrmã mẽmoj akupỹm hapêx par tã nhũm Tirtũm aa hapêx kêt kumrêx. Koja arĩ rãhã ho rãhã. Na hte kaxkwa kamã kot mẽ pahto amnhĩptãr ã hkrĩ xà kamã mẽ papytãr rãhã ho hkrĩ.

Nê Tirtũm Karô te kot Tirtũm kot mẽ pahto amnhĩptãr xà hã hkrĩ xà kapem kanê maati pixi kamã kwỳt pê 7 xãm xwỳnhhta pyrãk. Na hte Tirtũm nhĩhkô hã hkrĩ ho hkrĩ. Tã kê mẽ ato mex rãhã ho pa.

5Nê Jejusja na pre hte Tirtũm kapêr o mẽ ahkre mex o pa nê aa hkaga hkêr nê. Tã nhũm prem axtem nê kupĩ. Hãmri nhũm Tirtũm akupỹm ho htĩr. Jejus kumrêx ho htĩr nhũm htĩr o htĩr. Nê kêp pika piitã hkôt pahi piitã nhõ Pahihti. Kãm mẽ pajapê htỳx jakamã na pre mẽ panê ty nê hkamrôja te mẽ panê hpikapĩr pyrãk o amnhĩ nhĩpêx. Nê htyk o mẽ pahte amnhĩ tomnuj pãnhã amnhĩre. Jao te mẽ pahte amnhĩ tomnuj pê mẽ papytãr par pyrãk o mẽ panhĩpêx. 6Nê na pre mẽ pahpê patre nê mẽ piitã mẽ ho Hipêêxã Tirtũm wỳr o papa kaxyw mẽ paxunhwỳ. Nê kêp mẽ panhõ Pahi Maati hã kãm hprãm xà hkôt mẽ pahte kãm tanhmã amnhĩ nhĩpêx to ho papa kaxyw mẽ paxunhwỳ. Jakamã kwa kêr pu mẽ kãm mex o mex nê hihtỳx o hihtỳx ã mãn harēnh rãhã ho papa.

7Nê koja tokyx akupỹn mẽ pahwỳr kakrã kamã wrỳ pu mẽ pahpiitã wrỳk kãm omu. Nhũm mẽ kot hpĩr xwỳnhjaja tee ri amnhĩ wỳr omu. Nê pika piitã hkôt ri mẽ pa xwỳnhjaja omu nê mẽ kot amnhĩ tomnuj jakamã tee ri amnhĩ kukamã hamaxpêr o kãm ma htỳx kumrêx. Hãmri nê kãm ma xàj mur nê htetet o kuhê. Koja nhỹrmã Jejus akupỹn wrỳ nhũm mẽ amnhĩ wỳr omu nê ã amnhĩ nhĩpêx anê.

8Nê Tirtũm na hihtỳx o hihtỳx nê àhpumunh o àhpumunh. Nê aa kot mẽhõ ni rũm kator kêt. Na hte amnhĩ jarēnh o:

— Ixrãhã ixpa xwỳnh na pa. Amnepê mã kormã mẽmoj piitã hkêr ri pa pre ra ixrãhã ri ixpa ho ixpa. Nê koja nhỹrmã mẽmoj akupỹm hapêx tã pa arĩ ixrãhãã. Anê.

Juāw kot Jejus akupỹm htĩr ã omunh

9Nê ixpê Jejus kôt mẽ atõ Juāw na pa hte mẽ apyrã nê Jejus kôt amnhĩ nhĩpêx nhũm hte mẽ kãm Jejus kurê xwỳnhjaja mẽ apyrã nê hã

inhîpêx kati ho pa. Mě pahte hkôt ri amnhî nhîpêx o papa jakamã na htem hã mẽ pahtomnuj tỳx rãhã ho pa. Tã pu htem ỹ hã mẽ kutã amnhî to htỳx nê arĩ hkôt amnhî nhîpêx. Jakamã na pa pre Tirtũm kapêr o mẽ ajahkre rãhã ho ri mẽ akôt ixpa. Nê Jejus kêp mẽ panhõ Pahihti hã mẽ amã harẽ. Mỳrapê na prem hã ixpynê nê man amnê ixto tẽ nê jar gô hipôk pê Patos kãm inhmẽ pa kamã ixpê prês nê ixpa ho ixpa.

10Tã nhũm tômĩk pa Tirtũm mã amnhî jarênh o nhỹ. Hãmri nhũm Karõ tanhmã ixkrã hto pa te ixpimtir kãm mẽmoj pumunh pyrã nê amnhî katut kôt mẽhõ kapêr ma. Te kot pifti kakôr tỳx pyrãk pa kuma.

11Hãmri nhũm inhmã kapêr nê inhmã:

—Pa Juãw? E kot paj amã mẽmoj to amnhĩrit ka omu nê akwỳjê mã hã kagã. Nê hã kagã hpa hãmri nê ahpỹnhã krĩ hkwỳ hkôt mẽ kêp ixkwỳ hã axpên wỳr mẽ pikuprõnh xwỳnhjê hwỳr arẽ. Mẽ kot kamã harênh nê mar nê axkãm hamak rom nê ri pa kaxyw. Epes wỳr nê Emĩnã hwỳr nê Pekamõ hwỳr nê Xijaxir wỳr nê Satre hwỳr nê Pirate hwỳr nê Raxisej wỳr. Krĩ pê 7ja piitã hwỳr ixkapêr ã kagã nê mẽ hwỳr arẽ kê mẽ apyrã nê mẽmoj jarênhja ma. Anẽ.

12Hãmri pa ixte mẽhõja pumunh kaxyw ho ijakêx nê kanê hkwỳ pumu. Kanê kêp 7 nê piitã ôr o.

13Nê kanê nhîpôk ri mẽhõja te panhĩ pyrã nê pahi hã ê mex kãm xa. Êja hpar kôn kôt hitep nhũm xa. Nê pahi hã mẽ hinô hpre xã ho amnhî nhĩnô hpre nê xa. Hinô pre xãja ôr pix o. 14Nê hkrã hkĩ te kaxat nhĩ jaka pyrã nê hakaajre. Nê no te kuwy hpôk pyrã nê hkarỳr tỳx nê. 15Nê hpar te mẽmo kax karỳr tỳx pyrãk. Nê kapêr te gô hprôt tỳx koko pyrãk. 16Na pre upôk rũm kanhêti ho 7 nê hamỳ nê o xa. Nê hakwa rũm wapo pôm kato nê akutã wa gixre nê ajêt. Nê hkuk kamã hirã htỳx kumrêx. Te myt kot mẽ pano hã harir nhũm gêk tỳx pyrãk. ã mẽhõja kot anhỹr.

17Pa tee ri tanhmã kute hã omu nê inhmã ma htỳx kumrêx nê umaj tẽm nê hpar pê te ixtyk pyrã nê nõ. Hãmri nhũm ixtã upôk rũm ãhkraja xi nê inhmã kapêr nê inhmã:

—Kwa amã ixpuma hkêt nê. Pa na pa. Amnepê mã kormã mẽmoj kator kêt ri pa pre raa. Nê ixrãhãã. Kojã nhỹrmã mẽmoj akupỹm hapêx pa arĩ ixrãhã ixpa ho ixpa.

18—Na pa pre ty tã akupỹm ixtĩr. Nê ixtĩr o ixtĩr. Kam ixpumu. Kot paj axte ixtyk kêt nê. Ixpê mẽhtykjê hpãm jakamã papxipix na pa hte mẽ htyk ã arĩgro jarê nhũm mẽ hã ty nê ma mẽhtykjê papxã hwỳr ma pa.

19—E kêr ka ate mẽmoj pumunh xwỳnhhta pumunh tỳx nê akwỳjê mã hã kagã. Nê mẽmoj kormã kot amnhî nhîpêx kêt nhũm ate omunh mã xwỳnhhta ka inhỹ hã mẽ kãm hã kagã. Mẽ kot kamã harênh nê mar tỳx kaxyw.

20—Nê kot paj axte ixprĩ hã ate mẽmoj pumunh xwỳnhhta jarê ka inhma. Nã kanê pê 7ta te mẽ kot krĩ hkwỳ pê 7 kamã mẽ kêp ixkwỳ hã

axpën wÿr mẽ pikuprõnh xwÿnhjê pyræk. Nê inhîhkra kamã kanhêti pê 7ta te kêp inhmã mẽ kot mẽ hamãr xwÿnhjê pyræk. Anê.

Epes kamã Jejus kwÿjê hwÿr kagà

2 1Nhũm Jejus arĩ inhmã kapêr nê inhmã:
—E kêr ka krĩ pê Epes kamã ixkwÿjê jamãr xwÿnh wÿr kagà nê amê. Nê kagàja kamã mẽ kãm ixkapêr jarê nê mẽ kãm:

Pa Epes kamã ixkapêr mar kaxyw axpën wÿr apikuprõnh xwÿnhjaja. Ot pa mẽ awÿr ixpêr mẽ. Ixpê ixupôk o kanhêti ho 7 nê hamÿnh nê ho ixãm xwÿnhhta na pa. Nê ixpê ôr o kanê pê 7 nhîpôk ri ixpa xwÿnhhta na pa ã mẽ awÿr ixpêr mẽnh anê.

2Na pa hte tanhmã mẽ ate amnhĩ nhîpêx to ho apa hã mẽ apumunh mex o ixpa. Na ka htem inhmã amnhĩ nhîpêx mex nê pa ja hã mẽ apumu. Mẽ kot ixtã mẽ anhîpêx kati htã ka mẽ kutã amnhĩ to htÿx nê ixkaga hkêr nê. Nê mẽ kot amnhĩ tomnuj xwÿnhjê hkôt amnhĩ nhîpêx o ri apa hkêr nê. Nhũm ixte mẽ awÿr mẽ rênh ã amnhĩ to hêx xwÿnhjaja mẽ awÿr pan pôj ka mẽ aprĩ hã mẽ kot amnhĩ to hêx ã mẽ omu. Hãmri nê tee ri mẽ kot amnhĩ nhîpêx ã mẽ omu nê amnhĩ nê mẽ hanor kurê kumrêx. ãm hãmri na ka htem ã mẽ hipêx anê.

3Nê mẽ kãm ixkurê xwÿnhjaja kot tanhmã ixtã mẽ atomnuj tÿx to htã ka mẽ kutã amnhĩ to htÿx nê aa ixkaga hkêr nê. Nê ixkôt amnhĩ nhîpêx mex rãhã ho ri apa. ãm hãmri na ka htem ã amnhĩ nhîpêx anhÿr o ri apa.

4ãm mẽmoj pixi na ixpê omnuj. Amnepê mã kormã mẽ ate ixkôt amnhĩ xunhwÿr nyw ri na ka prem amã axpën kînh nê axpën to mex o ri apa. Nê mẽ amã axpën tã ma ho te mẽ amã amnhĩ tã ma pyræk o axpën nhîpêx. Tã tanhmã ajamaxpêr to nê axte ã axpën nhîpêx anhÿr kêr nê. Jao te mẽ amã ixkînh kêr pyræk o amnhĩ nhîpêx. Pa tee ri ja hã mẽ apumu nhũm ja inhmã mex kêr nê.

5Kwa mẽ tokyx ja hã amnhĩ pumu nê akupÿm mẽ ate ixkôt amnhĩ xunhwÿr nyw ri mẽ ate axpën nhîpêxta o akupÿm axpën nhîpêx o apa. Kot kaj mẽ anhÿr kêr kot paj te mẽ apê mẽ anhõ kanê hpÿr nê kapôt ã mẽnh pyræk o mẽ anhîpêx ka mẽ ri apa nê gaa nê apikaprãr pa. Tã mẽhõ koja mẽ amÿr pê mẽ anhõ krĩ kamã mẽ kãm ijarênh o pa?

6Nê mẽ kêp Nikoraw nhõ xwÿnhjaja na ka htem mẽ kot tanhmã amnhĩ tomnuj to hã mẽ omu nê ixpyrà nê apê ja hprãm nõkati nê mẽ hkôt ri amnhĩ nhîpêx kêr nê. Pa ja hã mẽ apumu nê ixkînh nê.

7Tã ixte mẽ amã ixkapêr jatur xà na ja. Kot kaj mẽ amã ixkapêr mar prãm hã kot kaj mẽ ã Tîrtũm mẽ wa Ixkarõ nhÿ hã ixte mẽ amã ixkapêr anhÿrja ma nê kãm ajamaxpêr tÿx rãhã ho ri apa.

Tirtũm nhõ krĩ kamã mẽmo pĩ hpàr kuhê xwỳnh. Mẽ kot ô hkur nẽ axte htyk kêt nẽ pa ho pa mã xwỳnhhta. Kot kaj mẽ ate amnhĩ tomnuj nẽ amnhĩ to htỳx nẽ arĩ inhmã hprãm xà hkôt amnhĩ nhĩpêx rãhã ty pa akupỹm mẽ ato mẽ atĩr nẽ ma pĩ hpàrta wỳr mẽ arẽ. Ka mẽ ma hwỳr mra nẽ ô hõ hta nẽ akrẽ nẽ axte atyk kêt kumrêx nẽ apa ho apa.

E ãm ja pix na hapêx. Anẽ.

— E Juãw. Kêr ka Epes kamã ixkwỳjê jamãr o pa xwỳnhhta wỳr ã ixkapêr ã kagã anẽ nẽ mẽ hwỳr amẽ. Anẽ.

Hãmri pa kuma nẽ ô ri mẽ kãm hã kagã hpa.

Emĩnã kamã Jejus kwỳjê hwỳr kagã

8Hãmri nhũm hpãnhã Emĩnã nhõ xwỳnhjê kaxyw inhmã kapêr nẽ inhmã:

— Nẽ hpãnhã Emĩnã kamã ixkwỳjê jamãr xwỳnh wỳr kagã nẽ mẽ hwỳr amẽ. Nẽ mẽ kãm ixkapêr jarẽ nẽ nẽ mẽ kãm:

Pa Emĩnã kamã ixkapêr mar kaxyw axpên wỳr mẽ apikuprõnh xwỳnhjaja. Ot pa mẽ awỳr ixpêr mẽ. Ixrahã ho ixrahã ixpa xwỳnhhta na pa. Amnepêm kormã mẽmoj piitã hkêt ri na pa pre ixrahã nẽ ri ixpa. Kojã nhỹrmã mẽmoj akupỹm hapêx pa arĩ ixrahã ho ixrahã nẽ ri ixpa. Na pa pre ty no ãm akupỹm ixtĩr o ixtĩr. Tã pa ã mẽ awỳr ixpêr mẽnh anẽ.

9Nã na pa hte mẽ ate tanhmã amnhĩ nhĩpêx to ho apa hã mẽ apumunh rãhã ho ixpa. Na hte mẽ kãm ixkurê xwỳnhjaja ixtã mẽ atomnuj to ka mẽ apê amrakati nẽ ri apa. Nom mẽ ate tãm amnhĩ nhĩpêx jakamã te mẽ apê mẽ hikukrêx rũnh kumrêx xwỳnhjê kot amnhĩ nhĩpêx pyrã nẽ ixkukwak ri akĩnh rãhã ri apa. Na hte mẽ kêp Ijaew ã amnhĩ to hêx xwỳnhjaja mẽ ato kapêr punuj rũnh o pa. Mẽ kot Tirtũm kôt amnhĩ nhĩpêx ã amnhĩ jarênh tã no ãm hkôt amnhĩ nhĩpêx kêt nẽ. ãm Satanasti kôt pix mã na htem amnhĩ nhĩpêx o pa.

10Tã mẽ kãm ixkurê xwỳnhjaja kot ixtã mẽ atomnuj tỳx o pa htã kêr ka mẽ amnhĩ tã mẽ omu nẽ tee ri amnhĩ kukamã ajamaxpêr kêt nẽ. Nẽ arĩ mẽ kutã amnhĩ to htỳx nẽ. Kojã Satanasti mẽ akwỳjê pynê nẽ mẽ ajagjê. Hãmri nẽ mẽ ate ixkaga hprãm xaj tanhmã mẽ anhĩpêx kati hto ka mẽ hãgjênh xà kamã amnhĩ xà htỳx kamã ajamak o atã arĩgro pê 10. Nom kêr ka mẽ kutã amnhĩ to htỳx nẽ ixkaga hkêt nẽ. Mẽ kot mẽ apar mã tã ka mẽ kutã amnhĩ to htỳx nẽ. Kot kaj mẽ aa ixkaga hkêt nẽ ixkôt ri amnhĩ nhĩpêx rãhã ty pa akupỹm mẽ ato mẽ atĩr nẽ ma amnhĩ wỳr mẽ ato api. Hãmri ka mẽ Tirtũm mẽ wa ixri amex nẽ atĩr tũm nẽ apa ho apa nẽ axte atyk kêt nẽ apa.

11E ixkrajaja. Kot kaj mẽ amã ixkapër mar prãm hã kot kaj mẽ ã Tirtũm mẽ wa Ixkarõ nhỹ hã ixte mẽ amã ixkapërja anhỹr ma mẽ kãm ajamaxpër tỳx rãhã ho ri apa. Kot kaj mẽ ate amnhĩ tomnuj nõ amnhĩ to htỳx nõ inhmã hprãm xà hkõt pix mã amnhĩ nhĩpêx rãhã ty. Hã kot paj akupỹm mẽ ato mẽ atĩr ka mẽ ma kuwyta wỳr apa hkêt nõ.

E. ãm ja pix. Na hapêx. Anẽ.

—E Juãw. Kêr ka Emĩnã kamã ã ixkrajê mã ixkapër ã kagà anẽ. Anẽ. Hãmri pa kuma nõ ô ri mẽ kãm hã kagà.

Pekamõ kamã Jejus kwỳjê hwỳr kagà

Sikũn Korit 6.14-7.1

12Nhũm Jejus arĩ inhmã kapër nõ hpãnhã inhmã:

—E hpãnhã Pekamõ kamã ixkrajê jamãr o pa xwỳnhja wỳr kagà nõ mẽ hwỳr amẽ. Nẽ mẽ kãm ixkapër jarẽ nõ mẽ kãm:

Pa Pekamõ kamã ixkapër mar kaxyw axpẽn wỳr mẽ apikuprõnh xwỳnhjaja. Ot pa mẽ awỳr ixpër mẽ. Ixpê ijakwa rũm põm wapo akutã wa gix nõ kator nõ ãm xwỳnhta na pa mẽ awỳr ixpër mẽ.

13Na pa hte mẽ anhõ krĩ nhõ xwỳnhjaja kot tanhmã amnhĩ tomnuj to ho pa hã mẽ omunh mex nõ. Mẽ kot Satanasti kõt pix mã ri amnhĩ nhĩpêx o pa jakamã mẽ anhõ krĩ te kêp Satanasti nhõ krĩ pyræk. ãxipas kot mẽ hkõt mẽ kãm ixkapër o mẽ ahkre ho pa mẽ aa hkaga hkêt tã nhũm prem axtem nõ ixtã kupĩ. Ka mẽ ja hã mẽ omunh tã mẽ umaj ixkaga hkêt nõ arĩ ixkõt amnhĩ nhĩpêx rãhã ho ri apa. ãm hãmri na ka htem ã amnhĩ nhĩpêx anẽ.

14Mẽmoj pixi na ixpê omnuj. Na hte mẽ akwỳjaja axtem nõ Paraãw kapër kõt amnhĩ nhĩpêx o pa. Na pre Paraãwja Parak mã tanhmã kapër to nhũm kuma nõ amnhĩ xô ri tanhmã mẽ anhĩgêt mã kapër to ho pa. Nom ixkapër kõt kêt ixkapër kuhpa hã tanhmã mẽ kãm kapër to nõ mẽ kãm: “Mẽ mãmri ma sãnti hã mẽ hkĩnh mã xwỳnhjê hkõt mra nõ sãnti hã apku nõ hã akĩnh. Nẽ mẽ uræk nõ axpẽn pẽ axpẽn prõ ho amnhĩkati nõ axpẽn pẽ ri axpẽn mjên o amnhĩkati nõ mẽ ã ri amnhĩ nhĩpêx anhỹr o ri apa. Ja mex kẽnã.” Anhỹr o mẽ anhĩgêt mã kapër o pa nhũm mẽ kuma nõ mẽ hkõt amnhĩ nhĩpêx. Tã ka mẽ akwỳjaja mẽ uræk nõ ã amnhĩ nhĩpêx anhỹr o pa. Kwa ja mex kêt.

15Na hte mẽ akwỳjaja Nikorawjê kapër kõt ixkapër kuhpa hã tanhmã amnhĩ nhĩpêx to ho pa. Ja mããnẽn mex kêt. 16Tã ra mẽ akwỳjaja ã amnhĩ tomnuj anhỹr o pa ka mẽ ja hã mẽ omu nõ ãm mẽ omu nõ nõ tanhmã mẽ kãm akapër to hkêt nõ. Kwa mẽ ate ã amnhĩ nhĩpêx anhỹr xwỳnhjaja. Kêr ka mẽ tokyx ja kaga nõ akupỹm ixkõt ri amnhĩ nhĩpêx mex nõ. Kot kaj mẽ anhỹr kêt kot

paj tokyx mẽ awÿr wrÿ nẽ te ijakwa rŭm pŏm wapo kator xwÿnhhta o mẽ hkanhwÿr pyræk o mẽ anhĩpêx. Nom ixkapêr xihtÿx pix o tanhmã mẽ anhĩpêx to.

17E kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarŏ nhÿ hã ixte mẽ amã ixkapêr anhÿrja ma nẽ kãm ajamaxpêr tÿx rãhã ho ri apa.

Nẽ kot kaj mẽ ate amnhĩ tomnuj nê amnhĩ to htÿx nẽ inhmã hprãm xà hkôt amnhĩ nhĩpêx rãhã ty. Hã kot paj akupÿm mẽ ato mẽ atĩr hãmri nẽ ra pam mẽ amã mẽ anhŏ ka mẽ hkur o apa. Te amnepêm Ijaew kapôt ã pa nhũm ixte mẽ hwÿr “manã” anhÿr xwÿnhhta rênh nhũm mẽ kot hkur o pata pyræk. Nom ixte mẽ amã mẽ anhŏja na hpimxur. ãm papxipix na pa hte mẽ kãm ōr o ixa.

Nẽ kot paj mẽ atã mẽ anhĩxi nyw rê. Jao kên jakare hkwÿ hã ahpÿnhã mẽ anhĩxi nyw jaxwÿ nẽ mẽ amã kugŏ. Ka mẽ hamÿ nẽ kapxipix amnhĩ nhĩxi nyw pumunh o apa.

E ãm ja pix. Na hapêx. Anẽ.

—E Juãw. Kêr ka Pekamŏ kamã ixkrajê hwÿr ã ixkapêr anhÿr ã kagà nẽ mẽ hwÿr amẽ. Anẽ.

Hãmri pa kuma nẽ ô ri mẽ kãm hã kagà.

Xijaxir kamã Jejus kwÿjê hwÿr kagà

Jutre 3-23

18Nhũm Jejus arĩ inhmã kapêr nẽ inhmã:

—E hpãnhã Xijaxir kamã ixkwÿjê jamãr xwÿnh wÿr kagà nẽ amẽ nẽ mẽ kãm ixkapêr jarê nẽ mẽ kãm:

Pa Xijaxir kamã ixkapêr mar kaxyw mẽ apikuprŏnh xwÿnhjaja. E ot pa mẽ awÿr ixpêr mẽ. Ixpê Tĩrtũm Kra na pa. Ixpê inhno te kot kuwy hpŏk karÿr tÿx pyræk xwÿnhhta na pa. Nẽ ixpê ixpar te kot kàx karÿr tÿx pyræk xwÿnhhta na pa mẽ awÿr ixpêr mẽ.

19Na pa hte mẽ ate amnhĩ nhĩpêx kôt mẽ apumunh mex o ri ixa. Na ka htem amnhĩ kaxyw inhmã ajamaxpêr pê inhmã amnhĩ to mex o ri apa. Mẽ akwÿ kot ixtã tanhmã mẽ anhĩpêx to htã ka mẽ umaj aa ixkaga hkêt nẽ. Nẽ arĩ amã ixkĩnh tÿx kãm tanhmã amnhĩ nhĩpêx to ho ri apa. Nẽ axpên to mex nẽ ixkôt pix mã amnhĩ nhĩpêx o ri apa. Jao ra ixkôt amnhĩ nhĩpêx mex o wam mẽ ate ixkôt amnhĩ nhĩpêxta jakre. Nà ja inhmã mex kumrêx.

20ãm mẽmoj pixi na ixpê omnuj. Mẽ akôt niti ri pa xwÿnh Jejapewtita. Kêp Tĩrtũm nhÿ hã kapêr jarênh o pa xwÿnh ã amnhĩ to hêx xwÿnhhtita. Na hte ixkapêr kupa hã tanhmã mẽ ajahkre hto ka htem ama nẽ nê tanhmã kãm nẽ hkêt nẽ. Na hte mẽ amã: “Xê mẽ mãmri ri mẽ hkuprÿjê hwÿr mra nẽ mẽ ho amnhĩkati. Nẽ axpên pê mẽ aprŏ nẽ mẽ amjên o amnhĩkati. Nẽ mẽ kot sãnti hã

mě hkĭnh nē hā apkur xwÿnhjê hkôt mra nē mẽ hkôt amnhĭ nhĭpêx. Tĭrtũm kām ja mex kēnā.” Anhÿr o mẽ amā kapêr o pa. Nē inhmā ja mex ā ijarē nom inhmā ja mex kêt. Tā ra mẽ akwÿjaja kapêr ma nē hkôt amnhĭ nhĭpêx ka mẽ ja hā mẽ omunh tā amnhĭ nē nitita janor kêt nē nhũm arĭ ri mẽ amā hêx o ri mẽ akôt pa. 21Ra kot ā amnhĭ nhĭpêx anhÿr o mẽ akôt pa ry rax kumrêx tā pa kormā ja hā tanhmā ho hkêt nē kormā amnhĭ tā hamā. Kot ā amnhĭ nhĭpêx anhÿr kaga kaxyw na pa kormā hamār o ri ixpa. No nhũm aa hkaga hkêt nē.

22Mÿrapê kot paj tokyx tanhmā ho nhũm amnhĭ xà htÿx kamā hamak o hikwÿ. Tā mẽ kot kapêr mar nē hkôt amnhĭ nhĭpêx xwÿnhjaja kot amnhĭ tomnuj ā amnhĭ pumu nē hkaga hkêt hā kot paj mā mẽ ho anē nē. Māānēn tanhmā mẽ homnuj to nhũm mẽ nitita pyrā nē amnhĭ xà htÿx kamā hamak o hikwÿ.

23Nē nitita kot paj kêp hkrajê nhĭmex pa. Ka mẽ apê ixkrajaja ja hā ixpumu nē ixte mẽ apiitā ahpÿnhā tanhmā mẽ ajamaxpêr to hkôt mẽ apumunh ā ixpumu. Nē ixte ahpÿnhā mẽ apiitā tanhmā mẽ ate amnhĭ nhĭpêx to ho apa hā mẽ apumunh xà hkôt tanhmā mẽ anhĭpêx to hā ixpumu.

24Na hte mẽ akwÿjaja akwÿjê rom nita kapêr ma nē ām kuma nē hkôt amnhĭ nhĭpêx kêt nē. Nē mẽ kapêrja mẽ kot kām: “Satanasti kapêr pimxur” anhÿr xwÿnhhta kôt nhũm mẽ amnhĭ nhĭpêx kêt nē. Na htem ixkôt pix mā amnhĭ nhĭpêx mex o ri pa. Tā ā mẽ ate ixkôt amnhĭ nhĭpêx anhÿr o apa xwÿnhjaja kot paj mẽ amā ja pix ā karō ka mẽ inhma. 25Kêr ka mẽ arĭ ixkôt pix mā amnhĭ nhĭpêx o ri apa rāhā pa akupÿn mẽ awÿr wrÿ. Ām ja pix ā kot paj mẽ amā karō.

26Nē kot kaj mẽ ate amnhĭ tomnuj nē amnhĭ to htÿx nē arĭ inhmā hprām xà hkôt amnhĭ nhĭpêx rāhā ty. Hāmri pa ja hā mẽ apumu nē nhÿrmā mẽ ate krĭ hkwȳ hkôt mẽ pa xwÿnhjê ho amnhĭptār o apa kaxyw mẽ axunhwÿ. Ka mẽ apê mẽ õ pahihtĭ nē inhmā mẽ ho amnhĭptār o ri apa.

27Na pre Inhĭpêêxà ixte pika piitā hkôt ri mẽ pa xwÿnhjê ho amnhĭptār kaxyw ixām.

Tā kot paj nhÿrmā amnhĭ pyrā nē mẽ kaxyw mẽ axunhwÿ ka mẽ inhmā mẽ hamār o apa.

Nhũm mēhō ixkapêr kwÿm ri tanhmā amnhĭ nhĭpêx to ka mẽ ja hā omu nē hā tanhmā ho. Te mẽ kot poti punuj mÿnh nē mēnh nē hkrakrak pyrāk.

28Kot paj ā mẽ ate mẽ hipêx anhÿr o apa kaxyw mẽ axunhwÿ. No ām ja pix kêt. Kot paj te ixte mẽ amā kanhêti hō nhōr pyrāk o mẽ anhĭpêx. Arĭgro hkôt kanhêti no hpōk rax japōx xwÿnhhta kot paj te ixte mẽ amā ōr pyrāk ka mẽ ixri atĭr tũm nē apa ho apa.

29E ixkrajaja. Kot kaj mẽ amã ixkapêr mar prãm hã kot kaj mẽ ã Tirtũm mẽ wa Ixkarõ nhỹ hã ixte mẽ amã ixkapêr anhỹrja ma mẽ kãm ajamaxpêr tỳx rãhã ho ri apa. Anẽ.

—E Juãw. Kêr ka ã Xijaxir kamã ixkrajê kaxyw ixkapêr ã kagà mẽ mẽ hwỳr mẽnh anẽ. Anẽ.

Hãmri pa kuma mẽ ô ri mẽ kãm hipêx mẽ mẽ hwỳr kumẽ.

Satre kamã Jejus kwỳjê hwỳr kagà

Rukre 12.35-40

3 1Nhũm Jejus arĩ inhmã kapêr mẽ inhmã:
—E hpãnhã Satre kamã ixkwỳjê jamãr xwỳnh wỳr kagà mẽ mẽ kãm ixkapêr jarẽ mẽ mẽ kãm:

Pa Satre kamã ixkrajaja. E ot pa mẽ awỳr ixpêr mẽ. Ixpê inhĩkra ho kanhêti pê 7 jamỳnh mẽ xãm xwỳnhhta na pa. Nẽ ixpê inhĩkra ho Tirtũm Karõ ãm pyxi htã te kamã kêp 7 jamỳnh mẽ ho ixãm xwỳnhhta na pa mẽ amã ixkapêr.

Na pa hte mẽ ate tanhmã ri amnhĩ nhĩpêx to hã mẽ apumunh rãhã ho ixpa. Mẽ piitã kot axpên mã mẽ ate ixkõt amnhĩ nhĩpêx ã mẽ ajarênh tã ã mẽ ate amnhĩ nhĩpêx anhỹr kêt. Na ka htem ixkuhpa hã pix mã amnhĩ nhĩpêx o apa. Jakamã te inhmã ra mẽ atyk mẽ mẽ anhĩkwỹ pyrãk.

2Na ka htem ãm akrãnh mã ixkõt ri amnhĩ nhĩpêx nom Tirtũm mẽ wa ixkõt amnhĩ nhĩpêx mex kêt mẽ. Ra Tirtũm mẽ wa ixte ja hã mẽ apumunh mex. Mẽ ate kormã wa inhnoo mã tãm ri amnhĩ nhĩpêx kêt jakamã kwa mẽ tokyx ja hã amnhĩ pumu mẽ ate amnhĩ tomnuj mã anhũre mẽ wa ixkõt amnhĩ xunhwỳr tỳx mẽ.

3Kêr ka mẽ amnepê mã kormã mẽ ate ixkõt amnhĩ nhĩpêx nyw ri mẽ kot ixkapêr o tanhmã mẽ ajahkre htoja mã ajamaxpêr mẽ amnhĩ tomnuj mã anhũre. Nẽ ixkapêr kõt pix mã mãn amnhĩ nhĩpêx o ri apa. Kot kaj mẽ anhỹr kêt kot paj nhỹrmã mẽ ajaêr pê akupỳn mẽ awỳr wrỹ mẽ ja hã tanhmã mẽ ato.

4Ãm mẽ agrêre mẽ amã ixkõt amnhĩ nhĩpêx prãm. Jao tãm ri amnhĩ nhĩpêx mẽ mẽ kot amnhĩ tomnuj xwỳnhjê hkõt amnhĩ nhĩpêx kêt mẽ. Te mẽ axê jakare kamã apa mẽ tanhmã amnhĩ pê htyk to hkêt pyrãk. Tã kot kaj mẽ nhỹrmã ixri mẽ axê jakare kamã apa ho apa. Ra mẽ ate ja ho anhỹr mã tãm kênã. Ja na Tirtũm kãm hprãm.

5Nẽ krĩ piitã hkõt mẽ ate amnhĩ tomnuj nê amnhĩ to htỳx mẽ inhmã hprãm xà hkõt amnhĩ nhĩpêx rãhã atyk xwỳnh piitã kot ka mẽ nhỹrmã Tirtũm mẽ wa ixri amex mẽ atĩr tũm mẽ apa ho apa. Ra mẽ hixija Mẽpahpãm Maati nhõ kagàja kamã na. Kamã mẽ atĩr o mẽ atĩr mã xwỳnhjê nhĩxi piitã hã kagà. Kot paj kagàta kamã aa mẽ anhĩxi grãnh kêt mẽ. Hãmri mẽ Inhĩpêexã mẽ kapêr o mẽ wrỹk

xwỳnhjê mã mẽ ajarênh o: “E mẽ jajê pumu. Ixkwỳ na mẽ.” Anhỹr o mẽ kãm mẽ ajarê.

6E ixkwỳjaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapêr anhỹrja ma nẽ kãm ajamaxpêr tỳx rãhã ho ri apa.

Tã ãm ja pix. Na hapêx. Anẽ.

—E Juãw. Kêr ka ã Satrejê mã ixkapêr ã kagà nẽ mẽ hwỳr mẽnh anẽ. Anẽ.

Hãmri pa kuma nẽ ô ri mẽ kãm hã kagà.

Pirate kamã Jejus kwỳjê hwỳr kagà

Wam Tesarõn 2.13-16

7Nhũm Jejus arĩ inhmã kapêr nẽ inhmã:

—E hpãnhã Pirate kamã ixkwỳjê jamãr xwỳnh hwỳr kagà nhĩpêx nẽ amẽ nẽ mẽ kãm ixkapêr jarê nẽ mẽ kãm kãm:

Pa Pirate kamã mẽ ate ixkapêr mar kaxyw mẽ apikuprõnh xwỳnhjaja. E ot pa mẽ awỳr ixpêr mẽ. Inhmex o inhmex xwỳnh na pa. Aa ixêx kêt nẽ ixpa xwỳnh. Amnepê mã na pre mẽhõja pahi Tawi mã õrkwỹ mex ã saf jamãr o pa. Tã pa hte uràk nẽ Inhĩpêxà Tĩrtũm nhõ krĩ hwỳr mẽ gjêx xà hã saf jamỳ nẽ ho ixpa. ãm papxipix inhõ saf jakamã papxipix na pa hte mẽ ate ixkõt amnhĩ xunhwỳr xwỳnhjaja mẽ agjêx kaxyw mẽ amã kahê xà rẽ nẽ ixkra hkêt xwỳnhjê pẽ kahê. Kot paj mẽ apê ixkrajê mã kahê xà rẽ ka mẽ hwỳr agjê. Hãmri pa mẽ atã kahê nhũm ixkra hkêt xwỳnhjaja tee ri kãm mẽ akõt gjêx prãm kaprỳ.

8Na pa hte tanhmã mẽ ate amnhĩ nhĩpêx to ho apa hã mẽ apumunh mex o ri ixpa. Mẽ agrêre htã na ka htem ixkapêr kõt amnhĩ nhĩpêx mex nẽ aa ixkaga hkêt nẽ. Jakamã kot paj te ixte mẽ amã Tĩrtũm nhõ hakwakre kahê xà mẽnh pyràk o mẽ anhĩpêx ka mẽ axãmnhĩx ajamakêtkati nẽ ma mẽ kãm Tĩrtũm kapêr o mẽ ahkre ho ri mẽ hkõt apa. Nhũm mẽ hkwỳjaja tee ri ã mẽ ate amnhĩ nhĩpêx anhỹrja nẽ mẽ amã kapêr kaprỳ ka mẽ arĩ ho mẽ ahkre ho ri mẽ hkõt apa.

9Nẽ mẽ anhõ krĩ kamã mẽ akwỳjaja na prem ra Satanasti hkõt amnhĩ xunhwỳ nẽ hêx rom mẽ amã amnhĩ to hêx nẽ mẽ amã: “E mẽ ixpê Ijaew mex jakamã kwa mẽ ixkapêr ma nẽ mẽ ixkõt amnhĩ nhĩpêx.” Anhỹr o mẽ amã karõ htã no ãm mẽ kot Satanasti hkõt amnhĩ nhĩpêx xwỳnh na mẽ. Tã kot paj nhỹrmã tanhmã mẽ homnuj to nhũm mẽ tee ri amnhĩ pumu nẽ akupỹm mẽ awỳr mra nẽ mẽ akutã hkõnkrã ho rôrõk nẽ hkrĩ nẽ mẽ amã: “Nà mẽ kajaja na ka pêr mẽ ixrom Jejus kõt amnhĩ nhĩpêx. Mãn kãm mẽ ajapêê.” Anẽ.

10Mê kot ixtã mẽ atomnuj tỳx nhũm mẽ ate amnhĩ xà htỳx kamã ajamak tâ aa mẽ umaj ixkaga hkêt nê. Nê arĩ ixte mẽ amã mẽmoj tâ karõ xà hkôt mẽ kutã amnhĩ to htỳx rãhã arĩ ixkôt ri amnhĩ nhĩpêx o apa. Jakamã mẽ kot nhỹrmã mẽ kãm ixkurê xwỳnhjaja pika piitã hkôt tanhmã mẽ homnuj tỳx to nhũm mẽ amnhĩ xà htỳx kamã ama. Tã kot paj mẽ anê mẽ omunh mex nê nhũm mẽ tanhmã mẽ ato hkêt nê ka mẽ amex nê ri apa ho apa.

11E kot paj tokyx akupỳn mẽ awỳr wrỳ nê mẽ ate ixkôt pix mã amnhĩ nhĩpêx ã mẽ ato mex rax kumrêx. Jakamã kwa mẽ mãmrĩ ã amnhĩ nhĩpêx anhỳr o inhmã hprãm xà hkôt pix mã amnhĩ nhĩpêx rãhã ty. Kot ka mẽ anhỳr kêt kot pa mẽ amã mẽmoj mex nhõr kêt nê.

12Nê kot kaj mẽ kot amnhĩ tomnuj xwỳnhjê kutã amnhĩ to htỳx nê inhmã hprãm xà hkôt pix mã amnhĩ nhĩpêx rãhã ty. Hã kot paj amnhĩ kôt mẽ ato mẽ axihtỳx nê ka mẽ aa ixkaga hkêt nê. Nê kot paj nhỹhỹnh mẽ atã mẽ inhĩxi ho axkrunêpxi nê haxwỳ. Inhĩpêxà nhĩxi nê inhĩxi nyw nê Inhĩpêxà nhõ krĩ nhĩxija kot paj nhỹhỹnh mẽ atã haxwỳ. Tĩrtũm nhõ krĩ mẽ kot kãm: “Jerujarê nyw” anhỳr xwỳnhta koja nhỹrmã tanhmã amnhĩ to nê ra kaxkwa rũm pika wỳr wrỳ.

13E ixkwỳjaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapêr anhỳrja ma nê kãm ajamaxpêr tỳx rãhã ho ri apa.

Tã ãm ja pix. Na ra hapêx. Anê.

—E Juãw. Kêr ka ã Pirate kamã ixkrajê mã ixkapêr ã kagà anê. Anê. Hãmri pa kuma nê ô ri mẽ kãm hã kagà.

Raxisej kamã Jejus kwỳjê hwỳr kagà

14Nhũm pre Jejus arĩ inhmã kapêr nê inhmã:

—E hpãnhã krĩ pê Raxisej kamã ixkrajê jamãr xwỳnh wỳr kagà nhĩpêx nê amê. Nê mẽ kãm ixkapêr jarênh o:

Pa Raxisej kamã ixkrajaja. Ot pa mẽ awỳr ixpêr mẽ. ãm hãmri ixkapêr o ixpa nê aa ixêx kêt xwỳnhta na pa. Jakamã ãm hãmri na pa hte Tĩrtũm kapêr o mẽ ajahkre o ixpa nê aa ja kaga hkêt nê. Pa na ixpê mẽmoj piitã hpàr krax.

15-16Na pa hte mẽ ate tanhmã amnhĩ nhĩpêx to ho apa hã mẽ apumunh rãhã ho ixpa. Kop apu mẽ ate ixkôt amnhĩ nhĩpêx mex ronhỹx pa ja hã mẽ apumu nê ixkĩnh nê. Nom mẽ ate ã amnhĩ nhĩpêx anhỳr kêt. No mããnên aa ixkaga hkêt nê. Na ka htem ri atỳx amnhĩ krã hkôt pix mã tanhmã amnhĩ nhĩpêx to ho apa nhũm ja ixpê omnuj nê. Kot kaj mẽ arĩ ã amnhĩ nhĩpêx anhỳr o apa pa hpãnhã amnhĩ nê mẽ akurê. Te mẽ kot gô xenh nõkati janhir nê tee hkakinh nê akupỳm hkapĩr pyræk.


17Mē ate inhmā hprām xà hkôt amnhĩ nhĩpêx ã amnhĩ jarēnh tã ã amnhĩ nhĩpêx anhỹr kêt nē. Nē ixkapēr mar tỳx nē amnhĩ kaxyw inhmā ajamaxpēr mex kêt nē.

18Kwa mē tokyx ja hã amnhĩ pumu nē akupỹm ixkôt amnhĩ xunhwỳr tỳx nē. Kêr pa ja hã mē apumu nē amnhĩ katut kôt mē ate amnhĩ tomnuj rē nē tanhmã mē akrã hto ka mē inhnoo mã tãm amnhĩ nhĩpêx mex o ri apa. Hãmri pa mē amã tanhmã amnhĩ to amnhĩrit to ka mē aprĩ hã ixte amnhĩ nhĩpêx ã ixpumunh mex nē ixkôt amnhĩ nhĩpêx mex rãhã o ri apa.

19Xà inhmã mē ajapê hkêt ã na pa ã mē amã ixkapēr anē? Nà inhmã mē apiitã mē ajapê htỳx kênã. Nom inhmã mē ajapê htã ka htem ixkôt amnhĩ nhĩpêx kêt nē. Na pa tee ri amnhĩ tã mē apumu nē ja hã tanhmã mē atomnuj tỳx to. Tokyx mē ate amnhĩ tomnuj mã anhũrer nē hpãnhã tãm amnhĩ nhĩpêx kaxyw. Jakamã kwa mē tokyx ate amnhĩ tomnuj kaga nē akupỹm amnhĩ kaxyw inhmã ajamaxpēr ho ri apa.

20Na htem hkwỳjê nhõrkwỹ hwỳr gjêx kaxyw hakwa krem kãm àkjêr o kuhê nhũm mē kuma nē mē kãm anē nhũm mē hwỳr agjê. Nē mē ixkre hkre kamã axpên mã kapēr o hkrĩ rỳ axpên mã kapēr pê mẽmoj to hkôm o hkrĩ. Ja pyrã nē ot pa mē ajamãr o ixpa. Mē ate inhmã anhỹr nhũm ixte mē akôt ixpa ho ixpa nhũm mē pahte axpên to mex o papa kaxyw.

21Kormã mē kot ixpĩr kêt ri na pa pre mē kot amnhĩ tomnuj xwỳnhjê kutã amnhĩ to htỳx o ixpa. Amnhĩ to htỳx nē ri ixpa kamã ixtyk jakamã nhũm Inhiĩpêxã akupỹm ixto ixtĩr nē akupỹm amnhĩ



Apokarip 3.20

wÿr ixto api. Hāmri nē amnhī nhīhkô hã mē ho amnhīptār ã hkrī xà kamã inhÿr pa ixkrī ho ixkrī nē ïhkô hã mē piitã mē ho amnhīptār o ixkrī. Tã kot kaj mē atô ixpyrà nē ate amnhī tomnuj nē amnhī to htÿx nē. Nē inhmã hprãm xà hkôt pix mã amnhī nhīpêx rãhã ty. Hã kot paj amnhī pyrà nē wa ixte mē ato amnhīptār ã ixkrī xàja kamã amnhī nhīhkô hã mē akrī ka mē wa inhīhkô hã wa inhmã mē ho amnhīptār o akrī.

22E ixkwÿjaja. Kot kaj mē amã ixkapêr mar prãm hã kot kaj mē ã Tirtûm mē wa Ixkarô nhÿ hã ixte mē amã ixkapêr anhÿrja ma nē kãm ajamaxpêr tÿx rãhã ho ri apa.

Tã ãm ja pix. Na hapêx. Anē.

—E Juãw. Kêr ka Raxisej kamã ixkrajê mã ixkapêr ã kagà nē mē hwÿr amē. Nē kagàja piitã krī hkwÿ kamã ahpÿnhã ixkwÿjê hwÿr arê kê mē kamã harê nē ixkapêr ma. Anē.

Nhûm pre ã Jejus inhmã kapêr anē. Pa kuma nē ô ri mē piitã mē kãm hã kagà hpa.

Tirtûm kot mē ho amnhīptār ã hkrī xà jarênh

4 1Tã pa axte mēmoj pumu nhûm kaxkwa hwÿr mē gjêx xà hã hakwakreja amnhī kahê xà mē pa omu. Hāmri nhûm axte mēhõ kapêr tÿx xwÿnhta. Te kot pifti kakôr tÿx pyràk xwÿnhta axte inhmã kapêr nē inhmã:

—E amnē ixwÿr api pa mēmoj nhÿrmã kot tanhmã amnhī nhīpêx to hkukamã amã ho amnhīrīt ka omu. Anē.

2Hāmri nhûm Tirtûm Karô tanhmã ixto nē ixto api pa kaxkwa kamã mēmoj pumunh o xa. Tirtûm kot mē ho amnhīptār ã hkrī xà maatita pa pre omu. Nhûm kamã mēhõja nhÿ. 3Kuk kamã hirã htÿx kumrêx. Te mēmo kên kamrêk karÿr jaxênh tÿx pyràk. Nē kot mē ho amnhīptār ã hkrī xà puhã màxwÿxti grãgrãreja kãm hipôk nē harir pa omunh o xa.

4Nhûm hkrī xà maati puhã mē ho amnhīptār o hkrī xà kêp 24. Kamã mē aptār tûmjaja hkrī. Mē piitã ôr o mē ahkà htu nē ê jakare nē hkrī.

5Nē Tirtûm hkrī xà maati ja rûm na katôtôk nē hkrakrak nē haxênh japà nē hikwÿ. Nē hkrī xà kapem kanê maati pixi kamã kwrÿt pê 7ja pôk rãhã ho kuhê. Kanêja te Tirtûm Karô pyràk.

6Nē hkrī xà kapem mēmo te gô rax pyràkja hkarÿr jaxênh tÿx kumrêx nē nõ. Te ho kàx karÿr jaxênh tÿx pyrà nē hkarÿÿre. Nē hkrī xà puhã mēmoj tÿr nē kuhê pê kwat kuhê. Nē ôkwa nē katut piitã hkôt no. ãm no xohtô rax kumrêx. Na pre ã mēmoj kêp kwatja no xohtô anē pa omu.



Apokarip 4.5

7Wamta te kot mry pê rêawti pyræk. Nê hkôt ja te kot môx myti pyræk. Nê hapu hã hkuk te panhĩ hkuk pyræk. No hapu hã ja te kot àanhãhti htor kaxyw hara koror pyræk.

8Nê piitã hara kêp 6. Nê ĩ piitã kamã no. Nhũm prem Tĩrtũm mã mex o mex ã grer rãhã ho kuhê nê aa pinhkrênh kêt nê. Nê kãm grer o:

Amex o amex Tĩrtũm.

Nê axihtỳx o axihtỳx.

Nê aa ate amnhĩ tomnuj kêt kumrêx.

Amnepê mã kormã mẽmoj kêt ri ka ra arãhã ri apa. Tã arĩ arãhã ri apa xwỳnh na ka. Kot kaj aa ajapêx kêt nê.

Ãm hãmri na ka hte mẽ ixto mex rãhã ho apa.

Nê amex o amex Tĩrtũm. Anê.

9-10Nhũm prem xatã mẽ ho amnhĩptàr hkrĩ xà kamã hkrĩ xwỳnhja mẽ kot kãm “Rãhã pa xwỳnh” anhỳr xwỳnhhta mã ã grer anhỳr o kuhê. Kãm mex o mex ã grer pê tanhmã kot mẽ ho mex to hã harê. Hãmri nhũm mẽ àptàr tũm pê 24jaja mããnên kutã hkõn krã ho rôrôk nê hipô hpa nê hkrĩ. Nê amnhĩ krã rũm ôr o mẽ ahkàja kwỳr nê hpar pê haxwỳ. Kêp mẽ ô Pahi Maati hã hã hpijaàm kaxyw wamtajê pyrã nê mex o mex ã harênh o hkrĩ nê kãm:

11 Ãm hãmri na pa htem amex o amex ã ajarê Tĩrtũm

Apê mẽ inhõ Pahi Maati na ka.

Nê apê mẽ inhõ Tĩrtũm na ka.

Na ka pre mẽmoj piitã ho akato. Axàhpumunh tỳx nê ajamaxpêr tỳx o mẽmoj piitã amã hprãm xà hkôt ho akator pa.

Jakamã na pa htem ã amex o amex ã ajarênh anê. Mẽ ixrom axihtỳx mex kumrêx na ka hte apa Tĩrtũm. Anê.

Mẽ pahte amnhĩ tomnuj pãnhã amnhĩrer xwỳnh jarênh


Juãw 1.29; Piripos 2.5-11

5 1Tã pa pre arĩ te kaxkwa kamã mẽmoj pumu. Mẽ ho amnhĩptàr ã hkrĩ xà maatita kamã hkrĩ xwỳnh nhĩhkra kamã kagà pa omunh o xa. Upôk rũm omu. No ãm axtem kagà kaxkep na pre. Nê akutã hã kagà nê menh ê ho ho htỳx xàja kêp 7.

2Hãmri nhũm Tĩrtũm kapêr o wrỳk xwỳnh xihtỳx xwỳnhja kapêr tỳx kãm kapêr o:

—E mẽ atõ na ate kagà mỳj pyr nê ho htỳx xà hpôt mã tãm? Anê.

3Hãmri nê tee ri mẽ piitã mẽ hkapi nom nhũm ja kaxyw mẽhõ amrakati



Apokarip 5.1-5

kumrêx. Kaxkwa kamã amrakati nê pika kamã mãânên amrakati nê pika hkrak ri amrakati. Nhÿri mêhõ kot kagà kaxkepta pyr nê hpôt nê omunh mã tãm xwÿnhja amrakati ho amrakati.

4Nhÿm tee ri mêhõ japêr nom mêhõ pumunh kêr nê. Pa tee ri ja hã omu nê ixkaprĩ htÿx nê inhmÿr o xa.

5Hãmri nhÿm pahi hõja ixpumu nê inhmã:

—Kwa amÿr kêr nê. E mêhõ mÿj pumu. Juta kanrêhã htãmnhwÿ xihtÿx xwÿnhhta. Pahi Tawi kanrêhã htãmnhwÿ te kêp mry pê rêaw xihtÿx pyrãk o hihtÿx xwÿnh mÿj pumu. Kot mē kãm hkurê xwÿnhjê kutã amnhĩ to htÿx nê mēmoj punuj piitã ho hapêx kaxyw mã xwÿnh jakamã tapxipix na kot kagãta hpyr nê ho htÿx xà hpôt par mã tãm. E ka omu. Anê.

6Hãmri pa kuma nê hwÿr rĩt nê Jejusja pumu. Kot mē pahte amnhĩ tomnuj pãnhã amnhĩrer xwÿnhhta mē ho amnhĩptãr o hkrĩ xà maati kapem xa. Mēmoj htĩr pê kwat mē àptãr tũm pê 24jê nhĩpõk ri xa. Mē kãm hkurê xwÿnhjaja kot hpĩr nhÿm ra akupÿm htĩr nê xa. Nom ra axtem nê xa. Àhpumunh tÿxja te kot pahi xàhpumunh pyrãk. Nê hpãr kêp 7. Nê no mãânên kêp 7. Noja te Tĩrtũm Karõ pyrã nê kêp pika piitã hkõt pa xwÿnh. ã Jejusja axtem nê ãm anê pa omu.

7Hãmri nhÿm mē pahto amnhĩptãr o hkrĩ xwÿnhhta wÿr tē nē ãkra kamã kêp kagã kaxkepta py.

8Hãmri nhÿm mē htĩr pê kwat mē mē àptãr tũmjaja hpar pê hkõn krã ho rôrõk nê hkrĩ hpa nê hipõ nê hkrĩ. Piitã wiorãwti jamÿ nê ôr o xijere kamã mēhkuxwa xà jamÿ nê o hkrĩ. Nhÿm Tĩrtũm krajaja Tĩrtũm mã tanhmã amnhĩ jarênh to nhÿm mē mar o hkrĩ. Te xijere kamã mēhkuxwa xà hpãr o hkrĩ pyrã nê mē kuma.

9-10Jakamã nhÿm mē hkõn krã ho hkrĩ xwÿnhjaja mē pahte amnhĩ tomnuj pãnhã amnhĩrer xwÿnhhta kutã kãm greer o hkrĩ. Mē greer nyw o kãm gre nê kãm:

Na prem apĩ ka atyk o mē piitã mē kot amnhĩ tomnuj pãnhã amnhĩrer pa.

Ahpÿnhã pika piitã hkõt mē urojê piitã hpãnhã amnhĩrer pa.

Nê ahpÿnhã ri mē kapêr xwÿnh kwÿjê piitã mē hpãnhã amnhĩrer pa. Atyk o mē kot amnhĩ tomnuj piitã hpãnhã amnhĩrer pa.

Jakamã nhÿm mē kot akõt amnhĩ xunhwÿr xwÿnhjaja kêp Tĩrtũm kra nê ri pa.

Ka ra mē panhõ Tĩrtũm mã mē kêp patre kaxyw mē unhwÿ nhÿm htem pika piitã hkõt mē ho amnhĩptãr o pa.

Tã atyk o ate pika piitã hkõt mē hpãnhã amnhĩrer jakamã kapxipix na ate kagãta pyr nê ho htÿx xà hpôt mã tãm. Anê.

11Hãmri nhÿm Tĩrtũm kapêr o mē wrÿk xwÿnhjaja nhÿhÿnh hapõj nê kuhê. Mē ohtõ rax o ohtõ rax. Ohtõ rax o mē pajamaxpêr jakrenh. Hãmri

ně Tirtūm kot mẽ ho amnhĩptàr ã hkrĩ xà maatija wỳr mra mẽ kãm hipòk pa. Nễ mẽmoj tĩr nễ kuhê xwỳnhjê mẽ mẽ àptàr tũmjê mã hipòk pa nễ mẽ pahte amnhĩ tomnuj pãnhã amnhĩrer xwỳnhhta mã kapêr.

12Kàx pê kãm kapêr nễ kãm:

 Ấm hãmri na pa htem amex o amex ã inhgrer o ixkuhê.

 Mễ ixrom axihtỳx o axihtỳx.

 Nễ mẽmoj piitã anhõõ.

 Nễ ate mẽmoj piitã hkukamã axàhpumunh par.

 Nễ amex o amex jakamã na pa htem amã amex pix ã inhgrer o ri ixpa. Anễ.

13Tã nhũm mẽmoj piitã Tirtūm mẽ Jejus wa kãm wa mex o wa mex ã harê. Pika hkôt panhĩ nễ mry nễ àk nễ mẽmoj piitã. Nễ pika hkrak ri nễ gô hkrak ri mẽmoj piitã. Nễ mẽ htykjaja. Nhũm mẽ piitã wa kãm wa mex o wa mex ã wa harê nễ wa kãm:

 E ate mẽ ixto amnhĩptàr ã akrĩ xà kamã akrĩ xwỳnh mẽ kot mẽ ixte amnhĩ tomnuj pãnhã amnhĩrer xwỳnh mẽ war amex o wa amex.

 Nễ war axihtỳx o war axihtỳx.

 Nễ war axàhpumunh o war axàhpumunh.

 Na pa htem ã war ajarênh anhỹr rãhã ixpa ho ixpa. Anễ.

14Hãmri nhũm mẽmoj tĩr pê kwatjaja mẽ kuma nễ mẽ kãm:

 — Nã ấm hãmri na ka mẽ ã wa harênh anễ.

 Wa mex o wa mex kumrêx. Anễ.

Hãmri nhũm mẽ àptàr tũmjaja Tirtūm mẽ Jejus wa hpar pê hkõn krã ho rôròk nễ hkrĩ hpa nễ haxwỳja wa kãm wa mex o wa mex ã wa harê.

Kagà ho htỳx xà pê 7 jarênh

Matêwre 24.3-14; Sikũn Tesarõn 2.3; Wam Juãw 2.18

6 1Tã pa arĩ kaxkwa kamã mẽ pahte amnhĩ tomnuj pãnhã amnhĩrer xwỳnh kot tanhmã amnhĩ nhĩpêx to hã omunh o xa. Nhũm kagà kaxkepta py nễ wam ho htỳx xà pôt. Hãmri nhũm mẽmo tĩr pê kwatjê hõja kapêr tỳx kumrêx. Te na katõtòk tỳx pyràk o mễhõj mã kapêr nễ kãm:

 — E amnễ mẽ ixwỳr tễ. Anễ.

2Hãmri nhũm kawar jakajre nhỹhỹnh hwỳr hpòx o tễ. Nhũm mễhõja õ kuxê mỳ nễ hã nhỹ nễ tễ. Hãmri nhũm nhãm mễhõja hwỳr tễ nễ kãm pahi hã mẽ ahkà htu. Hãmri nễ kãm tanhmã kapêr to nhũm kuma nễ mẽ kot kãm Tirtūm mẽ Jejus wa kurê xwỳnhjê nhĩmex par kaxyw hakêx nễ ma pika hwỳr tẽn wry.

3Hãmri nhũm mẽ pahte amnhĩ tomnuj pãnhã amnhĩrer xwỳnhja wam kagà ho htỳx xàta kôt axte ja pôt. Hãmri nhũm mẽmoj tĩr pê kwatjê hõja axtem mễhõj mã kapêr nễ kãm:

—E amnẽ mẽ ixwỳr tẽ. Anẽ.

4Hãmri nhũm kawar kamrêk mẽ hwỳr hpôx o tẽ. Nhũm mẽhõ hã nhỹ nẽ tẽ. Nhũm nhãm mẽhõja kãm wapo gõ nẽ ma pika hwỳr htẽm nẽ wrỳk kaxyw hano. Kot hwỳr wrỳk nẽ pikap mẽ pa xwỳnhjê kurê huk kaxyw. Mẽ kot axpẽn par kaxyw ma mẽ hwỳr kumẽ. Hãmri nhũm kuma nẽ wapota py nẽ hakẽx nẽ ma mẽ hwỳr tẽn wrỳ.

5Hãmri nhũm mẽ pahte amnhĩ tomnuj pãnhã amnhĩrer xwỳnhja kagà ho htỳx xà hõ pôt. Na pre ra ho axkrut nẽ hpôt tã hpãnhã axte hkôt ja pôt. Hãmri nhũm mẽmoj tĩr pẽ 4jê hõta mẽhõj mã kapër nẽ kãm:

—E amnẽ mẽ ixwỳr tẽ. Anẽ

Hãmri nhũm kawar tykre mẽ hwỳr hpôx o tẽ. Nhũm hã ỳr xwỳnhja mẽmoj to peja xà hã parãs mỳ nẽ o tẽ.



Apokarip 6.5-6

6Hãmri nhũm mẽ htĩr pẽ kwatjê rũm mẽhõja kãm kapër nẽ kãm:

—E kêr ka ma pika hwỳr mẽ hwỳr tẽn wrỳ nẽ mẽ kãm myt pyxi kamã mẽ àpẽn pãnhã mẽ kãm mẽmoj to hkryre nẽ anhõ parãsta kamã ho peja nẽ mẽ kãm õr o apa. Nom mẽ apkur xà hã orti nẽ wĩhti ka mẽ kêp tanhmã ho hkêt nẽ. Anẽ.

Hãmri nhũm kuma nẽ hakẽx nẽ ma tẽn mẽ hwỳr wrỳ.

7Tã nhũm mẽ pahte amnhĩ tomnuj pãnhã amnhĩrer xwỳnhja axte kagà ho htỳx xà hõ hpôt. Na pre ra ho axkrunẽpxi nẽ hpôt tã hpãnhã axte hkôt ja pôt. Hãmri nhũm mẽmoj tĩr pẽ kwat kot hitep xwỳnhja mẽhõj mã kãm:

—E amnẽ mẽ ixwỳr tẽ. Anẽ.

8Hãmri nhũm kawar ràrààre mẽ hwỳr hpôx o tẽ. Nhũm mẽhõ hã nhỹ nẽ tẽ. Hã ỳr xwỳnh nhĩxi na pre kêp “Mẽhtyk” anẽ. Hãmri nhũm mẽhõja kãm kapër nẽ kãm:

—E ma pika hwỳr wrỳ nẽ tanhmã mẽ ho kê mẽ ohtô nẽ tanhmã amnhĩ to nẽ axkaprà. Kê mẽ hkwỳjaja pijapu kamã axpẽn pa nẽ mẽ hkwỳjaja prãm xaj ty nẽ mẽ hkwỳjaja tanhmã à htỳx kute kamã ty. Nẽ mẽmo mry xoprêja mẽ hkwỳjê pa. E ma mẽ hwỳr wrỳ nẽ tanhmã mẽ ho ho apa. Anẽ.

Hãmri nhũm kuma nẽ hakẽx nẽ ma pika hwỳr tẽn wrỳ. Hãmri nhũm mẽ htykjê papxaja tanhmã amnhĩ to nẽ te kot hã jêt nẽ ma hkôt mõr nẽ pika hwỳr wrỳk pyræk pa pre arĩ omunh o xa.

9Hãmri nhũm mẽ pahte amnhĩ tomnuj pãnhã amnhĩrer xwỳnhja axte kagà ho htỳx xà hõ hpôt. Na pre ra ho kwat nẽ hpôt tã hpãnhã axte ja pôt. Hãmri nẽ hpôtja kôt pa ra mẽ kot Tĩrtũm mã mẽmoj nhõr xà hã mẽsti pumu. Nẽ hkrak ri mẽ hkarõjê pumu. Mẽ kot hkwỳjê hkôt ri mẽ kãm Tĩrtũm kapër jarẽnh nẽ Jejus kêp mẽ õ Pahĩhti hã harẽnh o pa nhũm

mě kot hã mẽ hpar xwỳnhjê karõja pa pre mẽ omu. Nhũm mẽ mẽsti hkrak ri amnhĩ to Tĩrtũm wỳr o hkrĩ. 10Kỳx pê kãm kapêr nê kãm:

— ãm hãmri amex o amex Pahi Maati. Aa ate mẽmoj tã tanhmã amnhĩ to axêx to hkêt kumrêx. Kwa xà kot kaj tokyx pika hkôt mẽ kot mẽ inhĩmex xwỳnhjaja tanhmã mẽ ixtã mẽ ho nà? Anê.

11Hãmri nhũm mẽhõja mẽ hwỳr tẽ nê mẽ kãm mẽ ê jakajre gõ nhũm mẽ hagjê. Hãmri nhũm mẽ kãm:

— E mẽ mamrĩ atar akôkôt o akrĩ. Kojã Tĩrtũm kormã tanhmã mẽ kot mẽ atomnuj xwỳnhjê ho hkêt nê. Kê mẽ axte mẽ apyrà nê mẽ akwỳjê nhĩmex mãn. Kojã mẽ Tĩrtũm jamaxpêr xà hkôt axte mẽ akwỳjê pa nhũm rĩ kormã mẽ ato hpimràatã tanhmã mẽ atã mẽ hipêx to. Jakamã e mẽ atar kutêp mãmri akôkôt o akrĩ. Anê.

12Hãmri nhũm mẽ pahte amnhĩ tomnuj pãnhã amnhĩrer xwỳnhhta axte kagà ho htỳx xà hõ hpôt pa omu. Na pre ra ho 5 nê hpôt tã hpãnhã hkôt axte ja pôt. Hãmri nhũm pika htertet tỳx kumrêx. Nê myyti ahtyk nê mytwrỳre te kêp mẽ hkamrô kamrêk tỳx pyrà nê ajêt.

13Nê kanhêti tanhmã amnhĩ to nê axrê nê pikap rôrôk pa. Te kôk xàpêr tỳx nê kot pàrerekre kormã ràx tã kot kãm hikranh par pyrà nê piitã rênh pa nhũm rôrôk.

14Hãmri nhũm kaxkwaja te kagà kaxkep pyrà nê amnhĩ to kaxkep o tẽ. Nê pika piitã hkôt kên prêk nê hixêt prêk maati piitã te hkrĩ xà rũm hapôx nê mrrar nê nhãm hkrĩ pyràk. Nhũm gô hipôk piitã haxwỳja te hikwỳ xà rũm hapôx nê mrrar nê nhãm hikwỳ pyràk. Pika htertet tỳx nhỹ hã ã mẽmoj amnhĩ nhĩpêx anê. 15Hãmri nhũm pika hkôt mẽ piitã tee ri mẽmoj ã amnhĩ nhĩpêx anhỹr ã omu nê kãm ma nê htertet tỳx kumrêx. Mẽ ho amnhĩptar xwỳnhjaja nê pôristi krãhtũmjaja nê mẽ kot amnhĩ to rũnh xwỳnhjaja nê mẽ hihtỳx xwỳnhjaja nê mẽ kãm mẽ àpênh xwỳnhjaja nê amnhĩ mã mẽ àpênh xwỳnhjaja. ãm piitã mẽmoj ã kot amnhĩ nhĩpêx anhỹr ã omu nê tee ri amnhĩ kukamã hamaxpêr nê kãm ma ho kãm ma. Hãmri nê hpimxur kaxyw ma kên prêk kre japêr o hprôt nê mra. 16-17Hãmri nê amnhĩ to kên prêk wỳ nê kãm:

— Kwa na ra mẽ ixto amnhĩptar ã hkrĩ xà maati kamã hkrĩ xwỳnh mẽ kot mẽ ixte amnhĩ tomnuj pãnhã amnhĩrer xwỳnhhta wa mẽ ixkamã gryk tỳx kumrêx. Ra wa kot tanhmã mẽ ixtomnuj to xà hã arĩgrota kato. Kojã wa mẽ ixtomnuj tỳx nê pa mẽ kutã hkêt nê. Kwa tokyx mẽ inhĩpy arôrôk nê wa kêp mẽ ixto amũxu. Anê.

Mẽ kot Tĩrtũm mã hkrajê kagà

Apokarip 9.4

7 1Tã pa arĩ kaxkwa kamã mẽmoj pumu. Nhũm Tĩrtũm kapêr o mẽ wrỳk xwỳnh pê kwatja piitã ahpỳnhã pika nhĩtep xà hkôt kôk jatur xà hã hamỳ nê ho kuhê. Pika piitã hkôt kôk hpinhkrênh par nê àpêr kêt

ně gô xujanâr kôt àpêr kêt kaxyw hatur xà hã hamỳ nê ho kuhê. Nê pà piitã hkôt àpêr nê tanhmã pĩ hkwỳ ho pymaj nhũm mẽ ã amnhĩ nhĩpêx anê nê nê hatur xà hã hamỳ nê ho kuhê. ²Na pre ra Tirtũm ja hã mẽ kãm karõ nê mẽ kãm:

— E kêt ka mẽ ma pika hwỳr wrỳ nê pika nê gô xujanârja tanhmã wa homnu hto. Anê.

Hãmri nhũm mẽ kuma nê hwỳr wrỳ nê kormã nê kôk ho htỳx. Hãmri nhũm Tirtũm kapêr o wrỳk xwỳnhjê hõja myt japôx xà rũm mẽ hwỳr hpôx o tẽ. Nê ìhkra kamã mẽ kot Tirtũm kra hã mẽ hixi jarênh xà hã kagata py nê o tẽ. Hãmri nê kax pê mẽ kot pika mẽ gô xujanâr homnu mã xwỳnhjê mã kapêr nê mẽ kãm:

3— Kwa taxy pa Tirtũm krajê nhõkrã kagà hpa mãn. Kêt ka mẽ omu nê mẽ tapxipixjaja tanhmã mẽ ho hkêt nê. Anê.

4-8 Hãmri nê mẽ hkagà pa. Ahpỳnhã Ijaew pigràn h xwỳnhjaja mẽ ho ohtô rax kumrêx nê tanhmã mẽ hkagà hto. Pa tanhmã mẽ kute hã mẽ harênh ma nhũm xep mẽ ohtô rax kumrêx.

Juta kamã mẽ kêp 12.000.

Nê Rupê kamã mẽ kêp 12.000.

Nê Gax kamã mẽ kêp 12.000.

Nê As kamã mẽ kêp 12.000.

Nê Natari kamã mẽ kêp 12.000.

Nê Manase kamã mẽ kêp 12.000.

Nê Simeãw kamã mẽ kêp 12.000.

Nê Rewi kamã mẽ kêp 12.000.

Nê Isaka kamã mẽ kêp 12.000.

Nê Jipurõ kamã mẽ kêp 12.000.

Nê Juje kamã mẽ kêp 12.000.

Nê Pêjamĩ kamã mẽ kêp 12.000.

Ã mẽ ohtô rax kot anhỳr. Hãmri nê mẽ piitã mẽ pikamỳr par kãm mẽ kêp 144.000. Piitã kêp Apraãw kanrêhã htãmnhwỳ na pre mẽ. Tã ã axpên kaxyw mẽ ohtô rax kumrêx kot anhỳr tã nhũm mẽ hkagà pa.

Tirtũm kra hkwỳjê jarênh

Apokarip 14.1-5

⁹Tã pa axtem mẽmoj pumu. Nhũm mẽ ohtô rax nê Tirtũm nhõ krĩ kamã kuhê. Ahpỳnhã ri pika piitã hkôt mẽ urojaja. Nê ahpỳnhã ri mẽ kapêr xwỳnhjaja nhũm prem pika piitã kurũm kot mẽ ho amnhĩptar ã hkrĩ xà maatija kamã hkrĩ xwỳnh pê Tirtũm mẽ mẽ pahte amnhĩ tomnuj pãnhã amnhĩrer xwỳnhja wa kutã kuhê. Mẽ ohtô rax kumrêx jakamã pa tee ri mẽ piitã mẽ ho kôta hpar prãm kaprỳ. Nê piitã ê jakare kamã kuhê. Nê hkĩnh nê hkĩnh xaj pô hkwỳ jamỳ nê ho àpêr o kuhê. ¹⁰Hãmri nê kỳx pêê Tirtũm mẽ Jesus wa kãm kapêr nê wa kãm:



Apokarip 7.9

Hêxta waa nê. War amex o war amex Pahi Maati.

Na ka pre Akra Jesus kukwak ri mẽ ixte amnhĩ tomnuj ã tanhmã mẽ ixto hkêt nê.

War ajamẽ mẽ ixkamã axukaprĩ rãhã ho apa xwỳnh na ka wa. Jakamã pa mẽ inhmex nê war awỳr api nê war akuri inhmex nê ijamakêtkati nê ixpa ho ixpa.

Ãm hãmri na ka hte wa mẽ ixto mex rax kumrêx o apa. War amex o war amex. Anê.

11Hãmri nhũm Tĩrtũm kapêr o mẽ wrỳk xwỳnhjaja Tĩrtũm krĩ xà mã hipôk nê hkõn krã ho rôrôk nê hkrĩ hpa. Nê mẽ àptàr tũmjê mẽ mẽ htĩr nê kuhê xwỳnhjaja mẽ ìhkô hã kãm hipôk nê wam tajê pyrãk nê hkõn krã ho rôrôk nê hkrĩ. Hãmri nê mẽ ohtô kot Tĩrtũm mẽ Jesus wa kãm kapêr ã mẽ kuma hãmri nê Tĩrtũm ã hpijaàm kaxyw hpar pê htu mỳr pê hikwỳ hpa nê kãm mex o mex ã harê nê kãm:

12“Ãm hãmri na mẽ ã ajarênh anê Tĩrtũm. Amex o amex.

Na ka hte mẽ ixto mex o apa.

Mê ixrom axàhpumunh o axàhpumunh.

Nê mẽ ixrom axihtỳx o axihtỳx.

Jakamã na ka hte mẽ ixpiitã mẽ ixto mex kumrêx rãhã ho apa.

Ã ate anhỳr rãhã o rãhã jakamã na pa htem amã amex o amex ã ajarênh rãhã ho ixpa.” Anê.

13Hãmri pa mẽ omunh o ixãm rôm nhũm mẽ àptàr tũmjê hõja ixwỳr tẽ nê mẽ ê jaka kamã mẽ hkĩnh xàj pô jamỳnh nê ho kuhê xwỳnhjê hã ixkukja nê inhmã:

—E mãn ate mẽ ê jakare kamã mẽ kuhê xwỳnh mũjjê pumunh nà? Tanhmã na prem amnhĩ nhĩpêx to nê amnê api? Xà ate mẽ omunh? Anê.

14Hãmri pa kuma nê kãm:

—Nà ixte mẽ omunh kêt. Kêt ka na ixrom ate mẽ omunh. Anê.

Hāmri nhũm inhmã mẽ harēnh o:

—Nà na pre mẽ hkwỳjaja Jejus ã mẽ homnuj tỳx kumrēx nē mẽ kupa. Tã mẽ kēp Jejus kwỳ jakamã na pre mẽ nē mẽ kot amnhĩ tomnuj o hapêx nē te amnhĩ kamrô ho mẽ nē mẽ kot amnhĩ tomnuj piitã kuhõnh par pyræk o mẽ hipêx. Jakamã nhũm mẽ ê jaka kamã mex nē hkĩnh tỳx nē pa.

15 Nē Tĩrtũm kot mẽ pahto amnhĩptàr ã hkrĩ xà maati kutã kãm mex o mex ã harēnh rãhã ho kuhê.

Na hte mẽ ho mex rãhã ho pa. Mẽ hkôt pa ho pa jakamã koja mẽmoj tanhmã kēp mẽ ho hkêt nē.

16-17 Nē mẽ pahte amnhĩ tomnuj pãnhã amnhĩrer xwỳnh kot Tĩrtũm krĩ xà maati kamã ãm xwỳnhhta na hte mẽ hamãr mex rãhã ho mẽ hkôt pa.

Te mẽ kot mẽ hkrit jamãr mex pyræk.

Nē te mẽ kot mẽ hkrit kôm o pa nhũm htĩr nē pa pyræk.

Koja mẽ kuri htĩr tũm nē hkôt pa ho pa.

Nē axte kãm prãm kêt nē.

Nē axte kãm kôr kêt nē.

Nhũm arĩgro htỳxja axte mẽ hkà ho hxêt kêt nē.

Koja Tĩrtũm te mẽ kot mẽ hkra no kagô nhĩnhĩnh par pyræk o mẽ hipêx nhũm mẽ axte hkaprĩ nē mỳr o pa hkêt nē.

Pãnhã hkĩnh nē mex rãhã kuri pa ho pa. Anẽ.


Kagà kaxkep o htỳx xà kot hitep jarēnh

8 1Tã pa arĩ kaxkwa kamã mẽmoj pumu nhũm mẽ pahte amnhĩ tomnuj pãnhã amnhĩrer xwỳnhja kagà kaxkep o htỳx xà kot hitepta pôt. Hāmri nhũm kaxkwa kamã mẽmoj piitã hpinhkrēnh pa nhũm mẽhõ kapēr kêt kumrēx. Nē hpinhkrēnh par o ra hã ahtũm ry mex nē.

2Hāmri nhũm Tĩrtũm kutã kapēr o wrỳk xwỳnh pê 7 nē mẽ kuhê xwỳnhjaja. Nhũm kapēr o wrỳk xwỳnhjê hõja mẽ hwỳr tē nē mẽ piitã mẽ kãm pifti gõ.

3-4Hāmri nhũm kapēr o wrỳk xwỳnhjê hõja ôr o xijere py nē Tĩrtũm mã mẽhkuxwa xà ho xêt xà

hã mēs kunihti hwỳr o tē. Mẽ ho amnhĩptàr ã hkrĩ xà maati kutã ôr o mēstija wỳr o tē nē kuri o xa. Hāmri nhũm mẽ kãm kamã mẽhkuxwa xà hkwỳ runh rax nē nhũm mēsti hã ho xêt o xa. Rôm nhũm Tĩrtũm krajaja Tĩrtũm mã tanhmã amnhĩ jarēnh to. Jakamã nhũm mẽhkuxwa xà xêt kũm mẽ mẽ kot Tĩrtũm mã amnhĩ jarēnh xàja mẽ nhũm ahkà nē Tĩrtũm kapēr o wrỳk xwỳnh nhĩhkra kamã xijere rũm Tĩrtũm kutã kàx mã àpir o pa.



Apokarip 8.1-2

5Hāmri nhūm kapēr o wrỳk xwỳnhja xijere kamā kuwy hpòk kwỳ ho nỳt nē ahpār mā pika hwỳr kumē nhūm ma tē nē pikap tēm nhūm pika htertet tỳx nē kamā na katõtòk nē haxēnh nē hkrakrak.

Mē kot pifti kakôr ã mē harēnh

6Hāmri nhūm Tĩrtũm kapēr o wrỳk xwỳnh pē 7 kot pifti jamỳnh xwỳnhjaja ra kot pafti kakôr mǎ.

7Jakamā nhūm wamta õ pifti kakô nhūm na mē te kot jēr krǎ jakot pyrǎk xwỳnh mē kuwy te kot mēmo kamrô kamrêk pyrǎk xwỳnhhta pikap rôròk pa. Nē nhỹhỳnh pika hkwỳ ho rax nē ho kaxàr pa. Nē pòti nē akunĩ hkwỳ ho rax kumrēx nē ho kaxàr pa. 8Hāmri nhūm wam ãm xwỳnh nhĩjuk ri ãm xwỳnhja õ pifti kakô nhūm mēmoj te kēn krǎ hprêk pòk pyrǎ nē kaxkwa rũm ahpār mā tē nē gô xujanār nhĩkjê kamā hpòk rǎhǎ tēn mrô. Hāmri nhūm gô nhĩkjê kamā gôja mēmo hkamrô hǎ amnhĩ jahkre hpa. 9Jakamā nhūm gôx kǎm mēmoj htĩr nē ri mrrar xwỳnhjaja pikaprǎr pa. Nē gôx kǎm pǎr gô krǎhkǎ hǎ pa xwỳnhja haxwỳja gjêx pa. Nē pǎr kǎm mē pa xwỳnhjaja haxwỳja hagjê nē pikaprǎr pa. No nhūm gô mex kǎm pǎr kǎm mē pa xwỳnhjaja mē kurom arĩ htĩr nē.

10Tǎ nhūm wam ãm xwỳnhhta wa hijuk ri ãm xwỳnhja õ pifti kakô. Hāmri nhūm kanhêti rax kumrēxja axta nē hpòk o ma ahpār mā tēn pikap tēm nē pyhti nē hino hkwỳ ho ohtô nē homnu hpa. 11Kanhêti nhĩxi pē na pre “mēmoj xỳ xǎ” anhỹr jakamā nhūm tēm nē pyhti nē hino hkwỳ ho ohtô nē homnu pa. Nhūm prem hwỳr mra nē hkwỳ janhi nē ho ixkô nhūm y nē nhūm mē ohtô nē ho ixkô nē axkaprǎ.

12Hāmri nhūm hpǎnhǎ Tĩrtũm kapēr o wrỳk xwỳnhjê hõja õ pifti kakô. Na pre ra ho axkrunēpxi nē hkakôr tǎ hpǎnhǎ ra axte hõ ja kakô. Hāmri nhūm mēhõja tē nē myyti kura nhūm hkwỳ ahtyk nē hirǎ hkêt nē. Nhūm mytwrỳre nē kanhêti mǎ ho anē nē myyti pyrǎ nē hkwỳ ahtyk nē hirǎ hkêt nē harir. Jakamā nhūm kamàt kǎm hirǎ mex kêt nē. Nē arĩgro hǎ myytija haxwỳja hirǎ mex kêt nē.

13Hāmri pa kaxkwa kamā àanhǎhti pumu nhūm kỳx pē ri htor o pa pē tanhmǎ kapēr to nē kapēr o:

—Hêxta waa nē. Kormǎ kot pifti kakôr xwỳnhjaja axkrunēpxi nē kormǎ hkakôr kêt nē. Koja mē tokyx hkakô nhūm pika hkôt ri mē pa xwỳnhjaja amnhĩ xǎ htỳx kamā hamak tỳx o pa. Na pa tee ri mē hkukamǎ ijamxpēr nē inhmǎ mē hkaprĩ htỳx nē. Hêxta waa nē. Koja mē omnuj tỳx kumrēx. Anē.

9 1Tǎ pa axte mēmoj pumu. Nhūm Tĩrtũm kapēr o wrỳk xwỳnhjê hõ õ pifti kakô. Na prem ra ho kwat nē hkakôr tǎ hpǎnhǎ axte hõja ja kakô. Hāmri nhūm kanhêti hõ axta nē pikap tēm kurê kumrēx nhūm mēhõja omu nē hwỳr tē nē kǎm mēmoj tǎ saf gô. Satanasti jagjēnh xǎ hǎ ahkre xupỳm o htỳx xǎ hǎ safja nhūm kanhêti mǎ kugô.

2Hāmri nhūm kupy nē ahkrehtita wỳr o tē nē kahê xà mē nhūm kurūm kuwy hkūm hapôx rax nē. Nē ma kàx mã àpir o pa nē myyti hpro hpa nhūm kamàt kô rax kumrêx.

3-11Nē kuwy hkūmjā rūm mēmoj te krit pyrāk xwỳnh kwỳjaja pikap rôrôk nē kuhê. Te kot krit pyrāk tã mē hkuk te panhĩ hkuk pyrāk. Nē mē hkrã hkĩ te mēnijê hkrã hkĩ japjê pyrāk. Nē ôr o mē ahkà jagjê. Nē mē wa japjê htỳx kumrêx. Te rêãwti xwa japjê pyrāk. Nē kàx o mē hinô hkà. Nhūm mē htor o hara hkoko htỳx o mra. Te ho kawar xohtô pijapu kaxyw kot mē hkjênh xà kamã mē htur nē mē hkjênh o hprôt nhūm hkoko htỳx pyrāk. Nē mē hkamnhwỳr o pa kaxyw mē hanhyja te kot makre janhy pyrāk. ã kriitija kot anhỳr. Nē te nhỹhỹm oprê kaxyw nojarêt nē mē hkrit kawar hã hikukrêx mex rēnh pyrāk. Mēõ pahija ahkre xupỳmta kamã kêp mē hkrãhtūm. Ijaew kapêr kãm hixi pê “Apatô.” No Gres kapêr kãm kêp “Aporiãw.” No mē pakapêr kãm kêp “mē hpar o pa xwỳnh.” Hāmri nhūm Tĩrtūm kriiti mã kapêr nē mē kãm:

—E kêr ka mē ma pika piitã hkôt te makre kot amnhĩ nhĩpêx pyrà nē ri mē hkôt mē hkamnhwỳr o apa. ã amnhĩ nhĩpêx anhỳr o mē atã mytwrỳ pê sĩk. No ãm kêr ka mē hpar kumrêx kêt nē. ãm mē kot amnhĩ xà htỳx kãm hamak pix kaxyw tanhmã mē ho ho apa. Te makre kot mē hkamnhwỳr nhūm à htỳx kumrêxta pyrāk. No mē ate mē hkamnhwỳr nhūm mē hkamnhwỳr xàja koja à htỳx o makre kot mē hkamnhwỳr jakre. Nom ra mē kot Tĩrtūm kra hã mē hkagà xwỳnhjaja kêr ka mē omu nē ãm mē omu nē tanhmã mē ho hkêt nē. Mē kêp ixkwỳ na mē. Nē pō nē prãt ka mē ãm omu nē tanhmã ho hkêt nē. ãm mē kot panhĩ nhõkrã kagà hkêt xwỳnh pixjaja ka ã mē hipêx anhỳr o ri mē hkôt apa. Nom kêr ka mē hpar kêt nē. Kê mē tee ri amnhĩ xà hã maj kãm tokyx htyk nē hapêx prãm hkapyrỳ ho pa. E ma mē hwỳr mra nē ã mē hipêx anhỳr o ri apa. Anê.

Hāmri nhūm mē kuma nē ma mē hwỳr mra.

12Na ra pika hkôt wam mē homnu xà pyxi nē hapêx. No ãm arĩ hamêxkrut.

13Jakamã nhūm Tĩrtūm kapêr o wrỳk xwỳnhjê hõja axte ô pifti kakô. Na prem ra ho sĩk nē hkakôr tã axte hkôt hõja hkakô. Nhūm Tĩrtūm kutã ôr o mēsti rūm mēhõja tanhmã kapêr to. Mēsti janhà rūm kapêr. 14Pifti kakôr xwỳnhhta mã kapêr nē kãm:

—E na ra mē kot mē hkwỳjê nhĩmex ã arĩgrota kato. Jakamã kêr ka ma pyhti pê Erax wỳr wrỳ nē gô mỳ ri Satanasti mã mē àpênh xwỳnh pê kwatja pumu. Na prem ra mē hpa hpre nhūm mē gô mỳr ri arĩ hkrĩ ho hkrĩ. Ka mē omu nē mē kãm mē hpa hpre xà hpôt pa kê mē ma mē hkôt ri mē hpar o pa. Anê.

15Na pre ra Tĩrtūm mē kot mē hkwỳjê nhĩmex o pa kaxyw mē kurê nē gô mỳ ri mē unhwỳ nhūm mē kormã mē hpar xà hã arĩgro jamãr o

hkrĩ. Jakamã nhũm ã pifti kakôr xwỳnhnta mã mẽ harẽnh anẽ nhũm kuma nẽ ma tẽ nẽ mẽ hwỳr wrỳ nẽ mẽ kãm mẽ hpa hpre xà hpôt pa. Hãmri nhũm mẽ ma pika piitã hkôt ri mẽ hpar o mẽ hkôt pa. Nẽ mẽ ho ohtô rax kumrẽx nẽ mẽ himex. 16Nẽ ma amnhĩ kôt pôristi ho ohtô rax nẽ o pa. Piitã kawar ã hkrĩ nẽ mẽ hkôt hprôt nẽ hkoko ho mra. Mẽ kęp 200.000.000 hã mẽ harẽ pa mẽ harẽnh ma. Mẽ ohtô rax o mẽ ohtô rax.

17Na pa pre arĩ te ixpimtir kãm mẽ omunh pyrãk. Nhũm kawar ã mẽ hkrĩ xwỳnhjaja. Mẽ hinô kaja axtem kàx o. Nẽ hkamrẽkja te kuwy hpôk kamrẽk pyrãk. Nẽ rãrãrja te mẽ hkurôt kane xà pẽ êsôf rãrãr pyrãk. Nẽ kakrã htyk. ã kàx o mẽ hinô hkà kot anhỳr. Nẽ mẽ hkrit kawarti hkrãja te rêãwti krã pyrãk. Nẽ mẽ hakwa rũm kuwy hpôk mẽ êsôfti mẽ kuwy hkũm axpẽn kôt hapôx o pa. 18-19Nẽ kawarti jamy axtem te kęp kagã xoprẽ hkrã pyrãk nhũm mẽ hamy ho mẽ hkamnhar o mẽ kupa. Nẽ mẽ hakwa rũm kuwy hkũm mẽ kuwy hpôk mẽ êsôfti hapôx xwỳnhnta mã mẽ ho anẽ nẽ. Jakamã nhũm kawartijaja mẽ hkôt ri hamy mẽ hakwa ho mẽ hpar o pa nẽ mẽ ohtô rax kumrẽx nẽ mẽ himex.



Apokarip 9.17-19

20-21Tã nom nhũm arĩ mẽ htĩr nẽ ri mẽ pa xwỳnhjaja. Mẽ kot mẽ hkwyjẽ hpar kêt xwỳnhjaja hãmri ja hã mẽ omunh tã arĩ amnhĩ tomnuj o pa nẽ kãm urer kêt nẽ. Arĩ tanhmã amnhĩ tomnuj to ho pa. Axpẽn pẽ hprô nẽ mjên o amnhĩkati nẽ axpẽn pẽ ahkĩ. Nẽ axpẽn par o ri pa nẽ tanhmã axpẽn xy hto ho pa. ã htỳx ri amnhĩ nhĩpêx anhỳr o pa nẽ kãm urer kêt nẽ. ãm Satanasti hkôt pix mã ri amnhĩ nhĩpêx o pa. Nẽ amnhĩm sãnti hkwy nhĩpêx. Pĩ ho hipêx nẽ kàx o hipêx nẽ kẽn o hipêx. Nẽ hipêx pa nẽ amnhĩ to hwỳr o pa. Nom mo kot mẽ mar kaxyw sãnti jamak kre? Nẽ kot mẽ omunh kaxyw mo no? Nẽ ri mrar nẽ mẽ ho utàr kaxyw mo hte? Na htem arĩ ã amnhĩ to hwỳr kaprỳ anhỳr o pa.

Kagã kaxkep grire jarẽnh

10 1Tã pa arĩ mẽmoj pumu. Nhũm axte Tĩrtũm kapẽr o wrỳk xwỳnh xihtỳxjẽ hõja pika hwỳr wrỳk o tẽ. Nẽ êja kakrã ho na pre. Nẽ hkrã mỳ ri mãxwỳxti ajêt. Nẽ hkuk te myt no kamã hirã htỳx pyrãk. Nẽ akutã hte kamã te kuwy hpôk pyrãk. 2Nẽ ãhkra kamã kagã

kaxkep grire ra pipôt nhũm ma o tẽ nẽ o wrỳ nẽ o xa. Nẽ gô xujanār kām upôk rũm hte xãm nẽ kỳx pẽ amgrà kamã apke rũm hte xãm nẽ o xa pa ixprĩ hã omu.

3Hãmri nhũm kàx pêê amỹra. Te rêãw hkàr tỳx pyràk. Nhũm hpãnhã kaxkwa kamã mẽhõja kãm kapẽr. Te na katõtõk o 7 wês pyràk pa ixprĩ hã tanhmã kapẽr to hã kuma. 4Hãmri nẽ ra mẽ amã ã kagà kaxyw nhũm mẽ ja nê inhmã kapẽr nẽ inhmã:

—Kwa nà kwarĩ ja kot kaj hã kagà hkêt nẽ. ãm ja pix kot kaj akwỳjê mã hã kagà hkêt nẽ. ãm kapxipix mãn ama nẽ ri hã apa.

Anhỹr jakamã pa mẽ amã hã kagà hkêt nẽ. ãm papxipix kuma nẽ ri hã ixpa.

5Tã nhũm Tĩrtũm kapẽr o wrỳk xwỳnh kot gô xujanār kãm upôk rũm hte xãm nẽ apke amgrà kamã ãm xwỳnhhta hãmri Tĩrtũm nhỹ hã kapẽr kaxyw nẽ kànhmã ãhkra pẽ. 6-7Tĩrtũm pẽ kaxkwa nẽ pika nẽ gô xujanār o kator nẽ kamã kot mẽmoj piitã ho kator xwỳnhja. Nẽ htĩr rãhã nẽ pa ho pa xwỳnhja. Nhũm ỹ hã kapẽr nẽ kapẽr o:

—E hãmri. Amnepê mã na pre Tĩrtũm ỹ hã mẽ kãm kapẽr o ri mẽ pa xwỳnhjê mã tanhmã amnhĩ kukamã amnhĩ jarẽnh to. Tanhmã kot pika piitã hkõt mẽ pa xwỳnhjê nhĩpêx to hã amnhĩ jarẽ. Nẽ mẽmo arĩgro hã mẽ kot amnhĩ tomnuj mỳrapê tanhmã kot mẽ hipêx to hã mẽ hkukamã mẽ hã amnhĩ jarẽ. Tã ra ã mẽ hipêx anhỹr xà hã arĩgro kato. Jakamã koja kapẽr o wrỳk xwỳnh kot hitepta õ pifti kakõ hãmri nhũm mẽmojja ã amnhĩ nhĩpêx anhỹr kurê kumrêx. ãm hãmri na pa mẽ amã ja jarẽ. Anẽ.

8Pa mar o ixãm rôm nhũm wam inhmã kapẽr xwỳnhhta axte inhmã kapẽr nẽ inhmã:

—E ma pika hwỳr wrỳ nẽ gô xujanār kãm upôk rũm hte xãm nẽ amgrà kamã apke rũm hte xãm xwỳnhhta wỳr tẽ nẽ kêp kagà kaxkep grire pipôt xwỳnhhta py. Anẽ.

9Hãmri pa kuma nẽ ma hwỳr wrỳ nẽ hã kuwỳ nhũm inhmã kugõ nẽ inhmã:

—E mĩ. Apy nẽ akrê. ãnhre. Te kot menh xành pyràk. Nom kot kaj akrê nẽ anhõhy xà. Nom mãmrĩ apy nẽ akrê. E mĩ. Anẽ.

10Hãmri pa kêp kupy nẽ hkaki nhũm ãnhre. Pa hkrêr pa hãmri nẽ inhõhy xà kurê kumrêx.

11Hãmri nhũm kot inhmã õr xwỳnhhta inhmã:

—Nà ãm hãmri na ka apy nẽ akrê. Jakamã kêr ka ano ho ate mẽmoj piitã omunh xwỳnhja nẽ ajamak o ate mẽmoj mar xwỳnhja nẽ ate tanhmã Tĩrtũm kapẽr mar toja ka piitã hã kagà hpa. Hãmri nẽ ate omunh xà hkõt akwỳjê mã piitã harẽnh o apa. Mẽ kot nhỹrmã Tĩrtũm kot tanhmã mẽ piitã mẽ hipêx to hã harẽnh mar kaxyw. Ahpỹnhã ri pika piitã hkõt mẽ urojê piitã koja nhỹrmã ã mẽ hipêx anẽ. Ahpỹnhã ri mẽ kapẽr xwỳnh piitã. Nẽ mẽ õ pahijaja. ãm mẽ piitã koja nhỹrmã ã mẽ hipêx anẽ. Anẽ.

Tirtúm nhỹ hã kapër xwỳnh pijakrut wa harënh

11 ¹Tã nhũm mēhōj inhmã mēmoj to mīdi xà hã pĩ ryre gō nē inhmã:

—E ja py nē Jerujarē hwỳr wrỳ nē kamã Tirtúm mã amnhĩ jarënh xà hã ixkreja o mīdi. Nē ixkre kamã amnepêm mē kot amnhĩ tomnuj pãnhã Tirtúm mã ôwēhti nhōr xà hã mēstita mã ho anē nē ho mīdi. Nē ixkre kamã mē kot Tirtúm mã amnhĩ jarënh o mē hkrĩ xwỳnhjaja ka aprĩ hã mē ho kōta.

2—No ixkre kapem pikaja ka ho mīdi hkêt nē. Ra Tirtúm kot mē kot amnhĩ tomnuj xwỳnhjē mã hkaga jakamã koja mē htỳx ri kãm hprãm xà hkôt tanhmã homnu hto ho pa. Nē Jerujarē piitã hkôt ri homnu ho paja ã hã amgrã axkrunēpxi nē hkôt mytwrỳ kệp 6.

3—Koja Tirtúm ma ỹ hã kapër xwỳnh ho hamēxkrut nē mē hwỳr wa kumē nhũm wa ma mē hwỳr wrỳ nē mē kãm Tirtúm kapër jarënh o ri mē hkôt pa. Hãmri nē tee ri mē kot tanhmã amnhĩ tomnuj to hã mē omu nē hkaprĩ nē. Hãmri nē wa hkaprĩ xàj xak punure kaxô nē haxà nē mē kãm Tirtúm kapër jarënh o ri wa pa hã amgrã axkrunēpxi nē hkôt mytwrỳ kệp 6. Jakamã e. Pija py nē ma mē hwỳr wrỳ nē ixkreta o mīdi. Anē.

4Wa pijakrut wa kot Tirtúm nhỹ hã kapër jarënh o wa pa xwỳnhhta wa. Na htem wa kot amnhĩ nhĩpêx ã wa harënh ma nē mēmo pĩ hpàr pē oriwēhti kot tanhmã amnhĩ nhĩpêx toja mã hamaxpër kurê kumrêx. Nē amnepêm Tirtúm nhỹ hã kapër o pa xwỳnh pē Jakaris kot kanê hpôk xãmta mã mãânēn hamaxpër. Oriwēhti xôja htwỳm rax kumrêx nhũm htem htwỳm opôj nē ho kanê ho nỳt nē hpôk nē kỳx pē unhwỳ nhũm mē piitã hirã kamã rít mex o ri mra. Nē kanê hpôk mexja te kot Tirtúm kapër pyræk. Nē kanê xãm xàja te kot Tirtúm nhỹ hã kapër jarënh o wa pa xwỳnhhta wa uræk. Nē oriwēhtija haxwỳja te kot wa uræk. Ra Tirtúm Karō kot wa hkarō mã àr jakamã na hte wa hprĩ hã mē kãm Tirtúm kapër jarënh o pa nhũm mē kot mar xwỳnhjaja te kanê nhĩrã kamã ri rít mex nē ri pa pyrã nē hprĩ hã mar tỳx nē.

5Tã koja mēhō tanhmã wa hipêx to kaxyw wa hwỳr tē nhũm wa hakwa rùm kuwy hpôk kato nē kot tanhmã wa ho mã xwỳnhhta o hxêt o kupĩ.

6Nē koja wa Tirtúm xàhpumunh tỳx xà ho tanhmã ri mē hã mēmoj nhĩpêx to pē mē kãm kapër jarënh o ri mē hkôt pa. Jao tanhmã na hto nhũm mē hã wrỳk kêt ry nē. Rỳ tanhmã mē kệp gō hto nhũm mē hkamrô hã mē kệp amnhĩ jahkre. Koja wa ã Tirtúm nhỹ hã mē kệp mēmoj nhĩpêx anhỹr ho wa pa. Nē xatã wa kãm hprãm xà hkôt tanhmã mēmoj tomnu hto. 7Nē mē kãm kapër o pa pē ã mē hipêx anhỹr o wa hã amgrã axkrunēpxi nē hkôt mytwrỳ kệp 6 nē rĩ kormã ho hapêx. Hãmri nhũm ahkre xupỳm rùm Satanasti nhō kôwenatôja kato nē ma wa hwỳr tē nē

nhÿri pry kahti ri wa unê nê wa kupĩ nhũm wa pry kamã ty nê nõ. 8Hãmri nhũm mẽ wa haxàr kêt nê nhũm wa arĩ pry kamã nõ. Krĩ kapem na prem pĩ kahpa hã Jejus nhô nê kupĩ. Krĩ nhô xwÿnhjaja mẽ kot amnhĩ tomnuj tÿx xwÿnh na mẽ. Te ho amnepêm krĩ pê Sotô mẽ pika pê Ejit kamã mẽ kot amnhĩ tomnuj xwÿnhjê kot amnhĩ nhĩpêx pyræk. 9Jakamã nhũm mẽ kot wa haxàr nê axpên kurê nhũm wa pry kamã arĩ ty nê nõ nhũm mẽ piitã wa hwÿr mra nê wa omu. Nê ahpÿnhã krĩ piitã hkôt mẽ pa xwÿnhjaja tanhmã amnhĩ to nê ja hã wa omu. Ahpÿnhã ri pika piitã hkôt mẽ urojaja. Nê ahpÿnhã ri mẽ kapêr xwÿnh piitã. Hãmri arĩ ahpÿnhã mẽ õ krĩ kamã pa htã tanhmã amnhĩ to nê wa htyk ã wa omunh ã hã apkati axkrunêpxi nê hkôt hã myt ahpã. 10Koja mẽ wa htyk ã wa omu hãmri nê hkĩnh nê. Nê hkĩnh xàj axpên mã hkĩnh xà nhõr o pa. Wa kot kormã htĩr ri tanhmã mẽ homnuj to ho ri mẽ hkôt paja mã hamaxpêr nê wa htyk ã wa omu nê hkĩnh tÿx nê.

11Tã koja wa htyk ã apkati axkrunêpxi nê hkôt hã myt ahpã hãmri nhũm Tĩrtũm wa kamã htyxà rê nê akupÿm wa ho wa htĩr nhũm wa kànhmã xa nê ri mra. Hãmri nhũm mẽ kot wa omunh xwÿnhjaja tee ri hã wa omu nê kãm wa uma htÿx kumrêx. ãm kãm wa uma ho kãm wa uma.

12Hãmri nhũm kaxkwa kamã mēhõja wa kãm kapêr nê wa kãm:

— E war amnê mẽ ixwÿr war api. Anê.

Hãmri nhũm wa kuma nê ma kakrã kamã àpir o mõ. Nhũm mẽ kãm wa hkurê xwÿnhjaja tee ri wa àpir ã wa omu.

13Hãmri nhũm pika httertet tÿx nê. Nê krĩ kamã ixkre ohtô nê grànħ pa nê mẽ hkwy nhĩmex rax nê nhũm mẽ ohtô rax kumrêx nê axkaprã. Mẽ kêp 7.000 nê pikaprãr pa. Hãmri nhũm arĩ mẽ htĩr nê ri mẽ pa xwÿnhjaja tee ri mẽ omu nê kãm ma xàj httertet tÿx nê axpên mã:

— Kwa Tĩrtũm mãn ã mẽ panhĩpêx anê. Hihtÿx o hihtÿx jakamã kaxkwa rũm ã mẽ panhĩpêx anê pu mẽ pahpiitã pano ho ixkre pigrànħ ã omu. Anê.

14E na ra amnhĩ xà htÿx kamã hamak xàja hamêxkrut nê hapêx. Tã no ãm arĩ mẽ kaxyw pyxi nê arĩk.

Mẽ kot pifti kot hitep kakôr ã harênh

Apokarip 4.8, 5.9-14, 7.9-12, 14.2-5, 15.3-4, 19.1-2

15Tã nhũm Tĩrtũm kapêr o wrÿk xwÿnh kot hitepja õ pifti kakô nhũm kaxkwa kamã mẽ pa xwÿnhjaja kàx pê kapêr o:

E ãm hãmri. Na ra Mēpahpãm Maati mẽ Jejus Krisja wa kêp krĩ piitã hkôt mẽ piitã mẽ õ Pahihti na wa.

Koja Mēpahpãm Maatija kêp Pahi Maati rãhã nê pa ho pa xwÿnh. Anê.

16Hãmri nhũm mẽ àptàr tũm pê 24jaja. Tĩrtũm kot mẽ pahto amnhĩptàr o hkrĩ xà mã hipòk nê mẽ hkrĩ xwÿnhjaja. Hãmri ã mẽ kapêr anhÿrja

ma nê Tirtũm ã hpijaàm kaxyw hpar pê rôròk pa nê htu mỳr pê hikwỹ. Hãmri nê kãm mex o mex ã harê nê kãm:

17 Pa Pahi Maati Tirtũm. Nà ãm hãmri mẽ ixrom axàhpumunh o axàhpumunh nê axihtỳx o axihtỳx.

Amnepê mã kormã mẽmoj kêt ri na ka pre arãhã apa ho apa.

Tã arĩ arãhã apa ho apa.

Ãm hãmri apê mẽ ixpiitã mẽ ixto amnhĩptàr xwỳnh. Nà ãm hãmri amex o amex.

18 Kot kaj tokyx mẽ piitã tanhmã mẽ kot amnhĩ nhĩpêx to ho pa hã mẽ omunh xà hkôt tanhmã mẽ harênh to.

Nê ra mẽ htyk xwỳnhjaja kot kaj mẽ piitã akupỳm mẽ ho mẽ htĩr pa nhũm mẽ pika rũm hapôx pa nê ma mra nê arĩ mẽ htĩr xwỳnhjê nhĩhkô hã akutã hkrĩ pa.

Ka mẽ piitã mẽ omu nê tanhmã mẽ kot amnhĩ nhĩpêx to ho pa hã mẽ omunh hkôt tanhmã mẽ harênh to.

Mẽ kot amnhĩ tomnuj xwỳnhjaja kot kaj ma mẽ kot amnhĩ xà htỳx kamã hamak o pa htũm xà hwỳr amnhĩ nê mẽ arê nhũm mẽ ma hwỳr hapêx. Hãmri nê tee ri amnhĩ kukamã hamaxpêr nê gryk tỳx kumrêx.

Ka hpãnhã mẽ kot akôt amnhĩ xunhwỳr nê akapêr kôt amnhĩ nhĩpêx o mẽ pa xwỳnh piitã mẽ omu nê tanhmã mẽ ho mex to.

Mẽ kot amnhĩ to rũnh xwỳnhjaja nê mẽ kot amnhĩ to hkryre xwỳnhjaja.

Nê amnepêm mẽ kot anhỹ hã mẽ kapêr o mẽ pa xwỳnhjaja.

Akrajê piitã kot atã hpijaàm xwỳnhjaja kot kaj kormã mẽ htĩr ri tanhmã amnhĩ to mex hã mẽ omunh xà hkôt tanhmã mẽ ho mex to.

Ã kot kaj tokyx mẽ piitã ahpỳnhã mẽ omunh xà hkôt mẽ hipêx anê. Anê.

19Hãmri nhũm kaxkwa kamã Tirtũm nhõrkwỹ hã hakwakre kahê xà amnhĩ mẽ pa kamã ôr o mês kunĩhtita pumu. Pu nhũm na hkatõtòk nê haxênh nê hkrakrak nê na mê te kot jêr krã hakotre pyràk xwỳnhja pikap rôròk rax nê. Nê pika htertet tỳx o htertet tỳx pa arĩ omunh o xa.

Mêhõ ni mẽ kagãmnuti wa harênh

12 ¹Tã pa axte mẽmoj pumu. Kaxkwa kamã aa mẽ pahte mẽmoj pumunh kêt xwỳnhja pa omu. Nhũm mêhõ nija xê te myt no mã hirã htỳx pyràk. Nê hpar nhõkwa kamã mytwrỳre ajêt. Nê kanhêti ho 12 o mẽ ahkà tu nê o xa. ²Na ra htujarô nê hpijagri kaxyw ôhy xà nê amnhĩ kamnhêr o xa.

³Tã pa axte mẽmoj pumu. Aa mẽ pahte mẽmoj ã kot anhỹr pumunh kêt xwỳnh ôja pa omu. Kagãmnuti nom ãm axtem hkà kamrêk tỳx

kumrêx. Nê rax kumrêx. Nê hkrã kêp 7.
Nê hkrã piitã kamã ôr o pahi hã mē ahkã
htu nê o nô. Nê hkrã kamã pãr kêp 10.

4Tã nhũm hamy ho apêr o kaxkwa
kamã kanhêti ho ohtô nê pikap kurê.
Hãmri nê ôhy xà nê amnhĩ kamnhêr o ãm
xwÿnhta wÿr tē nê hkra kator nhũm kot
kêp krêr kaxyw kutã hamãr o nô.

5Hãmri nhũm hkra kato nê myre.
Hihtÿx o hihtÿx ã kot pika piitã hkôt mē
piitã mē ho amnhĩptãr mã xwÿnh na pre.
Nhũm kagãmnutija kot kêp utãr nê hkrêr
mã tã nhũm Tĩrtũm kapêr o wrÿk
xwÿnhjê hõja hwÿr wrÿ nê kêp kumÿ nê
ma Tĩrtũm wÿr kaxkwa kamã kot mē
pahto amnhĩptãr ã hkrĩ xà maatija wÿr
ho api.

6Hãmri nhũm kagãmnuti tee ri ma kot kêp o mõi ã omu nê hpãnhã
nita o apkjê nê kot tanhmã ho kaxyw nhũm amnhĩ tã omu nê umaj hprõt
nê ma tē nê nhÿri kapõt ã amũxu. Ra Tĩrtũm kot hkukamã kãm hpimxur
xã nhĩpêx xà hwÿr hprõt nê ma tē nê kamã kêp amũxu. Nhũm Tĩrtũmja
nê kagã pumunh mex nhũm kêp hpimxur mex ã amgrã axkrunêpxi nê
hkôt hã mytwrÿ kêp 6.

Mê kot kaxkwa kamã mēkarõmnuti kurê kaxàr ã mē harênh

7Tã nhũm mē ra kaxkwa kamã kurê kaxàr kaxyw. Kagãmnuti mē
hkwÿjaja nhũm mē ra Tĩrtũm kurê kaxàr kaxyw kutã amnhĩ xunhwÿ.
Jakamã nhũm Tĩrtũm kapêr o mē wrÿk xwÿnhjê hkrãhtũm Mikewja ma
mē hwÿr amnhĩ kôt hkwÿjê o mra nê mē pijapu ho kuhê.

8Hãmri nhũm kagãmnuti tee mē kutã amnhĩ to htÿx kaprÿ nhũm
Tĩrtũm kapêr o mē wrÿk xwÿnhjaja amnhĩ nê mē ho axtem nê kaxkwa
rũm mē kator o mē kator.

9Satanasti pē kagãmnutita kagã kot ni kator ewa mã hêx xwÿnh na
pre. Nê hêx rom tanhmã hêx to ho pa xwÿnh. Jakamã nhũm Mikew mē
hkwÿjaja hkwÿjê mē mē ho hpimràatã amnhĩ nê pikap mē rēnh pa.

10Hãmri nhũm kaxkwa kamã mēhõja axte kãxpê kapêr nê kapêr o:

E ãm hãmri. Na ra Tĩrtũm hihtÿx o hihtÿx o mē panê mēmoj
punuj piitã ho hapêx par kumrêx.

Na pre hte Satanasti pē mēkarõmnutija xatã hwÿr mra nê kãm
tanhmã Jesus kwÿjê ho kapêr punuj to ho pa.

Tã koja axte mē ho kapêr kêt kumrêx. Ra Tĩrtũm kot amnhĩ nê
kator o kator nhũm ra ma mõi o mõi kênã.



Apokarip 12.3-4

Koja Tirtūm pika piitã hkôt mẽ ho amnhĩptàr xwỳnhjê japôx pa nê hpãnhã mẽ kaxyw Kra Krisja xãm nhũm pika piitã hkôt mẽ ho amnhĩptàr rãhã ho pa.

Nà ãm hãmri. Ja mex o mex.

- 11 Na pre Jejus kôt mẽ pahtõ nê mẽ pahtõxjaja mẽkarõmnuti kutã amnhĩ to htỳx nê pa. No ãm amnhĩ nhỹ hã ã kutã amnhĩ nhĩpêx anhỹr kêt.

Mẽ pahte amnhĩ tomnuj pãnhã amnhĩrer xwỳnhhta na pre ty nê hkamrô ho mẽ kuhõ nê mẽ nê mẽ kot amnhĩ tomnuj o hapêx.

Jakamã nhũm prem kukwak ri Satanasti kutã amnhĩ to htỳx rãhã pa.

Nhũm mẽ kot Jejus ã mẽ himex par kaxyw tã nhũm mẽ kãm htyk pyma hkêt nê. ãm Jejus kôt arĩ amnhĩ to htỳx nê mẽ hkôt pa rãhã nê.

Jao arĩ mẽ kãm Jejus kot mẽ panê tanhmã amnhĩ nhĩpêx to hã harênh o ri mẽ hkôt pa.

- 12 Tã Tirtūm ra kot mẽ panê mẽmoj punuj o hapêx par jakamã kwa kaxkwa kamã mẽ apa xwỳnhjaja kêt ka mẽ akĩnh nê apa.

Nom gô xujanãr kãm nê pika kamã mẽ pa xwỳnhjaja hêxta waa nê. Koja mẽ mex kêt nê.

Nê ra Mikew mẽ hkwyjaja kot amnhĩ nê kaxkwa rũm mẽkarõmnuti mẽ hkwyjê kator nê pikap mẽ rênh par jakamã nhũm Satanastija gryk tỳx kumrêx.

Tirtūm kot ma mẽ kot amnhĩ xà htỳx kamã hamak o pa tũm xàta wỳr mênh xà hã arĩgro hwỳr amgrà grêre nhũm tee ri amnhĩ kukamã hamaxpêr nê gryk tỳx o gryk tỳx. Anê.

13 Hãmri nhũm kagãmnutija mẽ kot amnhĩ nê kaxkwa rũm kator ã amnhĩ pumu nê gryk tỳx nê. Nê gryk xàj ma akupỹm ni kot hkra myre ho pijagri xwỳnhhta wỳr tẽ nê tanhmã ho kaxyw hkôt ho krihkrit.

14-16 Hãmri nhũm Tirtūm kapêr o mẽ wrỳk xwỳnhjê hõja omu nê nija mã àanhãhti jara gõ. Kot kagãmnuti pê ho htor nê ma nhỹri hpimxur xà wỳr htêm kaxyw. Nê kormã htor kaxyw nhũm kagãmnuti omu nê kot gô ho hanhir kaxyw hkôt hakwa rũm gô kapĩ nhũm hpikapĩr rax kumrêx. Te pyhti hprôt tỳx pyræk. Hãmri nhũm Tirtūm omu nê nija nê tanhmã pika hto nhũm kãm axkjê nhũm gô hprôt nê kamã pikapĩr pa. Jakamã nhũm mex pê àanhãhti jara ho to nê ma kapôt ã pimxur xà hwỳr ma tẽ. Nê kamã pa hã amgrà axkrunêpxi nê hkôt mytwrỳ kêp 6 nhũm prem hamãr mex rãhã ho pa.

17 Hãmri nhũm kagãmnuti tee ri kãm hpĩr prãm kaprỳ nê gryk tỳx kumrêx. Hãmri nê ma ni hkwyjê hwỳr mō. Mẽ kot Tirtūm mẽ Jejus wa

hkôt amnhĩ nhĩpêx o mẽ pa xwỳnhjê hwỳr tanhmã mẽ homnuj to kaxyw ma mẽ hwỳr mō. Hāmri nē tanhmã kot mẽ ho kaxyw gō xujanār mỳ ri nō.

Satanasti nhō kōwenatō wa kot gō xujanār rŭm kator ã wa harēnh

Sikŭn Tesarōn 2.3-5

13 1Tã pa axte mẽmoj pumu. Nhũm gō xujanār rŭm Satanasti nhō kōwenatōjê hōja te mrymnuti pyrà nē àpir o mō. Kagāmnuti pyrà nē hkrã kêp 7. Nē uràk nē hpàr kêp 10. Nē hpàr piitã kamã pahi hã mẽ ahkã. Nē ahkã piitã hã axtem tanhmã Tĩrtŭm o kapêr punuj to nē tanhmã haprỳ hto hã kagàja hikwỹ.

2Nē hkà te kêp ropkrorti kà pyràk. Nē hakwa te kot rêawti jakwa pyràk. Nē ìhkra te kot pàati nhìhkra pyràk. Jakamã na pre kagāmnuti nhỹ hã hihtỳx o kêp pahi hã pika nhō xwỳnhjê ho amnhĩptàr o pa.

3Nē hkrã hō te mẽ kot hayr o hpĩr nhũm ra akupỳm htĩr nē arĩ hayr xà wakre rã nyw pyràk. Jakamã nhũm pika kamã mẽ pa xwỳnhjaja amnhĩ jaêr pê omu nē kamã no pyma nē. Hāmri nē hkôt amnhĩ nhĩpêx o pa.

4Hāmri nē kagāmnuti kot tanhmã mrymnuti ho nhũm ÿ hã mẽ ho amnhĩptàr jakamã nhũm mẽ piitã hamẽ wa hã hpijaàm kaxyw wa kãm wa mex o wa mex ã wa harēnh o pa. Nē mrymnuti hã axpẽn mã:

—Hêxta waa nē. Mẽ pahtō na mẽ pahte mrymnutita pyrà nē ã mẽ pahte amnhĩ nhĩpêx kot anhỹr? Mẽ pahtō kot pu kutã xa nē paxihtỳx o hkurê kapa? Nà amrakati kumrêx. Anẽ.

5-6Hāmri nhũm Satanasti tanhmã mrymnuti ho nhũm kapêr o ri mẽ hkôt pa nē mẽ ho amnhĩptàr o hã amgrà axkrunêpxi nē hkôt mytwrỹ kêp 6. No ãm axtem nē Tĩrtŭm o kapêr punuj o ri mẽ hkôt pa. Nē ri tanhmã haprỳ hto nē ò krĩja mex kêt ã harēnh o ri mẽ hkôt pa.

7Hāmri nhũm Satanasti ra kot mẽ hkurê kaxàr kaxyw kãm anẽ nhũm axtem nē Tĩrtŭm pê hkrajê kutã amnhĩ xãm nē mẽ hwỳr hprôt nē tanhmã hpijapu hto ho pa nē mẽ ho axtem nē mẽ ho krihkrit pa nē ahpỳnhã ri pika piitã hkôt mẽ uro hkwỳjê ho amnhĩptàr o pa. Nē ahpỳnhã mẽ kapêr xwỳnh piitã mẽ ho amnhĩptã.

8Jakamã nhũm mẽ ohtō rax kumrêx nē mrymnuti hkôt amnhĩ nhĩpêx. Nē kutã hkõn krã ho rôròk nē hkrĩ nē kãm mex o mex ã harẽ. No ãm mẽ piitã hkêt. Kot mẽ pahte amnhĩ tomnuj pãnhã amnhĩrer xwỳnh kôt ra mẽ kot amnhĩ xunhwỳr xwỳnhjaja tapxipixjaja na prem hkôt amnhĩ xunhwỳr kêt nē. Amnepê mã kormã amrakati ri Tĩrtŭm mẽ Jesus wa ò kagà kamã mẽ htĩr tŭm nē mẽ pa mã xwỳnh nhĩxi xwỳnh pixjaja na prem mrymnuti pumu nē hkwỳjê rom hprĩ hã kot amnhĩ nhĩpêx ã omunh kurê kumrêx nē hkôt amnhĩ nhĩpêx kêt nē.

9 E ka mẽ atō axumar kaxyw ajamak kre hã kot kaj ixujarēnh piitã ama nē kãm ajamaxpêr tỳx rãhã ho apa.

10 Jakamã kwa Tirtũm kôt ixkwỳjaja. Kwãr mẽ mãmri mẽ apynê nê mẽ ajagjê.

Nê kwãr mẽ mãmri wapo ho mẽ ajayr o mẽ apa.

Nom kêr ka mẽ umaj ixkaga hkêt nê. Ixkaga hkêt o ixkaga hkêt.

Mê ãm ixkôt pix mã amnhĩ nhĩpêx o ri apa rãhã ty.

Pika rũm mrymnuti hõ kator ã harênh

Makre 13.22

11Tã pa mrymnuti hõ pumu. Nom wamta pyrã nê gô xujanãr rũm kator kêt axtem pika rũm kato. Nê ôwêhti hkrare pyrã nê hpãr pijakrutre. Nê te ho kagãmnuti kapêr tỳx pyrã nê kapêr tỳx kumrêx o pa.

12Gô xujanãr rũm mrymnuti xàpir xwỳnhhta nhỹ hã pika nhõ xwỳnhjê mã kapêr tỳx nê mẽ kãm:

—E pika piitã hkôt mẽ apa xwỳnhjaja mẽ inhma. Kêr ka mẽ kot hkrã hõ jayr o hpĩr nhũm akupỹm htĩr xwỳnhhta kôt pix mã amnhĩ nhĩpêx rãhã ho ri apa. Nê kãm mex o mex ã harênh rãhã nê.

Anhỹr o mẽ kãm kapêr. 13Hãmri nê Satanasti nhỹ hã mẽ kãm aa mẽ kot mẽmoj pumunh kêt kwỳ ho anhỹr o pa. Jao kaxkwa rũm tanhmã mẽ kãm kuwy ho wrỳk to nhũm pikap rôrôk nhũm mẽ amnhĩ jaêr pê omu nê kamã no puma nê. 14Ã ri mẽ noo mã mẽ kãm amnhĩ nhĩpêx anhỹr o ri mẽ hkôt pa. Gô xujanãr rũm mrymnutija noo mã ã hêx rom amnhĩ nhĩpêx anhỹr o mẽ no kupyrr o pa nhũm mẽ omu nê hkôt amnhĩ nhĩpêx. Hãmri nhũm mẽ kãm mẽmoj tã karõ nê mẽ kãm:

—E wam mrymnutita. Mẽ kot hkrã hõ jayr o hpĩr nhũm akupỹm htĩr xwỳnhhta kêr ka mẽ kãm hkarõ nhĩpêx nê ho mẽ anhõ sãnti. Kê mẽ piitã hwỳr mra nê kutã hkõn krã ho rôrôk nê hkrĩ nê amnhĩ to kuwy nê kãm mex o mex ã harê.

Anhỹr o mẽ kãm hã karõ. 15Hãmri nhũm mẽ kuma nê mar xà hkôt hipêx nê ãm nhũm xa. Hãmri nhũm mrymnuti kot hitepta omu nê hwỳr tẽ nê tanhmã ho nhũm ra kapêr nê mẽ kãm:

—E kêr ka mẽ kot inhmex ã ijarênh kêt xwỳnhjê pynê nê mẽ himex pa. Anê.

16Hãmri nhũm pika rũm mrymnuti kator xwỳnhhta haxwỳja mẽ kãm kapêr nê mẽ kãm:

—E koja ixkwỳjaja inhỹ hã mẽ apiitã mẽ apê ixkwỳ hã mẽ akagã. Mẽ ate amnhĩ to rũnh xwỳnhjaja nê mẽ ate amnhĩ to hkryre xwỳnhjaja. Nê amarĩ mẽ kãm mẽ axapênh xwỳnhjaja nê amnhĩ mã mẽ axapênh xwỳnhjaja. Nê mẽ akaxpore rũnh xwỳnhjaja nê mẽ apê amrakati xwỳnhjaja. Kojã mẽ apiitã mẽ akagã hpa. Mẽ akwỳ nhõkrã kagã nê mẽ akwỳ xupôk rũm mẽ anhĩkra katut kagã.

17—Gô xujanãr rũm mrymnutita nhĩxi kot paj mẽ atã hipêx. Rỳ hixi hã nũm nhĩpêx. Hãmri ka mẽ axãpkur xà japrôr kaxyw nhỹhỹm mra

nhũm mẽ atã hixita pumu nê rĩ kormã mẽ amã mẽmoj kwỳ ho wẽnê ka mẽ amnhĩm haprô nê ho axàpkur o ri apa. Nê mẽ ate mẽmoj to wẽnê xwỳnhjaja koja mẽ apê mẽmoj japrôr kaxyw mẽ awỳr mra ka mẽ tee ri nhỹhỹnh mẽ hã hixi japêr hãmri nê mẽ kãm mẽmoj to wẽnê hkêt nê. Ām nhỹhỹnh mẽ atã hixi hã kagàta pumunh pix kukwak ri kot kaj mẽ awjaprô rỳ mẽmoj to wẽnê. Anê.

18E kwa kêr ka mẽ ixte mẽmoj pumunh nê mẽ amã hã kagàta pumu nê ama nê kãm ajamaxpêr tỳx o apa. Mrymnutita nhĩxi na kêp nũm. Nũmja kêp 666. E kaj mẽ akrã hi mex xwỳnhjaja kot kaj mẽ aprĩ hã ja mar tỳx kurê kumrêx.

Tĩrtũm mex ã mẽ grer

Apokarip 7.1-8

14 1Tã pa axte mẽmoj pumu. Nhũm mẽ pahte amnhĩ tomnuj pãnhã amnhĩrer xwỳnhja hixêt pê Siãwja nhĩmõk ã xa. Nê puhã mẽ ohtô rax kumrêx nê kuhê. Mẽ ohtô ho mẽ ohtô. Piitã kamã mẽ kêp 144.000. Nê piitã ôkrã hã mẽ pahte amnhĩ tomnuj pãnhã amnhĩrer xwỳnh mẽ Hipêêxà wa hixi jaxwỳr pa mẽ omu.

2Nhũm mẽ kaxkwa kamã grer o kuhê. Mẽ grerja mex o mex. Te kot gô hprôt tỳx hkoko htỳx pyræk. Nê te na katôtøk tỳx pyræk. Nê te wiorãw môr xwỳnhjaja kot hkakrênh mex pyræk pa mẽ mar o xa.

3Nê mẽ grer xwỳnhjaja. Jejus puhã mẽ ohtô rax kumrêx nê mẽ kuhê xwỳnhjaja na prem Tĩrtũm kot mẽ ho amnhĩptàr ã hkrĩ xàta kuri grer o kuhê. Nê mẽmoj tĩr pê kwat xwỳnhjê mẽ mẽ àptàr tũm pê 24jê kuri grer o kuhê. Mẽ grer nyw o gre. Ām mẽ tapxipixjaja mẽ kot mẽ grer nywja mar. Ra mẽ kêp Tĩrtũm kra hã mẽ kot mẽ ôkrã hã Tĩrtũm mẽ Kra Jejus wa hixi ã kagà nhũm Tĩrtũm kot ra mrymnuti mẽ hõta wa kêp mẽ utàr nê amnhĩ wỳr mẽ ho àpir xwỳnh na pre mẽ. Ām mẽ tapxipixjaja mẽ grer nywja ma nê wa kãm ho grer o kuhê.

4-5Na prem tãm amnhĩ nhĩpêx nê Tĩrtũm kôt amnhĩ nhĩpêx rãhã ho pa. Te mẽ kot amnhĩ prô pix tãnopxar rãhã ho pata pyræk. Nê ri tanhmã hêx to rỳ tanhmã ri amnhĩ tomnuj to ho pa hkêt nê. Ām tãm ri amnhĩ nhĩpêx mex o pa. Mẽ kêp Tĩrtũm mẽ mẽ pahte amnhĩ tomnuj pãnhã amnhĩrer xwỳnh kwỳ jakamã na prem mẽ pahte amnhĩ tomnuj pãnhã amnhĩrer xwỳnhhta kôt pix mã amnhĩ nhĩpêx o pa. Jakamã na prem mrymnuti kutã rôrôk nê kãm mex o mex ã harênh kêt nê. Tã mẽ kumrêxjaja Tĩrtũm mẽ Kra wa kuri wa kãm grer o kuhê.

Tĩrtũm kapêr o wrỳk xwỳnh pijakrunêpxi jarênh

6Tã pa axte Tĩrtũm kapêr o wrỳk xwỳnhjê hõ pumu nhũm kỳx pê ri htor o pa. Ahpỳnhã ri pika piitã hkôt mẽ uro hkwỳjê hkôt. Na ahpỳnhã ri mẽ kapêr xwỳnhjê piitã mẽ hkôt mẽ kãm Tĩrtũm kot tanhmã mẽ hipêx

to hã harënh kaxyw. Ahpÿnhã mẽ kapër xwÿnh piitã mẽ kãm harënh o pa. Nê htor o pa pê kÿx pê mẽ kãm kapër nê mẽ kãm:

7“E na ra Tirtũm mẽ ate amnhĩ tomnuj mÿrapê tanhmã mẽ ato kaxyw. Jakamã kwa mẽ tokyx hã apijaàm kaxyw akõn krã ho arôrõk nê akrĩ nê kãm mex o mex ã harê. Kêp mẽmoj piitã ho kator xwÿnh na. Na pre kaxkwa ho kato nê pika ho kato nê gô xujanãr o kato nê hino ho kato nê mẽmoj piitã ho kator pa. Jakamã kwa kêr ka mẽ tapxipix ã mãn apijaàm nê kãm mex o mex hã harënh rãhã ho apa.”

Anhÿr o mẽ kãm kapër. 8Hãmri nhũm hõja wamta kõt tẽ nê uràk nê kÿx pê mẽ kãm kapër o:

—Koja Tirtũm tokyx Papirõn grãnh pa. Na hte krĩ nhõ xwÿnhjaja amnhĩ tomnuj pix rãhã ho pa. Mẽ kot amnhĩ nhĩpêx te mẽ kot kagõxÿhti ho hkõm nê amnhĩ mẽ mẽ piitã mẽ kãm õr nê ho mẽ ho pipãnh pyrãk. Na htem mënijê piitã ho amnhĩkati o pa. Nê amnhĩ kwÿjê pê mẽ hprõ ho amnhĩkati. Nê amnhĩ mẽ pika piitã hkõt mẽ pa xwÿnhjê mã anhÿr o pa. Mẽ kot mẽ uràk nê ã amnhĩ nhĩpêx anhÿr o pa kaxyw mẽ kãm anhÿr o pa. Ja mÿrapê na ra Tirtũm kot tanhmã mẽ ho kaxyw mẽ hã amnhĩ jarê. Anê.

9Tã nhũm wa hkõt hõja tẽ nê wa uràk nê kàx pê pika nhõ xwÿnhjê mã kapër nê mẽ kãm:

—E mẽ ate mrymnuti kutã akõn krã ho arôrõk nê akrĩ nê kãm mex ã harënh xwÿnhjaja. Nê mẽ ate karõ nhĩpêx nê kutã akõn krã ho akrĩ nê kãm mex ã harënh xwÿnhjaja. Nê mẽ anhõkrã nê mẽ anhĩkra hã hixi hã kagã xwÿnhjaja.

10-11—Tirtũm na tee ja hã mẽ apumu nê mẽ akamã gryk tÿx kumrêx. Mẽ ate kapër kuhpa hã mrymnuti hkõt amnhĩ xunhwÿr jakamã nhũm mẽ akamã gryk tÿx o mẽ akamã gryk tÿx. Jakamã koja kuwy hpõk rãhã ho rãhã xwÿnhhta kamã mẽ arënh pa ka mẽ amnhĩ xà htÿx kamã ajamak rãhã apa ho apa. Koja kuwy hpõkja aa hapêx kêt nê kurũm kàx mã hkũm àpir o pa rãhã nê. Koja ã mẽ ate amnhĩ tomnuj o mẽ apa xwÿnhjê nhĩpêx anê ka mẽ kamã apa ho apa nê aa kurũm ajapõx kêt nê kamã amnhĩ xà htÿx kãm ajamak rãhã apa ho apa. Arĩgro hãn kamàt kãm arĩ ã amnhĩ nhĩpêx anhÿr rãhã apa ho apa. Mẽ ate gõj rũm mrymnuti mẽ hkarõ ho sãnti wa kutã akõn krã ho arôrõk nê akrĩ nê wa kãm wa mex ã wa harënhja mÿrapê kot kaj mẽ ã amnhĩ nhĩpêx anê. Kot mẽ pahte amnhĩ tomnuj pãnhã amnhĩrer xwÿnh mẽ Tirtũm kapër o mẽ wrÿk xwÿnhjê noo mã kot kaj mẽ ã amnhĩ nhĩpêx anhÿr o apa.

12Anhÿr o mẽ kãm kapër jakamã kwa kêr pu mẽ pahte Tirtũm kõt amnhĩ xunhwÿr xwÿnhjaja mẽ hkukamã mẽ harënhja ma nê Tirtũm kapër kõt pix mã amnhĩ nhĩpêx rãhã ho ri papa. Mẽ kot tanhmã hã mẽ pahto htã pu mẽ hkaga hkêt nê amnhĩ kaxyw Jejus kõt pajamaxpêr tÿx rãhã nê. Hãmri nê nhÿrmã mẽ kurom ma õ krĩ hwÿr api nê kamã pamex kumrêx nê papa ho papa.

Mê kêp Jejus kwỳ hã mê htyk xwỳnhjê jarênh

Wam Tesarôn 4.16

13Tã nhũm kaxkwa kamã mēhōja axte inhmã kapēr nē inhmã:

E Juãw. Kêr ka ã akwỳjê mã mēmoj tã kagà anē nē mê kãm hã kagà ho: “E mê ate Tirtũm kôt ri amnhĩ nhĩpêx xwỳnhjaja. Mê kot Tirtũm ã mê apar nhũm mê atyk tã koja amnhĩ tã mê ato mex rax kumrêx.” Anhỹr o mê kãm hã kagà.

Anhỹr o inhmã kapēr. Hãmri nhũm Tirtũm Karōja kuma nē kãm:

— Nã ãm hãmri na ka ã mê harênh anē. Ra Tirtũm kot amnhĩ tã mê omunh rãhã ho pa. Mê kot kôt pix mã amnhĩ nhĩpêx o pa pê mê kãm mê hkurê xwỳnhjê kutã amnhĩ to htỳx rãhã htykja nhũm Tirtũm kot amnhĩ tã mê omunh mex. Koja mê ho mex kumrêx. Mê kot Jejus ã mê hpar tã koja mê ho mex rax nē nhũm mê kuri mex rãhã nē pa ho pa nhũm mēhō axte tanhmã mê ho hkêt nē. Anē.

Tirtũm kot tanhmã mê kãm hkĩnh xwỳnhjê nhĩpêx to

14Tã pa axte mēmoj pumu. Kaxkwa kamã kakrã jakajre pumu. Nē kamã mēhōj te panhĩ pyrã nē nhỹ. Nhũm ôr o pahi hã mê ahkà htu nē kuteere xwagixre py nē o nhỹ.

15Hãmri nhũm kaxkwa kamã Tirtũm kapēr o mê wrỳk xwỳnhjê hōja Tirtũm mã amnhĩ jarênh xà hã ixkre rũm kato nē kakrã jaka kamã ỹr xwỳnhta mã kapēr. Kax pê kãm kapēr nē kãm:

— E pika nhõ xwỳnhjaja te mê hpur kãm mēmo hy ra hkamrêk nē hikênh mã mex pyrãk. Jakamã anhõ kuteere ata py nē ma mê hkôt tanhmã ri mê ho ho ri mê hkôt apa. Te mê kot mēmo hy nhĩkênh o ri pa pyrãk o mê hipêx nē ma ho mê himex o ri apa. Anē.

16Hãmri nhũm kuma nē pika piitã mỳri õ kuteere ho apê nē te mēmo hy jakàr pyrãk o mê hipêx.

17Hãmri nhũm axte Tirtũm mã amnhĩ jarênh xà hã ixkre rũm kapēr o mê wrỳkjê hōja kato. Ĩhkra kamã kuteere xwa gixre py nē o xa.

18Hãmri nhũm axte hōja ixkre rũm kê hkôt kato nē hkukamã kator xwỳnhta mã kapēr. Kax pê kãm kapēr nē kãm:

— E na ra Tirtũm tanhmã mê kot amnhĩ tomnuj to hã tanhmã mê hipêx to kaxyw. Te mê kêp mê hpur kãm mēmo xô pê uwa ra hkamrêk nē rênh mã tãm pyrãk. Jakamã ma pika hwỳr mê hwỳr wrỳ nē mê hkôt ri anhõ kuteere ho mê himex o ri apa. Anē.

19Hãmri nhũm kuma nē ma pika hwỳr wrỳ nē mê hipêx o te mê kot uwa xô rênh nē prês kãm hkapĩr nē kagô janênh pyrã nē mê hkôt ri kuteere ho mê hpar o pa. Tirtũm ra mê kamã gryk tỳx o mê kamã gryk tỳx jakamã nhũm ã mê hkôt mê hipêx anhỹr o ri pa.

20Jakamã nhũm mẽ hkamrô hpikapĩr rax kumrêx o uwa kagô jakre. Te ho pyhti hprôt o nôr pyrâk. Jao upÿm o 2 met nê hkôt ho mêj met. Nom hprôt xâ hkôt ry rax o ry rax. Ho 300 kirôm. Nhũm ã mẽ kamrô hprôt rax anê.

Tĩrtũm mex ã mẽ grer

15 ¹Tã pa axte kaxkwa kamã mẽmoj pumu. Hãmri nê amnhĩ jaêr pê omu nê tee ri hkukamã ijamaxpêr. Aa mẽ pahte mẽmoj ã kot anhÿr pumunh kêt xwÿnh pa pre omu. Nhũm Tĩrtũm kapêr o mẽ wrÿk xwÿnh pê 7jaja ahpÿnhã pika hkôt mẽ kot amnhĩ tomnuj xwÿnhjê homnuj kaxyw akuprô nê kuhê. ãm jajê pixjaja koja Tĩrtũm nhÿ hã axte tanhmã mẽ homnuj to nê ho anhÿr pa hãmri nhũm ra ja hapêx o hapêx.

²Jakamã pa axte Tĩrtũm kapem gô rax pumu. Te kot kàx karÿr jaxênh mẽ kuwy hpôk o pihkàr pyrâk xwÿnhja hprôt o nô. Nhũm Tĩrtũm kra hkwyjaja gô mÿ ri ohtô rax kumrêx nê kuhê. Na pre ra mrymnutija tee ri amnhĩ kôt mẽ rênh mã nê tee ri mẽ hã amnhĩ nhÿxi hã kagà hprãm kaprÿ nom nhũm mẽ hkaga nê Jejus kôt amnhĩ nhÿpêx rãhã ho pa. Nê mrymnuti karô ho sãnti mã mex ã harênh kêt rãhã ty nê kaxkwa hwÿr api. Jakamã nhũm Tĩrtũm amnhĩ tã mẽ omu nê mẽ kãm wiorãwti hkwy gô nhũm mẽ piitã hamÿ nê gô rax mÿ ri ho kuhê.

³Hãmri nê Tĩrtũm mã tanhmã amnhĩ to ho pa xwÿnh pê Mojès mẽ mẽ pahte amnhĩ tomnuj pãnhã amnhĩrer xwÿnhhta wa kot Tĩrtũm mã grerta nhũm mẽ Tĩrtũm mã ho grer o kuhê nê grer o:

E Pahi Maati Tĩrtũm. Na pa mẽ ra inhmex pê awÿr ixàpir pa.

ãm hãmri na ka hte tanhmã amnhĩ nhÿpêx to ho ri apa.

Aa tanhmã axêx to hkêt.

Nê mẽ ixrom axihtÿx o axihtÿx.

Nê mẽ ixrom axàhpumunh o axàhpumunh.

Jakamã na ka hte mẽ inhmã aa mẽ ixte mẽmoj pumunh kêt kwÿ ho anhÿr o apa.

Pika piitã hkôt ahpÿnhã mẽ ho amnhĩptàr xwÿnhjê nhô Pahi Maati na ka.

Nê ate tãm amnhĩ nhÿpêx xwÿnh na ka.

⁴Jakamã na htem piitã atã hpijaam o pa.

Nê amã mẽ kapêr xàptàr pix o amã kapêr.

Nê amã amex o amex ã ajarênh rãhã nê. ãm hãmri mẽ ixrom kapxipix amex o amex.

Jakamã koja ahpÿnhã pika piitã hkôt akrajê piitã ate tãm amnhĩ nhÿpêx nê tãm mẽ piitã tanhmã mẽ harênh to hã ajarênh ma nê awÿr mra nê akutã hkôn krã ho rôrôk nê hkrĩ nê amã amex o amex ã ajarê. Anê.

Mê homnu xà hã xijere jamÿnh xwÿnh jarênh

5Tã na pa axte mêmoj pumu. Kaxkwa kamã Tirtûm nhôrkwÿ hã hitom xà piitã amnhĩ kahê xà rê nê kuhê pa omu. Nê ixkre kamã õ hitom mex maati haxwÿja amnhĩ kahê xà mẽ nê xa.

6Hãmri nhũm ixkreja rûm Tirtûm kapêr o mẽ wrÿk xwÿnh pê 7jaja hapôj nê kuhê. Mê ê hakajre nê hirã htÿx kumrêx. Nê mẽ hinô pre xàja ôr pix o. Nê piitã Tirtûm mã tanhmã kot mẽ homnuj to xà hã xijere pê 7ta jamÿnh kaxyw kuhê.

7Hãmri nhũm mêmoj tÿr pê kwatjê ôja mẽ kãm xijere hkwy jamÿ nê mẽ hwÿr o tẽ. Xijere kêp 7 nê piitã ôr o. Nhũm hamÿ nê Tirtûm kapêr o mẽ wrÿk xwÿnhhtajê hwÿr o tẽ nê ho mẽ hipêx nhũm mẽ ahpÿnhã hamÿ. Xijere kamã Tirtûm gryk xà jamÿ nê o kuhê.


8Pu nhũm Tirtûm rûm kuwy hkũm hapôj. Tirtûm mex nê hihtÿx xwÿnhhta rûm hapôx rax o ixkreta kunor pa nhũm mẽ tee ri hwÿr gjêx prãm kaprÿ.

Xijere kamã mẽ homnu xà pê 7 jarênh

16 1Tã pa arĩ mêmoj pumu nhũm Tirtûm nhôrkwÿ kamã mêmôja kapêr o wrÿk xwÿnh pê 7jê mã kax pê kapêr nê mẽ kãm:

—E na pa ra mẽ kot ixkapêr kwÿm ri amnhĩ nhĩpêx xwÿnhjê pumu nhũm ixpê ja omnuj tÿx o ixpê omnuj tÿx. Jakamã e mẽ anhõ xijereta jamÿ nê ma pika hwÿr mẽ hwÿr wrÿ nê axpên pãnhã mẽ hã xijere kamã mẽ homnu xà kapĩ. E mẽ tokyx ma mẽ hwÿr wrÿ. Anê.

2Hãmri nhũm mẽ kuma nê axpên pãnhã mẽ hwÿr wrÿ. Nhũm wamta kumrêx pika piitã hkôt mẽ homnu xàta kapĩ. Pu nhũm mẽ kot mrymnuti mẽ õ sãnti wa kãm mex ã harênh nê amnhĩ tã wa hixi jaxwÿr xwÿnh piitã hkànhy hpa nê à htÿx kumrêx nê ri pa.



3Hãmri nhũm wamta kôt hõja õ xijere py nê gô xujanãr kãm hkapÿr pa nhũm gô te mẽ htykjê kamrô pyrã nê kamã mêmo mry htyyxã rênh xwÿnh piitã pikaprãr pa.

4Tã ra xijere kapÿr xwÿnh o axkrut nê õ xijere kapĩ hãmri nhũm hkôt hõta õ xijere py nê hpãnhã gô hkryre piitã hkôt hkapÿr pa. Pyhti nê ri hino piitã hkôt hkapÿr pa nhũm piitã gô xujanãr pyrã nê mẽ hkamrô hã amnhĩ jahkre hpa.

5Hãmri nhũm axtem Tirtûm kapêr o mẽ wrÿk xwÿnhjê hõ kot kãm gô piitã hamãr xwÿnhhta ja hã omu nê Tirtûm mã kãm:

Pa amex rãhã apa ho apa xwÿnh. Nẽ arãhã apa ho apa xwÿnh.
Nà ãm hãmri na ka ã mẽ kêp gôta nhĩpêx anẽ.

6 Na prem mẽ kot akôt amnhĩ nhĩpêx xwÿnhjê mẽ mẽ kãm ri
akapêr jarênh xwÿnhjê hpar o pa nhũm mẽ hkamrô
hpikapĩr rax nẽ.

Tã ka ra mẽ hã mẽ kêp mẽ hkôm xà homnu hpa nhũm mẽ kêp
mẽ hkamrô ã amnhĩ jahkre nhũm mẽ tee ri ho hkôm mã.
Nà ãm hãmri na ka ã mẽ kêp gô nhĩpêx anẽ Tĩrtũm. Anẽ.

7 Hãmri nhũm mẽ kot Tĩrtũm mã mẽmoj nhõr xà hã mẽsti hpar pê hkrĩ
xwÿnhjê hõja kuma nẽ kãm:

Nà ãm hãmri na ã ajarênh anẽ Tĩrtũm.

Ãm hãmri na ka ã akrajê hã mẽ hipêx anẽ.

Ra ate mẽ hã amnhĩ jarênh xà hkôt na ka hte tanhmã mẽ hipêx
to.

Nà apê mẽ inhõ Tĩrtũm Maati na ka. Mẽ ixrom axihtÿx o axihtÿx
nẽ axàhpumunh o axàhpumunh. Anẽ.

8 Tã ra axkrunêpxi nẽ õ xijere kapĩ. Jakamã nhũm mẽ hpãnhã hõja õ
xijere o tẽ nẽ myyti hã hkapĩr pa nhũm hkagro htÿx nẽ pika hkôt mẽ pa
xwÿnhjê hkà ho hxêt o pa.

9 Kagro htÿx o hkagro htÿx jakamã mẽ hkà ho hxêt nhũm mẽ kamã
hkà kajê hpa. Hãmri nẽ tee ri amnhĩ pumu nẽ hamaxpêr o:

— Nà Tĩrtũmtija na ã mẽ pahtomnuj tÿx anẽ. Anẽ.

Hãmri nẽ kamã gryk tÿx nẽ haprÿ nẽ tanhmã ho kapêr punuj to ho
pa. Nom mẽ kot amnhĩ tomnuj kaga nẽ kãm mex o mex ã harênh kêt nẽ
arĩ tanhmã amnhĩ tomnuj to ho pa.

10 Nhũm ra kêp kwat nẽ õ xijere kamã mẽmojja kapĩ. Jakamã nhũm
ra hpãnhã hõja õ xijere o tẽ nẽ gôj rũm mrymnuti kot mẽ ho amnhĩptàr
xà hã hkrĩ xà hã hkapĩr pa. Jakamã nhũm ra kot mẽ ho amnhĩptàr xà hã
pikaja kamã kamàt kô htyk par kumrêx. Hãmri nhũm mrymnuti mẽ hkôt
mẽ kot amnhĩ nhĩpêx xwÿnhjê hã kamàt kô hpa nhũm mẽ amnhĩ xà htÿx
ã maj amnhĩ nham o axpên kamnhar tÿx kumrêx. 11 Nẽ ã Tĩrtũm kot mẽ
hipêx anhÿr ã amnhĩ tã omu nẽ kamã gryk tÿx nẽ tanhmã ho kapêr punuj
to ho pa. No ãm kot amnhĩ tomnuj xwÿnh ã amnhĩ pumunh nẽ kot
amnhĩ tomnuj kaga hkêt nẽ.

12 Nhũm prem ra kêp sĩk nẽ õ xijere kamã mẽmoj kapĩ. Jakamã nhũm
hpãnhã hõja õ xijere kamã mẽmojta o tẽ nẽ pyhti pê Erax kamã hkapĩr
pa nhũm gôja grà pa nẽ te kêp pry pyrà nẽ nõ. Jakamã nhũm myt japôx
xà rũm mẽ ho amnhĩptàr xwÿnhjaja nẽ pôristijaja hãmri pijapu kaxyw
Jerujarê hwÿr nojarêr nẽ hã hwÿr pa.

13 Tã nhũm kagãmnuti mẽ ÿ hã mẽ kãm hêx o pa xwÿnh mẽ
mrymnutita wa mẽ hakwa rũm mẽmoj te priti pyrà nẽ hapôx o pa. No
ãm priti hkêt mẽ kêp Satanasti mã mẽ àpênh xwÿnh kwÿÿ.

14Jakamã na prem pika piitã hkôt mẽ kot aa mẽmoj pumunh kêt kwý ho anhÿr o hêx rom mẽ no kupyw o mẽ hkôt pa. Tã pika piitã hkôt mẽ ho amnhĩptãr xwÿnhjê mẽ ho pikuprõnh kaxyw mẽ hapêr o pa. Mẽ kot Tĩrtũm xihtÿx o hihtÿx kurê kaxãr kaxyw mẽ pijapu xã hã arĩgro kukamã mẽ ho pikuprõnh o pa.

Jejus kot amnhĩ kwÿjê mã kapêr ã harênh

15Tã nhũm Jejus pika hkôt hkrajaja arĩ mẽ htĩr nê pa xwÿnhjê mã kapêr nê mẽ kãm:

E mẽ inhma ixkwÿjaja. Akupÿm ixte mẽ awÿr ixwrÿk xã hã arĩgroja ã kot paj te mẽ àhkĩnh xwÿnh kot amnhĩ nhĩpêx pyrà nê mẽ ajaêr pê mẽ awÿr wrÿ. Jakamã kêr ka mẽ amnhĩ wÿr ijamãr rãhã ho apa. Kêr pa akupÿn wrÿ ka mẽ amnhĩ wÿr ixpumu nê akĩnh nê amnhĩ kamã amã ixpuma hkêt nê. Anê.

Mẽ kot axpên kurê kaxãr kaxyw mẽ pikuprõnh ã mẽ harênh

16Tã nhũm Satanasti hkwyjaja pika piitã hkôt mẽ ho amnhĩptãr xwÿnhjê ho pikuprõnh pa nê mẽ hkurê kaxãr kaxyw ma Ijaew kot kãm “Amaketõ” jarênhja wÿr mra.

17Hãmri nhũm Tĩrtũm kapêr o mẽ wrÿk xwÿnh pê 7 kot hitepta õ xijere py nê kãx mã kamã mẽmoj kapĩr pa. Jakamã nhũm Tĩrtũm nhõrkwy kamã mẽ ho amnhĩptãr ã hkrĩ xã rũm Tĩrtũm kãx pê kapêr o:

—E hãmri. Na pa ra mẽ kot amnhĩ tomnuj mÿrapê tanhmã mẽ ho jatur xãm mênh kaxyw. Anê.

18Pu nhũm na hkatõtõk nê hkrakrak nê haxênh nhũm pika httertet tÿx nê. Aa mẽ kot pika httertet tÿx kot anhÿr ã omunh kêt kumrêx.

19Jakamã nhũm Papirõnja kajê axkrunêpxi. Papirõn nhõ xwÿnhjaja kot amnhĩ tomnuj tÿx o paja mÿrapê nhũm Tĩrtũm ã mẽ hipêx anê. Nê pika httertet o pika piitã hkôt krĩ grãnh pa. 20Nhũm gõ hipõk piitã gõja hã axkamur nhũm hapêx pa. Nê kên prêk nê hkrã hixêt rôrõk nê hpigrãnh pa. Pika httertet tÿx kumrêx jakamã ã mẽmoj amnhĩ nhĩpêx anê. 21Nê na mẽ pê jêr krã jakootija mẽ piitã mẽ hipy rôrõk. No



Apokarip 16.21

ãm hkrã hkryre hkêt hkrã rûnh kumrêx. ãm hpÿnh nê kamã kêp 40 kir nê mê hã rôrôk nhùm mê tee ri amnhĩ tã ã omu nê Tĩrtũm kamã gryk tÿx nê haprÿ nê ho kapêr punuj nê.

Tĩrtũm kra hkêt xwÿnhjê jarênh

17 ¹Tã pa pre kê axte mẽmoj pumu. Nhùm kot xijere jamÿnh xwÿnhjê hõja ixwÿr tẽ nê inhmã:

—E ma ixkôt tẽ nê mẽmoj pumu. Anê.

Hãmri pa kuma nê ma hkôt tẽ nhùm inhmã:

—Nà ahpÿnhã gô rax mÿri krĩ nhõ xwÿnhjaja te ho ni hkuprÿ gô mÿ ri ÿr nê kãm mẽmyjê piitã hkĩnh o ÿr xwÿnhhta pyrãk. Na htem urãk nê Tĩrtũm kapêr kôt ri amnhĩ nhĩpêx kêt nê. ãm htÿx ri tanhmã amnhĩ tomnuj to ho pa. Jakamã koja Tĩrtũm tanhmã mẽ homnuj tÿx to nê mẽ ho hapêx. ²Krĩ piitã hkôt mẽ ho amnhĩptãr xwÿnhjaja na hte ma mẽ õ krĩ hwÿr mra nê te mẽ kot mẽ hkuprÿjê ho amnhĩkati pyrãk o amnhĩ nhĩpêx. Nê te pipãnh nê htÿx ri amnhĩ nhĩpêx pyrãk o amnhĩ nhĩpêx o pa. Nhùm krĩ nhõ xwÿnhjaja mẽ urãk nê amnhĩ krã hkôt pix mã tanhmã amnhĩ tomnuj to ho ri pa. E ma ixkôt tẽ nê ja hã mẽ omu. Anê.

³⁻⁴Hãmri nhùm Tĩrtũm Karõ tanhmã ixto nhùm kapêr o wrÿk xwÿnhja ma kapôt wÿr ixto mõ pa kapôt ã mrymnuti hkrã kêp 7 nê kamã hpàr kêp 10 xwÿnhhta pumu nhùm hkamrêeti nê xa. Nê ï piitã hã tanhmã Tĩrtũm o kapêr punuj to hã kagà. Nhùm katut ã mēhõ ni kuprÿta nhÿ. Mẽ ho amnhĩptãr xwÿnh ã mẽ ê kakrã htyk nê hkamrêk o hkukàr jaxà nê hã nhÿ. Nê ôr o ôkrexê. Nê ôr o hinwÿÿxê nê ïhkra kamã kàx. ãm ôr pix o hikukrêx. Nê kên mex karÿr pix o amnhĩ jamrêx. Nê ôr o kopti hõ py nê hã nhÿ. Kopti kamã ni kuprÿ kot amnhĩ tomnuj xà. ãm kot mẽ kêp mẽ mjên o amnhĩkati ho pa xà pix nhùm kupy nê o nhÿ.

⁵Nê ôkrã hã amnhĩ nhĩxi hã kagà kot:

Inhĩxi pimxur pê PAPIRÕN RAXTI.

Nê ixpê mẽ kêp mẽ mjênjê ho amnhĩkati ho mẽ pa xwÿnhjê nã na pa.

Nê ixpê mẽ kot axpên prõ ho amnhĩkati o mẽ pa xwÿnhjê nã na pa. Nê ixpê mẽ kot Tĩrtũm nê mẽ kãm hêx o ri mẽ pa xwÿnhjê nã na pa.

Nê ixpê mẽ kot Tĩrtũm kapêr kôt amnhĩ nhĩpêx o pa hkêt xwÿnhjê nã na pa.

Anhÿr o ôkrã hã amnhĩ nhĩxi hã kagà kot anhÿr. ⁶Nhùm axpã nê nhÿ pa omu. No ãm kagõxÿhti ho hpipãnh kêt. Mẽ kot Jejus kôt amnhĩ xunhwÿr nê ri mẽ kãm Jejus kêp mẽ õ pahшти hã harênh xwÿnhjê kamnhwÿr o mẽ hpar nhùm mẽ hkamrõ pikapĩr xwÿnhjê kamrõ ho na pre axpã nê nhÿ. Pa ã kot amnhĩ nhĩpêx anhÿr ã omu nê tee ri ijamaxpêr.

⁷Hãmri nhùm Tĩrtũm kapêr o wrÿk xwÿnhja inhmã:

—Kwa mon ka ri ja pumu nê tee ri ajamaxpêr? E kot paj ixprî hã amã harê ka inhma. Niti mē hã ỹr xwỳnh pē mrymnutita. Krã pē 7 nê kamã hpàr pē 10 xwỳnhhta kot paj ixprî hã amã hamē wa harê ka wa harēnh ma.

8—Nà mrymnutija na pre htír nê ri pa tã ty nê ahkre xupỳmti kamã hikwỹ. Nom koja akupỹm htír nê kurũm kato nhũm mē piitã omu nê ahpỹnhã tanhmã hamaxpêr to. Amnepê mormã amrakati ri Tirtũm kot õ kagã kamã mē htír tũm nê mē pa mã xwỳnhjê nhĩxi jaxwỳr xwỳnhjaja koja kator ã omu nê ãm omu nê tanhmã hamaxpêr to hkêt nê. No mē kot Jejus kôt amnhĩ xunhwỳr kêt xwỳnhjaja koja mē amnhĩ jaêr pē akupỹm kator ã omu nê tee ri hkukamã hamaxpêr. Hãmri nê axpên mã: “Kwa amnepê m htyk tã ra tanhmã amnhĩ to nê akupỹm htír nê api nê mō.” Anhỹr o axpên mã harê. Hãmri nhũm kato nê ma tē nhũm Tirtũm tã ho hapêx kumrêx nhũm hapêx o hapêx.

9—Kwa inhma nê jam ajamaxpêr tỳx nê. Mrymnuti krã pē 7ta te kêp hixêt prêk pē 7 pyrã nê hã ỹr xwỳnh ni kuprỳta te hixêt prêk pē 7ta ã ỹr pyrãk.

10—Nê mrymnuti hkrã pē 7ja te kêp mē ho amnhĩptàr xwỳnh pē 7 pyrãk. Nhũm mē ho amnhĩptàr xwỳnhjaja te mē kêp 5 nê ra htyk pyrãk nhũm hkôt hõja arĩ mē ho amnhĩptàr o pa. No kot hitepta kormã. Nom koja mē ho amnhĩptàr ry hkêt nê.

11—Mrymnuti htír nê pa htã htyk nê ra akupỹm htír nê àpir xwỳnhhta koja hkrã hitepta pãnhã mē ho amnhĩptàr o pa. Jakamã te mē ho amnhĩptàr xwỳnh pē 7jê hõ pyrãk. Koja hkrã pē 7ja mē ho amnhĩptã nê gaa nê htyk mē nhũm hpãnhã mrymnutita hpãnhã mē ho amnhĩptã. Hãmri nhũm rĩ kormã Tirtũm tã mē ho hapêx par kumrêx.

12—Nê ate mrymnuti hkrã kamã pàr pē 10 pumunh xwỳnhhta te mē kêp mē ho amnhĩptàr xwỳnh pē 10 pyrãk. No ãm jaja na kormã mē ho amnhĩptàr kêt nê. Koja mē nhỹrmã anhĩpê mrymnuti nhỹ hã ahpỹnhã ri mē ho amnhĩptàr o pa nom mē ho amnhĩptàr japjê hkêt nê. 13Koja mē tanhmã ja hã axpên mar to hãmri nê mrymnuti mã anê nhũm mē hpãnhã mē piitã mē ho amnhĩptã.

14—Nê mē ho amnhĩptàr xwỳnh pē 10jaja koja mē pahte amnhĩ tomnuj pãnhã amnhĩrer xwỳnh kurê kaxàr kaxyw hwỳr mra nê kutã pijapu ho kuhê. No ãm tee ri kãm tanhmã ho hprãm hkaprỳ nhũm mē ho axtem nê amnhĩ tã mē himex pa. Hihtỳx o hiltỳx o kot mē ho hpimràatã mē hakrenh par. Nê kêp pika piitã hkôt mē ho amnhĩptàr xwỳnhjê nhõ Pahihti. Tãm na pre amnhĩ wỳr mē kot hkôt amnhĩ nhĩpêx o mē pa xwỳnhjê wỳ nhũm htem amnhĩ kaxyw hkôt hamaxpêr mex rãhã ho pa. 15—Nê krĩ pē Papirõn kapem gô xohtô mỳ ri ni kuprỳ hkrĩ xwỳnhhta. Gô xohtõja te kêp ahpỹnhã ri pika piitã hkôt mē uro hkwỹ pyrãk. Nê te ahpỹnhã ri mē kapêr xwỳnh kwỹ pyrãk.

16—Nē mrymnuti hpàr pê 10ta kēp mē ho amnhīptàr xwỳnh pê 10 pyràk. Jakamā koja mē kām ni kuprỳta prām nōkati nē kamā gryk tỳx kumrēx. Hāmri nē hwỳr mra nē kēp hikukrēx piitā utā nē kēp ê hkwrỳnh pa nhũm hkēnh mex nē xa. Hāmri nhũm mē kupī nē ĩ hkrēr pa nē kuwy kamā hi rē nhũm kaxàr pa nē hapêx.

17—Na pre pahi pê 10jaja mrymnuti hkôt amnhī xunhwỳ nhũm Tirtũm âm ja hā mē omu nē tanhmā nē mē kām nē hkēt nē. Jakamā koja mē âm hkôt pix mā amnhī nhīpêx o pa rāhā nhũm Tirtũm mē ho hapêx. Nē mē ô krī mē mē ho hpimràatā mē ho hapêx pa. Hāmri nē mē ho hapêx o mē ho hapêx.

18—Nē ate mēhō ni kuprỳ pumunh xwỳnhhta te kēp krī rax pê Papirōn nhō xwỳnhjê pyràk. Nē mē ho amnhīptàr xwỳnhja pika piitā hkôt mē ho amnhīptàr xwỳnhjê hkrāhtũm na. Anē.

Ā Tirtũm kapēr o mē wrỳk xwỳnhja inhmā mē harēnh anē. Pa kuma nē ô ri mē amā hā kagà. Mē ate kamā harēnh nē aprī hā mar tỳx kaxyw.

Tirtũm kot Papirōn grānh par ā harēnh

18 ¹Tā pa kê axte mēmoj pumu. Nhũm axte Tirtũm kapēr o mē wrỳk xwỳnhjê hōja kaxkwa rũm ahpār mā wrỳk o tē. Tirtũm nhỹ hā hihtỳx nē kamā hirā rax kumrēx o pika piitā hkôt mē kām hirā pa. ²Nē ahpār mā tēn wrỳ nē kàx pê kapēr o:

E koja Papirōnja pigrānh pa nē hpānhā kēp Satanasti mā mē àpēnh xwỳnhjê papxà nē kēp nhōnhti papxà. Hāmri nē aa kamā mēmoj mex kēt kumrēx.

³ Krī nhō xwỳnhjaja na htem Tirtũm kapēr kôt amnhī nhīpêx kēt nē amnhī krā hkôt kām prām xà hkôt pix mā tanhmā amnhī tomnuj to ho pa. Te mēhō pipānh nē htỳx ri amnhī nhīpêx o pa pyràk.

Nhũm krī piitā hkôt mē ho amnhīptàr xwỳnhjaja mē hwỳr mra nē mēnijê ho amnhīkati ho pa.

Nē krī nhō xwỳnhjaja mēmoj pumu nē kām hkīnh nē haprôr kurê kumrēx o pa nē aa ujaprôr o hapêx kēt nē.

Jakamā na hte krī hkwy nhō xwỳnhjaja mē hwỳr mēmoj to pa nē xatā mē kām ho wēnê nē mē kukwak ri mē hikàxpore rũnh nē pa.

Anhỹr o kapēr. ⁴Hāmri nhũm Tirtũm Papirōn kamā hkrajê mā kapēr nē mē kām:

E mē tokyx mē kot ri htỳx amnhī nhīpêx xwỳnhjê nhō krīta rũm ajapôj ixkrajaja.

Kot kaj mē anhỹr kēt nē ra mē hkôt amnhī nhīpêx pa mē ato apimràatā mē ate amnhī tomnuj ā mē atomnuj tỳx nē.

⁵ Krī nhō xwỳnhjaja na htem amnhī tomnuj rũnh o pa.

Mě kot amnhĩ tomnuj xà te mẽ kot kēn katutxô nhũm hprêk rax
o kot kaxkwa kanhwỳr kaxyw pyràk.

Na pa hte ã mẽ kot amnhĩ nhĩpêx anhỳr ã mẽ omunh rãhã ho ri
ixpa. Jakamã kwa ixkrajaja mẽ tokyx mẽ kurũm ajapôj.

Anhỳr o hkrajê mã kapêr. Hãmri nê kapêr o mẽ wrỳk xwỳnhjê mã
kãm:

6 E kwa mẽ ma mẽ hwỳr wrỳ nê tanhmã ixkrajê hã mẽ ho.

No âm kêr ka mẽ tanhmã mẽ ho htỳx o mẽ kot ra tanhmã ixpê
ixkrajê nhĩpêx tota jakre.

Kê mẽ tanhmã ixpê mẽ ho grire htã ka mẽ hã tanhmã mẽ ho htỳx
kumrêx o mẽ kot mẽ hipêxta jakre.

7 Krĩ nhõ xwỳnhjaja na prem mex nê pa.

Nê mẽ hikukrêx rũnh nê hkĩnh nê pa.

Nê tanhmã amnhĩ to jarkrar to ho ri pa nê amnhĩ jarênh o:

“Ot pa mẽ te pahi ni kot amnhĩ nhĩpêxta pyrã nê ixkrĩ xà mex pix
kãm ixkrĩ pyràk.

Nê te Tĩrtũm kot amnhĩ nhĩpêx pyràk o na pa htem amnhĩ
nhĩpêx o ri ixpa.

Nê mẽ ixkĩnh nê mẽ inhmex rãhã ri ixpa.

Ã mẽ ixte amnhĩ nhĩpêx anhỳr xwỳnh na pa mẽ.”

Anhỳr ã amnhĩ to jarkrar o pa.

Tã kêr ka mẽ tanhmã mẽ homnuj to kê mẽ mexta pãnhã omnuj
tỳx nê pa.

Nê kê mẽ hkaprĩ nê amnhĩ xà htỳx kãm hamak rãhã nê pa ho pa.

8 E kê mẽ ã amnhĩ nhĩpêx anhỳr o pa.

Jakamã koja mẽ arĩgro hpỳnh kãm mẽ hkwyjaja hpikaprãr rũnh
nê nhũm arĩ mẽ htĩr xwỳnhjaja omnuj nê pa.

Nê tee ri amnhĩ pumu nê hkaprĩ xàj mỳr o pa.

Nê amnhĩ xà htỳx kãm hamak o pa.

Nê tee ri amnhĩ nhĩpêx o pa.

Nê kãm prãm nê pa rãhã ty nhũm kuwy mẽ ho hkaxàr pa.

Ixpê Pahi Maati Tĩrtũm kot paj ixihtỳx kãm ã mẽ hipêx anê. Anê.

9 Hãmri nhũm krĩ piitã kurũm mẽ ho amnhĩptàr xwỳnhjaja. Mẽ kot mẽ
hwỳr mrar nê mẽ hkuprỳjê ho amnhĩkati nê mẽ uràk nê mẽmoj pumunh
nê haprôr rãhã ho pa xwỳnhjaja tee ri krĩ kaxàr nê kax mã kuwy hkũm
àpir o paja pumu nê hkaprĩ nê mỳr o kuhê.

10 Nê Tĩrtũm kot mẽ ho hapêx par ã mẽ omu nê kãm ma htỳx kumrêx.
Amỳm mẽ omunh o kuhê nê tee ri amnhĩ kukamã hamaxpêr nê htetet
tỳx nê. Nê mỳr kãm kapêr o:

Hêxta waa nê Papirõn nhõ xwỳnhjaja.

Mẽ amex nê axihtỳx mex nê apa htã nhũm Tĩrtũm mẽ anhĩmex
pa. Hêxta waa nê. Anê.

11 Nê mē hwÿr mrar nê mē kām mēmoj to wēnê ho mē pa xwÿnhjaja haxwÿja krĭ pumu nê tee ri amnhĭ kukamã hamaxpêr nê hkaprĭ nê mÿr o kuhê. Nhÿri koja mē tokyx axte mēmoj to wēnê? Mē kêp mēmoj japrôr rŭnh xwÿnhjaja hkaxàr par kumrêx kênã.

12 Na prem mēmoj piitã ho pa nê mē kām ho wēnê. Mēmoj mex piitã. Ôr o mē hkukrêx nê prat o mē hkukrêx nê kên jaxênh ã kàxpore xohtôô. Nê kupêxê mex. Kakrã htyk nê hkamrêk nê hkroore nê hã hapjê. Nê mēmo pĭ kuxware nê pĭ htÿx nê kên jakàr nê kàx o ri mēmo nhĭpêxja



Apokarip 18.11-13

nhŭm prem mē kām ho wēnê ho pa. 13 Nê mēmo htwÿm nê mē hkuxwa xà. Nê mē ô ho ành xà nê mē ô kuxwa xà nê xwÿgrà nê harôj. Nê môx nê ôwêhti nê kawar nê kaxyw kawarti hkjênh xà hã karrotre. Nê nhÿhÿnh krĭ hō kamã panhĭ hkwy pynê nê mē hwÿr mē o pa nê mē kām mē ho wēnê nhŭm mē amarĭ mē hkôt ri àpênh rŭnh o pa. Na prem ã mē kām mēmoj to wēnê anhÿr o pa. Tã ra mē kot mē haprôr xwÿnh mē mē pimràatã hapêx pa.

14 Jakamã nhŭm mē tee ri mē hkukamã hamaxpêr nê te kot mē kām kapêr pyrã nê mē kām:

Hêxta waa nê. Mē amã mēmoj prãm nê amnhĭm haprôr xwÿnhhta na mē apê hapêx par kumrêx.

Nê mē akàxpore rŭnh nê mē akukrêx rŭnhhta mē mē apimràatã ajapêx pa. Kot kaj mē axte tanhmã amnhĭ nhĭpêx to ho apa hkêt nê. Anê.

15 HãMRI nê amÿm ri Tĭrtŭm kot tanhmã mē hipêx to hã mē omu nê kām ma xàj mur nê httert o kuhê.

16 Nê mÿr kām kapêr o:

Hêxta waa nê. Na pre htem ê mex pix jagjê nê ri hã mra. Kakrã htykre nê hkamrêkre.

Nê mē hikukrêx mex o amnhĭ jamrêx nê ri hã mra.

Nê ôr nê kên mex ã ohtô xwÿnh o amnhĭ jamrêx nê ri hã mra.

17 Tã ra hapêx par kumrêx. Anê.

HãMRI nhŭm gô xujanãr kãm pàr nhô dôn nê mē kot mē kãm pàr o ri mrar xwÿnhjaja nê mē kot kamã tep pynênh xà ho tep pynênh o ri mē pa xwÿnhjaja nê pàr kãm amarĭ mē pa xwÿnhjaja hãMRI mē hwÿr mra nê wamtajê pyrã nê tee ri amÿm ri mē ô krĭ pumu nê mÿr o kuhê. 18 Nê

kurūm kuwy hkūm xàpir o pa hã omu nẽ tee ri mẽ hkukamã hamaxpẽr nẽ axpẽn mã:

Hêxta waa nẽ. Krĩ mũj na pre mex o mex. Mex o krĩ piitã hakrenh par htã hapêx pa. Anẽ.

19Hãmri nẽ mur nẽ hkaprĩ xàj pika hkwỳ jamỳ nẽ ho amnhĩ kamĩ nẽ mỳr kãm kapẽr o:

Hêxta waa nẽ. Krĩ mũj na pre rax o rax.

Nhũm pre nhỹhỹnh pàr kãm mẽmoj to wẽnê ho pa xwỳnhjaja mẽ hwỳr mẽmoj to pa nẽ mẽ kãm ho wẽnê nẽ mẽ hkukwak ri hikàxpore rũnh nẽ ri pa.

Tã hãmri mẽ hapêx pa. Anẽ.

20Hãmri nhũm Tirtũmja krajê piitã mẽ kãm kapẽr nẽ mẽ kãm:

E ixpê Tirtũm na pa ã mẽ hipêx anẽ.

Mẽ kot mẽ apê ixkrajaja tanhmã mẽ atomnuj to ho paja mỳrapê na pa mẽ atã ã mẽ hipêx anẽ.

Jakamã e kaxkwa kamã mẽ apê ixri mẽ apa xwỳnhjaja.

Nẽ mẽ ate inhỹ hã ri mẽ kãm ixkapẽr jarênh o mẽ apa xwỳnhjaja.

Nẽ Jesus nhỹ hã mẽ akapẽr o ri mẽ apa xwỳnhjaja. Mẽ apiitã mẽ apê ixkra na ka mẽ.

E mẽ amnhĩ tã ja pumu nẽ akĩnh nẽ axpẽn mã apikunhar o akuhê. Pa na pa mẽ atã ã mẽ ho ijapêx anẽ. Anẽ.

21Tã nhũm kapẽr o mẽ wrỳk xwỳnhjê hõja hihtỳx o kẽn rax kumrêxja mỳ nẽ o tẽ nẽ gô xujanãr kamã kãm gêt nẽ kumê nhũm mrõ nẽ akunok. Hãmri nhũm kapẽr o:

E krĩta koja Tirtũm te ho ixte gôx kãm kẽn mẽnũm nhũm mrõr nẽ hpikunor pyrãk o hipêx nhũm hapêx par kumrêx.

22-24 Na pre hte krĩja kamã mẽ kot ri mẽ kãm mẽmoj to wẽnê xwỳnhjaja amnhĩ to rũnh o krĩ piitã hkõt mẽ hakrenh pa.

Nẽ krĩ nhõ xwỳnhjaja na prem pika piitã hkõt hêx rom tanhmã mẽ no kupyra to ho ri pa. Jakamã ra mẽmoj to wẽnê xwỳnhjê pyrã nẽ mẽ hikukrêx rũnh gryk ã Tirtũm kaga.

No ãm ja pix kêt. Tirtũm krajê mẽ Tirtũm nhỹ hã kapẽr o mẽ pa xwỳnhjaja na prem mẽ himex rax nẽ. Hãmri nhũm krĩ piitã kamã mẽ pa xwỳnhjaja mẽ kot mẽ hipêx ã mẽ omu nẽ mẽ urak nẽ ã mẽ hipêx anhỹr o pa.

Tã Papirõn nhõ xwỳnhjaja kot mẽ hipêx anhỹrja mỳrapê koja Tirtũm mẽ himex par kumrêx.

Jakamã koja mẽ axte hkĩnh nẽ hkĩnh xàj ri grer kêt nẽ.

Nē axte hkīnh nē grer kām hakwa kôr o ri pa kêt nē.
 Nē axte ri wiorāw kakrēnh hkêt nē.
 Nē axte ri amnhīm kawà hyr o hkrī hkêt nē.
 Nē axte harôj kahuk o kuhê hkêt nē.
 Nē axte mẽ ôrkwỹ kamã kanê hpôk kêt nē.
 Nē axte axpẽn mã ri hkrajê rer o ri pa hkêt nē. Koja ã mẽmoj kot
 anhỹr piitã hapêx pa. Anê.

Mê kot Tĩrtũm mex ã mẽ harēnh

19 ¹Tã pa kê axte mẽmoj pumu. Nē kaxkwa kamã mẽ kapēr ma
 nhũm mẽ ohtô rax kumrēx nē tanhmã axpẽn mã kapēr to. Nē
 anhĩpê kàx pē kapēr tỳx nē kapēr o:

E pu mẽ pahpiitã Tĩrtũm mã mex o mex ã harē.

Tapxipix na hihtỳx o hihtỳx.

Nē tapxipix na àhpumunh o àhpumunh.

Nē tapxipix na mex o mex.

Tapxipix na mex o kot mẽmoj piitã hakrenh par.

Ra kot mẽmoj punuj pē mẽ papytār par jakamã kêp mẽ papytār
 xwỳnh ã pixi mex na.

2 Na hte amnhĩ jarēnh xà hkôt tanhmã mẽmoj to ho pa.

Nē amnhĩ to hêx kêt nē.

Tã ãm hãmri na ã Papirôn nhõ xwỳnhjê nhĩpêx anê.

Na prem mẽ kām Tĩrtũm kapēr jarēnh o mẽ pa xwỳnhjê nhĩmex
 rax kumrēx.

Nē krī piitã hkôt ri pa nē amnhĩ kôt mẽ kurē nhũm mẽ kuma nē
 mẽ hkôt amnhĩ tomnuj o pa.

Nhũm Tĩrtũm tee ri hã mẽ omu nē ã hkrajê hã mẽ hipêx kati anê.

Ãm hãmri na ã mẽ hipêx anê.

Anhỹr o axpẽn mã harē. ³Hãmri nē xatã axpẽn mã:

Nà ãm hãmri na ã mẽ panhõ Tĩrtũmja mẽ hipêx anê nhũm mẽ
 kurũm kuwy hkũm kàx mã àpir o pa.

Koja krī nhõ xwỳnhjaja amnhĩ xà htỳx kamã hamak rãhã ho pa
 nē aa à htỳx hapêx kêt.

E pu mẽ hã Tĩrtũm mã mex o mex ã harē. Anê.

4Hãmri nhũm mẽ àptār tũm pē 24 mẽ mẽmoj tĩr pē kwatjaja hãmri
 Tĩrtũm kot mẽ ho amnhĩptār ã hkrī xà maati kutã rôrôk nē kām hipô
 hpa. Hãmri nē ã mẽ kapēr anhỹr xwỳnhjê mã kapēr nē kãm:

Nà ãm hãmri na ka mẽ ã Tĩrtũm mex ã harēnh anê. E pu mẽ
 pahpiitã kãm mex o mex ã harē. Anê.

5Hãmri nhũm mẽhõja Tĩrtũm krī xà maati kamã kapēr o:

E mẽ axte Tĩrtũm mã mex o mex ã harē.

Mê ate Měpahpãm kôt amnhĩ nhĩpêx o mẽ apa xwỳnhjaja.

Nē mẽ apê mẽ ho amnhĩptàr xwỳnhjaja nē amarĩ ri mẽ apa
xwỳnhjaja nē mẽ apiitã mẽ ate Tĩrtũm ã apijaam o mẽ apa
xwỳnhjaja kãm mex o mex ã harê. Anê.

Kot mẽ pahpãnhã amnhĩrer xwỳnh mẽ hkwỳjê jarênh

6Tã pa tanhmã mẽ kapêr to hã mẽ kuma nhũm mẽ kàx pê kapêr tỳx
nê. Te mẽ ohtô rax kumrêx kapêr pyràk. Nê te gô koko htỳx rỳ na katôtòk
tỳx pyràk. Hãmri nê mẽ kapêr o:

E na ra Tĩrtũm kêp mẽmoj piitã ho amnhĩptàr xwỳnh.

Nê kêp mẽ panhõ Pahi Maati.

Nê hihtỳx o hihtỳx nê àhpumunh o àhpumunh.

E pu mẽ kãm mex o mex ã mãn harê.

7-8 Nê hã pahkĩnh nê.

Nê kãm hihtỳx o hihtỳx ã harê.

Te mẽ kot axpên mã mẽ rer xwỳnh kot amnhĩ nhĩpêx pyràk.

Jao mẽ pahte amnhĩ tomnuj pãnhã amnhĩrer xwỳnhhta te kêp
myja pyràk.

Nê mẽ kot hkôt amnhĩ nhĩpêx xwỳnh piitã te mẽ kêp nija pyràk.

Nê te mẽ kot axpên mã wa rer nhũm wa kot axpên kôt pa ho pa
pyràk o koja mẽ amnhĩ nhĩpêx.

Nê te mẽ kot mjên mã xwỳnh mã ê mex jakare nhõr nhũm kot
hagiênh pyràk. Nê ê mexja te mẽ kot tãm amnhĩ nhĩpêx xà
pyràk. Anê.

9Hãmri nhũm Tĩrtũm kapêr o wrỳk xwỳnhja inhmã:

—E Juãw. Pa amã mẽmoj jarê ka mar tỳx nê akwỳjê mã hã kagà.
Tĩrtũm kapêr kwỳ kot paj amã harê. Kêp Tĩrtũm kapêr jakamã ãm hãmri
na. Na hte mẽmoj jarênh o hêx kêt nê. E kapêr ã kagà ho:

Na htem axpên mã mẽ rer kaxyw nê amnhĩ wỳr hkwỳjê wỳ
nhũm mẽ hwỳr mra nê wa hã hkĩnh nê apkur mex nê.

Ja pyrà nê Tĩrtũm kot amnhĩ wỳr mẽ hwỳr xwỳnhjaja koja
mẽ nhỹrmã mẽ pahte amnhĩ tomnuj pãnhã amnhĩrer
xwỳnhhta wỳr api nê ã amnhĩ nhĩpêx anê nê hkĩnh nê
apkur mex nê.

Hãmri nhũm Tĩrtũm mẽ ho mex rax kumrêx. Anê.

—E kêr ka ã akwỳjê mã ja hã kagà anê Juãw. Anê.

Hãmri pa kuma nê kagà ja kamã mẽ amã hã kagà. 10Hãmri nê hã
kagà hpa nê ra ixte kãm mex o mex ã harênh kaxyw kutã ixkõn krã ho
têm nê nhỹ nhũm tee ri amnhĩ tã ixpumu nê inhmã:

—Kwa ã ri inhĩpêx anhỹr kêt nê. Apyrà nê ixte Jejus mã tanhmã
amnhĩ nhĩpêx to xwỳnh kênã. Jejusja apyrà nê kêp inhõ pahĩhti na. Jejus
kapêr na prem hkukamã mẽ kot Tĩrtũm nhỹ hã kapêr o mẽ pa xwỳnhjaja

hã kagà nê mẽ kãm harênh o pa. Jakamã kwa pu mẽ Tirtũm pix kutã mân pahkôn krã ho parôrôk nê pahkrĩ nê kãm mex o mex ã harê. Anê.

Kawar jaka hã ỹr xwỳnh jarênh

11-16Tã pa kê axte mẽmoj pumu. Nhũm kaxkwa axkjê nhũm kamã kawar jakajre xa nhũm mẽhõja hã nhỹ. Hixi na pre kêp “Aa kot Tirtũm kaga hkêt xwỳnh.” Anê nê hixi hõ na pre kêp: “Tirtũm kôt pix mã amnhĩ nhĩpêx o pa xwỳnh.” Anê. ã hixi kot anhỹr jakamã na hte katat kôt ahpỳnhã mẽ kot amnhĩ nhĩpêx ã mẽ omunh xà hkôt tanhmã mẽ harênh to. Mẽ kot amnhĩ to mex ã mẽ omunh xà hkôt tanhmã mẽ hkwyjê jarênh to nê mẽ kot amnhĩ tomnuj ã mẽ omunh xà hkôt ahpỳnhã tanhmã hkwyjê jarênh to. Na pre mẽ kot tanhmã hkwyjê nhĩpêx to ho pa xwỳnhjê kutã amnhĩ xunhwỳ nê mẽ hã tanhmã mẽ ho. ã na pre kawar ã ỹr xwỳnhja amnhĩ nhĩpêx anhỹr o pa.

Nê no te kot kuwy hpôk pyrãk jakamã hprĩ hã mẽmoj piitã omu nhũm mẽmoj kêp hpimxur kêt nê. Nê kêp pahi hã mẽ ahkà ho ohtô nê kutu. Nê nhỹhỹnh í hã hixi hõ hã kagà nom ãm tapxipix kot amnhĩ tã amnhĩ nhĩxija pumunh. Na pre ra amnhĩ kamrô ho ê xy hpa nê xa. Nê hixi hõ pê:

TIRTŪM KAPĒR O AMNHĪRĪT XWỠNH

Nê ê ryti hã hixi hõ hã kagà. Nê ihkjê hã ãm tãm. Hã kagà jarênh kot:

Ixpê mẽ ho amnhĩptar xwỳnh piitã mẽ õ Pahi Maati na pa.

Nê hakwa rũm wapo xwa gixre põm katon ajêt. Kot ho tanhmã mẽ kot Tirtũm mẽ wa kutã amnhĩ xunhwỳr xwỳnhjê nhĩpêx to kaxyw. Jakamã ra mẽ piitã mẽ ho pikuprõnh pa nê mẽ hipêx o te mẽ kot prês kãm uwa xô kagô janênh pyrãk nhũm mẽ hkamrô hpikapĩr rax kumrêx. Tirtũm xihtỳx xwỳnh kot mẽ kamã gryk tỳx jakamã nhũm ã kãm mẽ hipêx anê. Mẽ kot amnhĩ tomnuj o paja mỳrapê.

Nhũm õ pôristi piitã urãk nê kawar jakare hã hkrĩ nê hkôt ri pa. Mẽ ê jaka muxre jagjê nê hã ma hkôt ri pa.

17-18Tã pa axte Tirtũm kapêr o mẽ wrỳk xwỳnh õja pumu nhũm myyti kutã xa nê kàx pê nhônhti mã kapêr nê mẽ kãm:

—E mẽ amnê mẽ ixwỳr wrỳ nê Tirtũm ã akĩnh nê mẽ htyk nê mẽ hikwỹ xwỳnhjê hã atu nê aku. Mẽ ho amnhĩptar xwỳnhjaja nê pôristijaja nê mẽ hkrãhtũm nê kawar nê kawar ã mẽ hkrĩ nê ri mrar xwỳnhjaja nê mẽ kot amnhĩ to rũnh xwỳnhjaja nê mẽ kot amnhĩ to hkryre xwỳnhjaja. Nê mẽ kãm mẽ àpênh xwỳnhjaja nê amnhĩ mã ri mẽ àpênh xwỳnhjaja. ãm mẽ htyk nê mẽ hikwỹ xwỳnh mũj piitã mãmri mẽ hwỳr wrỳ nê mẽ hã atu nê mẽ aku. E mẽ tokyx nhônhti. Anê.

19Tã nhũm mrymnuti nê krĩ piitã hkôt mẽ õ pahi nê mẽ õ pôristijaja piitã axpên wỳr akuprô. Wam kawar jakare hã ỹr nê htêm xwỳnh mẽ õ

pôristijê hwÿr hprôt nê mē hkurê kaxàr kaxyw axpēn mar kaxyw akuprô.

20-21 Hāmri nê mē hwÿr mra nê mē hkurê kapa. No âm tee ri amnhî nhîpêx nê tee ri kām tanhmā mē ho hprām hkapyr nhūm wam kawar jakare hā ÿr nê htēm xwÿnhhta hakwa rūm wapo xwagixre kator o mē himex pa. Hāmri nhūm mē hkwyjê pyràn htyk pa nê hikwÿ. Nhūm nhônhti mē omu nê mē hwÿr wrÿk o mra nê mē kuku hāmri nê kām mē hkur kaga nê mē hkaga. No nhūm mrymnuti nê ÿ hā mē kām hêx o pa xwÿnhhta wa nhūm mē axtem nê htîr rāhā wa unê nê ma wa o tē nê êsôf o kuwy maati kamā wa kumê. Hāmri nhūm wa kamā htîr tūm nê hxêt rāhā nê pa ho pa nê aa htyk kêt nê.

Mê kot Satanasti hpa hpre hā mē harēnh

Wam Korît 15.20-28

20 ¹Tā pa kê axte mēmoj pumu. Nhūm Tirtūm kapêr o mē wrÿk xwÿnhjê hōja kaxkwa rūm wrÿ nê ahkre xupÿmti hpro xà ho htÿx xà hā safja py nê kàx pytihti ho mē hpre xàja ô py. ²⁻³Hāmri nê kagāmnuti pē hêx xwÿnh maati Satanastija pynê. Amnepēm Atāw mē Ewa wa kām hêx xwÿnhhta pynê nê kàx pytî o hpa hpre nê hte hpre hāmri nê ahkre xupÿmti nhîtom xà mē nê kamā kumê. Hāmri nê akupÿm hpro xà ho hpro nê saf o hā ho htÿx. Kot pika piitā hkôt mē kām hêx o pa pymaj ā hipêx anê. Kojā tokyx kator kêt ry rax kumrêx. Kojā kamā arî hkrî hā amgrà xohtô nê. Hā amgrà pē 1.000 nhūm rî kormā Tirtūm akupÿm kator nhūm kato nê ri pa. Nom pa hkrânre.

⁴Tā pa mē htyk nê akupÿm mē htîr xwÿnh kwÿjê pumu. Kormā mē htîr ri na prem Tirtūm kapêr kôt pix mā amnhî nhîpêx o pa. Nê Jejus kēp mē ô pahihti hā harēnh rāhā ho pa. Aa mē kot mrymnuti kutā hkônkrā ho rôrôk nê kām mex ā harēnh kêt. Nhūm prem tee mē ôkrā hā nê mē îhkra katut ā mrymnuti nhîxi nhîpêx kaxyw nom nhūm prem hkaga kamā hihtÿx nhūm prem kām mē hkurê xwÿnhjaja tee ri ja hā mē omu nê mē mut jakàr o mē kupa. Hāmri nhūm Tirtūm akupÿm mē ho mē htîr nê mē kot mē ho amnhîptār ā hkrî xà kamā mē hkrî. Jejus nhîhkô hā mē hkrî hā amgrà pē 1.000 kaxyw. ⁵Mê kumrêx na pre Tirtūm akupÿm mē ho mē htîr nhūm mē hkwyjaja mē hkînh ā arî ty nê hikwÿ hā amgrà pē 1.000 jakre nhūm rî kormā akupÿm mē ho mē htîr.

⁶Wam akupÿm mē htîr xwÿnhjaja kēp Tirtūm kra jakamā koja mē Tirtūm kra hkêt xwÿnhjê kurom hkînh nê pa ho pa. Nê mē kurom mē kot amnhî xà htÿx kamā hamak o pa htūm xà wÿr pa hkêt nê. Nê mē kurom Tirtūm mē Kra Jejus Kris wa kuri mex kumrêx nê wa kām tanhmā ri amnhî nhîpêx to ho pa. Nê Jejus nhîhkô hā mē ho amnhîptār o pa hā amgrà pē 1.000.

Tirtûm kot kuwy hwÿr Satanasti mênh ã harênh

7Tã koja amgrã pẽ 1.000 hapêx nhũm rĩ kormã Tirtûm kapêr o wrÿk xwÿnhja akupÿm ahkre xupÿm wÿr tẽ nẽ Satanasti mã kahê xã mẽ nhũm kato. 8Hãmri nẽ kê axte pika piitã hkôt tanhmã mẽ kãm hêx to ho ri pa. Gorti nhõ xwÿnhjê mã nẽ Makok nhõ xwÿnhjê mã nẽ krĩ piitã hkôt Tirtûm nẽ tanhmã mẽ kãm hêx to ho mẽ hkôt pa. Hãmri nẽ mẽ kot Tirtûm krajê kutã amnhĩ xunhwÿr nẽ mẽ hkurê kaxàr kaxyw amnhĩ kwÿjê ho akuprõ nhũm mẽ ohtô rax kumrêx nẽ axpên wÿr akuprõ. Te pikahti grã xohtô pyrãk.

9Hãmri nẽ ma Tirtûm krajê nhĩmex par kaxyw mẽ hwÿr mra nẽ mẽ õ krĩ mã hipòk pa nẽ kuhê. Mẽ õ krĩja Tirtûm mã mex tã nhũm mẽ kot kêp grãnh par kaxyw ma hwÿr mra. Hãmri nhũm kaxkwa rũm kuwy hpòkja mẽ haêr pẽ mẽ hã rôròk nẽ mẽ ho hxêx pa.

10No mẽ kãm hêx xwÿnh maati Satanastita nhũm Tirtûm kapêr o wrÿk xwÿnhja axte unê nẽ ma êsôf o kuwy maatita wÿr o tẽ nẽ kamã kumê. Ra mẽ kot kamã mrymnuti wa kot Tirtûm nẽ mẽ nokupyr o pa xwÿnh wa mênh tã wa hkôt Satanasti mã ho anê nẽ kamã kumê nhũm kamã pa ho pa. Kojã mẽ aa kator kêt kumrêx. Nẽ arĩ kamã amnhĩ xã htÿx kamã hamak rãhã nẽ pa ho pa.

Tirtûm kot ahpÿnhã tanhmã mẽ piitã mẽ harênh to kaxyw

Matêwre 25.31-46; Juãw 5.25-29

11Tã pa axte mẽmoj pumu nhũm kaxkwa mẽ pikaja wa ra hapêx pa. Pa Tirtûm kot tanhmã mẽ piitã mẽ harênh to hã hkrĩ xã raxja pumu. Nhũm hakajre nhũm Tirtûm kamã nhÿ.

12-13Hãmri nhũm ra mẽ htyk nẽ mẽ hikwÿ xwÿnh piitã akupÿm hapôx pa nẽ Tirtûm kot tanhmã mẽ harênh to hã hkrĩ xãta kutã hkrĩ pa. Mẽ piitãã. Mẽ kot amnhĩ to rũnh xwÿnhjaja nẽ mẽ kot amnhĩ to hkryre xwÿnhjaja nẽ mẽ ho amnhĩptàr xwÿnhjaja nẽ gô xujanãr kãm mẽ mrõr nẽ mẽ htyk xwÿnhjaja. Ra mẽ htyk nhũm mẽ kot mẽ hagjênh xwÿnhjaja piitã mẽ htykjê papxã rũm hapôx pa nẽ Tirtûm kutã ohtô ho ohtô nẽ hkrĩ. Hãmri nhũm Tirtûm õ kagã py nẽ kamã mẽ piitã mẽ hixi japêr. Kagã kamã ra mẽ hkukamã mẽ htĩr tũm nẽ mẽ pa ho mẽ pa mã xwÿnhjê nhĩxi japêr. Nẽ kagã hõ kamã mẽ htĩr ri tanhmã mẽ kot amnhĩ nhĩpêx to ho pa hã mẽ piitã mẽ hã kagãja. Nhũm kupy nẽ kamã tanhmã mẽ harênh to nẽ hkôt hprĩ hã mẽ piitã mẽ omunh pa nẽ rĩ kormã ahpÿnhã tanhmã mẽ harênh to.

14-15Hãmri nẽ mẽ htĩr tũm nẽ mẽ pa mã xwÿnhjê nhĩxi hã kagãja kamã tee ri mẽ hkwyjê nhĩxi japêr nhũm kamã amrakati. Jakamã nhũm mẽ ma kuwy maatita wÿr mẽ o mra nẽ kamã mẽ rênh pa. Te axte mẽ htyk nhũm mẽ kot kuwy kamã mẽ hagjênh pyrãk nhũm mẽ kamã rôròk

ně tee ri amnhĩ xà htỳx kamã hamak rãhã nẽ pa ho pa nẽ aa kator kêt kumrẽx.

Pika mẽ kaxkwa wa nyw jarẽnh

Sikũn Pêtre 3.8-13

21 ¹Tã pa axte mẽmoj pumu. Nhũm Tĩrtũm ra pika mẽ kaxkwa nyw wa ho kato. Ra pika nẽ kaxkwa nẽ gô xujanãr tũmja hapêx pa nhũm kaxkwa mẽ pika nyw wa ho kato. Nom axte gô xujanãr o kator kêt nẽ.

²Hãmri nhũm Tĩrtũm nhõ krĩ mex pẽ Jerujarẽ nywja tanhmã amnhĩ to nẽ pika nyw wỳr wrỳk o mỗ. Krĩa mex kumrẽx. Mex o mex. Te mjên mã xwỳnh ê mex jaxàr nẽ amnhĩ to muxre nẽ mjên wỳr htẽm pyrà nẽ pika nyw wỳr mex kumrẽx nẽ wrỳk o mỗ.

³Hãmri nhũm Tĩrtũm kot mẽ ho amnhĩptàr ã hkrĩ xà maatija kamã mẽhõja kapẽr o:

— Nà ãm hãmri. Na ra Tĩrtũm hkrajê hkôt pa ho pa. Pika nyw kamã mẽ hkôt pa ho pa nhũm mẽ tã no ho omu nẽ hkôt pa ho pa rãhã nẽ. Nà ãm hãmri. Ja mex o mex.

⁴—Koja hkrajaja hkôt pa ho pa nẽ axte htyk kêt kumrẽx. Nhũm Tĩrtũm mẽ nê mẽ no kagô nhĩnhĩnh pa nhũm mẽ axte hkaprĩ nẽ mỳr kêt nẽ. Nẽ ri axte amnhĩ xà kamã hamak kêt nẽ. Nẽ axte ri tanhmã omnu hto hkêt nẽ. Ra mẽ hkaprĩ nẽ à nẽ mỳr o pata hapêx par kumrẽx nhũm hpãnhã mẽmoj nyw pix. Anẽ.

⁵Hãmri nhũm Tĩrtũm tãm tanhmã inhmã kapẽr to. Krĩ xà maati kamã ỳr xwỳnhhta tãm inhmã kapẽr o:

— E na pa ra akupỳm mẽmoj piitã ho nyw pa. Jakamã e Juãw. ãm hãmri na pa ã amnhĩ kukamã amã mẽmoj jarẽnh anẽ. Ixêx kêt. Jakamã kêt ka akwỳjê mã piitã hã kagà hpa. Kê mẽ kamã harẽ nẽ tokyx kuma nẽ hkôt hamaxpẽr rãhã ho pa.

⁶—Ra ixte amnhĩ kukamã mẽmoj mã ijamaxpẽr xwỳnhja na pa ra ho anhỳr pa. Ixpê mẽmoj piitã ho anhỳr o hkrax xwỳnh nẽ mããnẽn ixpê mẽmoj piitã ho ijapêx par xwỳnh. Nẽ ixrãhã ixpa xwỳnh. Amnepêm kormã mẽmoj kator kêt ri na pa pre ixrãhã ixpa. Nẽ ot pa arĩ ixrãhã ixpa. Tã mẽ kãm kôr nẽ kãm gô hkwy ho hkõm hprãm xwỳnhjê pyrà nẽ mẽ kãm ixpix prãm xwỳnhjaja kot paj te mẽ kãm inhõ hino rũm gô hkwy nhõr nhũm mẽ kot ho hkõm pyràk o mẽ hipêx. Hãmri nhũm mẽ htĩr tũm nẽ ixri pa ho pa nẽ axte htyk kêt nẽ. Kot paj ã mẽ hipêx mex anẽ.

⁷—Mẽ ate tanhmã amnhĩ tomnuj to nẽ amnhĩ to htỳx nẽ ixkôt pix mã amnhĩ nhĩpêx o mẽ apa rãhã mẽ atyk xwỳnhjaja kot paj ã mẽ anhĩpêx mex anẽ. Ka mẽ apê ixkra hã amex nẽ ixkôt ri apa rãhã ho apa. Pa ixpê mẽ anhõ Tĩrtũm ã tanhmã mẽ ato mex to rãhã ho ixpa.

8—No mẽ kot amnhĩ kaxyw ixkõt hamaxpër kêt xwỳnhjaja. Nẽ mẽ kot amnhĩ tomnuj xwỳnhjaja nẽ mẽ kot ri mẽ hpar prãm xwỳnhjaja. Nẽ mẽ kot nhãm ri mẽnijê ho amnhĩkati xwỳnhjaja. Nẽ wajağajaja. Nẽ mẽ kot amnhĩ to sãnti hwỳr o pa xwỳnhjaja. Nẽ ri mẽ hêx nhi xwỳnhjaja. Ả mẽ kot amnhĩ nhĩpêx anhỳr xwỳnh piitã koja mẽ apê ixkrajê hkĩnhã ma kuwy maati wỳr hapêx par kumrêx. Te axte mẽ htyk pyræk nom koja mẽ axte htyk kêt nẽ. Anẽ.

Jerujarẽ nyw jarẽnh

Sikũn Korõt 6.16; Karatas 4.26; Eprêw 12.22-24

9Tã nhũm mẽ kot xijere pê 7 kamã Tĩrtũm gryk xà jamỳnh xwỳnhjê hõja hãmri ixwỳr tẽ nẽ inhmã:

—E ma ixkõt tẽ nẽ mẽmoj pumu. Na ra krĩ nywja pika nyw wỳr wrỳk o mỗ. Te mjên mã xwỳnh ê mex jaxàr nẽ amnhĩ to muxre nẽ mjên wỳr htêm pyrà nẽ mex kumrêx nẽ kaxkwa rũm pika nyw wỳr wrỳk o mỗ. Nẽ kot ho mjên mã xwỳnhta te mẽ pahte amnhĩ tomnuj pãnhã amnhĩrer xwỳnhta pyræk. E tokyx tẽ nẽ omu. Anẽ.

10Hãmri nhũm Tĩrtũm Karõ tanhmã ixto pa ma kot inhmã kapêr xwỳnhta kõt tẽ nhũm ma ixto mỗ nẽ kên krã hprêeti hwỳr ixto api nẽ himõk ã ixãm. Pa Tĩrtũm nhõ krĩ mex pê Jerujarẽ nywja pumunh o xa. Nhũm mex o mex. Ảm hãmri te mjên mã xwỳnh kot ê mex jaxàr nẽ amnhĩ to muxre nẽ mjên wỳr htêm pyrà nẽ ahpap mã wrỳk o mỗ pa ixprĩ hã omu.

11Na pre rax o rax nẽ mex o mex. Tĩrtũm kamã pa ho pa jakamã nhũm kamã hirã htỳx kumrêx. Te kên mex ã kàxpore xohtô jaxênh mex tỳx pyræk.

12-13Nẽ krĩ puhã kahêja hprêk rax nẽ. Nẽ hwỳr mẽ gjêx xà kêp 12. Na pre myt japôx xà rũm axkrunêpxi. Nẽ myt gjêx xà rũm haxwỳja axkrunêpxi. Nẽ akutã kahpa hkôt haxwỳja axkrunêpxi. Nẽ ahpỳnhã hakwakre hã Tĩrtũm kapêr o wrỳk xwỳnhjaja hamãr o kuhê. Nẽ hakwa kre piitã hã Ijaew pê ahpỳnhã mẽ pikjêr kãm mẽ kêp 12jaja mẽ hixi hã kagà.

14Nẽ kahê xunhwỳr xà hkukamã kên pytyrja ahpỳnhã kêp 12. Kên pytyrta ã na mẽ kot Jejus nhỹ hã mẽ ahkre o mẽ pa xwỳnh maati pê 12jê nhĩxi hikwỹ.

15Tã nhũm kot ixto mỗr nẽ inhmã mẽmoj jahkre xwỳnhta ôr o mẽmo pĩ py nẽ kot ho krĩ ho mĩdi kaxyw xa. Nẽ ho kahê piitã ho mĩdi kaxyw. Nẽ mẽ gjêx xàja ho mĩdi kaxyw.

16-17Hãmri nẽ ho mĩdi hpa. Krĩja ry nẽ kahpa piitã axpên pyræk. Nẽ hprêk piitã mããnên axpên pyræk. Kamã mẽmoj piitã ahpỳnhã kêp 2.200 kirõm. No puhã kahêja hprêk o 64 met pix nẽ.

18Nẽ kahêja kên jaxênh pix o kot amnhĩ nhĩpêx jakamã mex o mex. Nẽ hkarỳr tỳx kumrêx. Nẽ kahê hkre kamã krĩ kamã ahpỳnhã ri ixkreja ôr pix o kot amnhĩ nhĩpêx. Nẽ piitã hkarỳr tỳx.

19-20 Nē kahê xunhwÿr xà hkukamã kën pytyrta ahpÿnhã ri kën mex pix o kot amnhĩ nhĩpêx. Piitã mex kumrêx nē hkarÿrti.

Wamta kawax pê grãgrãre.

Nē hkôt ja kawax pê grãgrã kakrã htyk.

Nē hkôt ja kakrã htyk.

Nē hkôt hõja grãgrã karÿr.

Nē hkôt ja hkamrêk pihkãrti.

Nē hkôt ja grãgrã kakrã htyk.

Nē hkôt ja hkamrêk tÿx kumrêx.

Nē hkôt ja ràràare.

Nē hkôt ja grãgrã mẽ pihkàr.

Nē hkôt ja ràràr mẽ pihkàr.

Nē hkôt ja grãgrã karÿÿre.

Nē hkôt ja kakrã htyk pihkàr.

Ã kën pytyr mex kot anhÿr.

21 Nē mẽ giêx xà hã hakwakre kahê xà pê 12ja mẽmo kën jakooti rũnh kumrêx pix o. Nē krĩ kahti hkôt pry nhĩkwÿ xwÿnhja ãm ôr pix o. Nē hkarÿÿre.

22 Pa pre tee ri krĩ kamã Tĩrtũm mã amnhĩ jarênh xà hã ixkre japêr nhũm amrakati. Mo kaxyw koja mẽ axte ixkreja hwÿr mra? Ra Pahi Maati Tĩrtũm xihtÿx xwÿnh mẽ mẽ pahte amnhĩ tomnuj pãnhã amnhĩrer xwÿnhhta ra hkrajê kamã pa ho pa kênã kot kêt mẽ axte ri ixkreta o presija. Koja mẽ kãm wa mex ã wa kãm harênh prãm nē nhÿri tãm wa hwÿr mra nē ã wa kãm kapêr anê. Te mẽ pahte pahi hwÿr pamrar nē kãm pakapêrta pyrã nē wa hwÿr mra nē wa kãm kapêr.

23 Nē koja krĩja kamã myyti nē mytwrÿre hkêt. Mo kaxyw kot kêt myyti nē mytwrÿreja arĩ ri hirã ho pa? Krĩ kamã Tĩrtũm pa ho pa jakamã kamã hirã mex kumrêx. Nē mẽ pahte amnhĩ tomnuj pãnhã amnhĩrer xwÿnhhta haxwÿja kamã pa ho pa. Te kêp kanê hpôk rax kumrêx pyrã nē hirã mex o pa. Kot hirã mex o kot myyti jakrenh. Ã Tĩrtũm mẽ Kra wa krĩja kamã pa ho pa jakamã nhũm mẽ axte myyti ho presija hkêt nē.

24 Koja krĩ nhõ xwÿnhjaja hirã mex pix kãm ri pa ho pa nē tãm ri amnhĩ nhĩpêx o ri pa. Tã koja mẽ ho amnhĩptàr xwÿnhjaja Tĩrtũm wÿr mra nē amnhĩ rom kãm mex o mex ã harê nē kãm:

— Na pre mẽ ixkwÿjaja mẽ ixpê mẽ ho amnhĩptàr xwÿnh ã axpên mã mẽ inhmex nē mẽ ixàhpumunh ã ri axpên mã mẽ ijarê. Nom mẽ ixrom amex o amex nē axàhpumunh o axàhpumunh. Jakamã ãm hãmri na htem amã amex o amex ã ajarê Tĩrtũm. Anê.

25 Nē krĩ hwÿr hakwakre koja amnhĩ kahê xà rênh rãhã kuhê nē aa amnhĩ kahê hkêt nē. Jar mẽ panhõ pika kamã na hte kamãt kaxyw nhũm htem amnhĩ tã hakwakre kahê hpa. No mo kaxyw koja mẽ axte pika

nywja kamã ã amnhĩ nhĩpêx anê? Koja kamàt kêt nê hirã rãhã ho rãhã jakamã nhũm mẽ amnhĩ tã kahê hkêt rãhã nê pa ho pa.

26Nê koja mẽ piitã Tĩrtũm wỳr mra nê kãm mex o mex ã harê nê kãm:

— Pa Tĩrtũm. Hêxta waa nê. Anhõ krĩja mex kumrêx. Mex o mex. Nê mẽ ixrom amex o amex nê axihtỳx o axihtỳx. Nê mẽ ixrom axàhpumunh o axàhpumunh. Âm hãmri na ka ra mẽ ixpê akrajê kamã apa ho apa Tĩrtũm. Anê.

27Nê koja mẽmoj punuj krĩja wỳr gjêx kêt kumrêx. Mẽ hpijaam kêt xwỳnhjaja nê ri mẽ hêx xwỳnhjaja hwỳr gjêx kêt nê. Âm mẽ pahte amnhĩ tomnuj pãnhã amnhĩrer xwỳnhhta nhõ kagà kamã Tĩrtũm ri mẽ htĩr tũm nê mẽ pa mã xwỳnhjê nhĩxi nhĩpêx xwỳnh pixjaja koja mẽ hwỳr agjê nê kamã pa ho pa.

22 1-2Tã pa pre axte mẽmoj pumu. Nhũm Tĩrtũm kapêr o wrỳk xwỳnhja axte inhmã mẽmoj jahkre. Nhũm Tĩrtũm mẽ kot mẽ pahpãnhã amnhĩrer xwỳnhja wa kot mẽ ho amnhĩptàr ã hkrĩ xà maati rũm pyhti hprõt. Krĩ kahti hkõt pry pohti nør xwỳnhhta kahti hkõt hprõt o nõ. Pyhti kamã gõja na htem ho ixkõ nê htĩr tũm nê pa ho pa. Gõ karỳyere. Nhũm mẽmo pĩ hpàr muxre xwỳnhja akutã hijê nê xa. Pĩ xõja na htem kuwõ nê htĩr tũm nê pa ho pa. Na hte apkati mẽ ô rãhã nê kuhê. Nê axtem hõja mẽ piitã mẽ mex nê à hkêt kaxyw na hõja.

3Amnepêr na pre Tĩrtũm Atãw mã kapêr nê kãm:

— Ate amnhĩ tomnuj mỳrapê kot paj tanhmã pika homnu hto nhũm apê mex kêt nê. Ka kamã apur nê kamã axàpênh rũnh o apa rãhã nê rĩ kormã kamã axàpkur o ri apa. Apê jamnuj tã kot kaj mẽ ã amnhĩ nhĩpêx anhỳr o apa rãhã ty. Anê.

Tã ra Tĩrtũm nhõ krĩ nyw kamã mẽ omnuj xàja amrakati kumrêx. Nê Tĩrtũm mẽ kot mẽ pahpãnhã amnhĩrer xwỳnhhta wa õ krĩ kamã pa ho pa jakamã mẽ pahte kamã mẽ papa xwỳnhjaja kot puj mẽ wa kãm tanhmã amnhĩ nhĩpêx to ho ri papa.

4Kot puj mẽ tã pano ho Tĩrtũm pumunh o papa. Hãmri nhũm te mẽ pahpiitã mẽ panhõkrã hã amnhĩ nhĩxi nhĩpêx pyræk o mẽ panhĩpêx.

5Nê kot puj mẽ Pahi Maati Tĩrtũm nhĩrã kamã ri papa nê axte myyti nhĩrã ho presija hkêt nê. Koja kamàt hapêx pa pu mẽ axte kanê ho presija hkêt nê. Nê Jejus nhĩhkõ hã hirã kamã mẽmoj to amnhĩptàr rãhã ho papa.

Jejus tokyx akupỳn wrỳk ã harênh

Apokarip 1.1-3

6Tã nhũm Tĩrtũm kapêr o mẽ wrỳk xwỳnh kot ixto mør xwỳnhhta axte inhmã kapêr nê inhmã:

— E nã âm hãmri na ixte amã mẽmoj piitã harênh xwỳnhja. Âm hãmri na. Jakamã kwa kêr ka arĩ hã ano htỳx rãhã ho apa. Amnepêr

Tirtũmja ỹ hã mẽ kapẽr o pa xwỳnhjẽ mã tanhmã kapẽr o amnhĩrit to. Kot tanhmã amnhĩ nhĩpêx to hkukamã mẽ kãm ho amnhĩrit nhũm prem kuma nẽ ô ri ma hkwyjẽ mã harẽnh o ri mẽ hkõt pa. Tã ra mẽ hpãnhã pa mẽ awỳr inhmẽ. Mẽ ate Tirtũm mã tanhmã amnhĩ to ho apa xwỳnhjẽ mã ixte ja jarẽnh kaxyw Pahihti Tirtũmja mẽ awỳr inhmẽ pa wrỳ. Nà koja mẽmoj tokyx ã amnhĩ nhĩpêx anẽ. 7Na pre Jejus mẽ amã amnhĩ jarẽnh o: “Kot paj tokyx akupỹm mẽ awỳr wrỳ. Tã mẽ ate ijarẽnh ã kagà kamã harẽnh nẽ mar nẽ amnhĩ kaxyw hkõt ajamaxpẽr nẽ hkõt amnhĩ nhĩpêx xwỳnhjaja kot kaj mẽ akĩnh nẽ ri apa.” Anhỹr o amnhĩ jarẽ. Anẽ.

8Nà ixpê Juãw na pa pre ã inhno ho mẽmoj pumunh anẽ. Hãmri nẽ omunh pa nẽ Tirtũm kapẽr o wrỳk xwỳnh kot inhmã harẽnh xwỳnhhta kutã ixkõn krã ho ixtẽm nẽ inhỹr kaxyw. Nom nhũm amnhĩ nẽ inhmã kapẽr kãm hihtỳx nẽ inhmã:

9—Kwa nà ri ã inhĩpêx anhỹr kêt nẽ. ãm Tirtũm pix kutã na pu htem ã amnhĩ nhĩpêx anẽ. Apyrà nẽ ixpê Jejus kwỳ kẽnã. Na pa hte apyrã nẽ ỹ hã tanhmã amnhĩ nhĩpêx to ho ixpa. Nẽ mẽ apyrã nẽ kapẽr ã kagà hkõt pix mã amnhĩ nhĩpêx. Na pu htem axpẽn kutã pahkõn krã ho parôrõk kêt nẽ. ãm Tirtũm pix kutã na pu htem ã amnhĩ nhĩpêx anẽ.

10—E ã ate mẽmoj pumunh nẽ mar anhỹr xwỳnhja koja tokyx ã amnhĩ nhĩpêx anẽ. Jakamã kwa kêt ka akwyjẽ pẽ ho apimxur kêt nẽ. Piitã hã kagà hpa kê mẽ kamã harẽ nẽ kuma nẽ mẽmoj kot ã amnhĩ nhĩpêx anhỹr mã xwỳnhhta piitã hkukamã harẽnh ma. Koja tokyx mẽmoj ã amnhĩ nhĩpêx anẽ.

11—Jakamã kwãr mẽ mãmrĩ piitã tanhmã kãm amnhĩ nhĩpêx to ho pa hprãm xà hkõt amnhĩ nhĩpêx o pa. Kwãr mẽ mẽ kot amnhĩ tomnuj xwỳnhjaja ã amnhĩ anhĩpêx anhỹr o pa. Nẽ kwãr mẽ kot tanhmã kapẽr punuj to xwỳnhjaja mãmrĩ ã amnhĩ nhĩpêx anhỹr o pa. Nẽ kwãr mẽ kot tãm amnhĩ nhĩpêx o ri mẽ pa xwỳnhjaja mãmrĩ Tirtũm kõt pix mã ri tãm amnhĩ nhĩpêx o pa. Anẽ.

Nhũm pre ã kaxkwa hwỳr ixto àpir xwỳnhhta inhmã kapẽr anẽ.

12Hãmri nhũm hpãnhã Jejus tãm inhmã kapẽr nẽ inhmã:

—E kot paj tokyx akupỹm mẽ awỳr wrỳ. Nẽ akupỹm pøj hãmri nẽ mẽ kot amnhĩ tomnuj o mẽ pa xwỳnhjaja pa ja mỳrapê ma mẽ kot amnhĩ xà htỳx kamã hamak tũm xàta wỳr mẽ rẽnh pa. No mẽ kot ixkõt amnhĩ nhĩpêx xwỳnhjaja kot paj akupỹn inhõ krĩ hwỳr amnhĩ kõt mẽ ho api.

13—Nẽ ixrãhãã xwỳnh na pa. Amnepê mã kormã mẽmoj kêt ri na pa pre ra ixrãhãã. Nẽ koja nhỹrmã mẽmoj piitã akupỹm hapêx pa arĩ ixrãhã nẽ ixpa ho ixpa.

14—Nẽ Tirtũm kot mẽ anê mẽ ate amnhĩ tomnuj kuhõnh par xwỳnhjaja kot kaj mẽ amex kumrẽx nẽ apa ho apa. Nẽ akĩnh nẽ ajamakêtkati nẽ ri atỳx apa ho apa. Te ho mẽ kot amnhĩ xẽ kahõnh nẽ mex jagjẽnh nẽ ri hã pata pyrãk. Koja Tirtũm mẽ amã anẽ ka mẽ

ajamakêtkati nê õ krĩ hwỳr agjê nê kamã ri amex kumrêx nê ri apa ho apa. Nê kamã mêmõ pĩ xõ mẽ kot kur nê htĩr tũm nê pa mã xwỳnhhta wỳr mra nê amnhĩm ô rê nê hkur o ri apa. Ra mẽ ate Jejus kôt amnhĩ xunhwỳr jakamã kot kaj mẽ axàmnhĩx hwỳr mra nê amnhĩm hkwy rê nê hkur o ri apa. Kot kaj mẽ ã amnhĩ nhĩpêx anê.

15—Nom mẽ kot amnhĩ tomnuj o mẽ pa xwỳnhjaja koja mẽ akĩnhã inhõ krĩ hwỳr gjêx kêt nê. Mẽ kot ri mẽ y ho mẽ pa xwỳnhjaja. Nê mẽ kot ri mẽ hpar o mẽ pa xwỳnhjaja. Nê mẽ kot ri sãnti nhĩpêx o te Tĩrtũm nhĩpêx pyrãk o mẽ pa xwỳnhjaja. Nê mẽ kãm ri hêx prãm o ri mẽ pa xwỳnhjaja. Koja mẽ akĩnhã inhõ krĩ hwỳr pa hkêt nê.

16—E Juãw. Nà ixpê Jejus na pa awỳr ixkapêr o mẽ wrỳk xwỳnhhta mẽ. Kot ixkwỳjê kaxyw amã ixkapêr jarênh kaxyw. Ixpê Tawi pàr krax na pa. Te ixpê arĩgro hkôt kanhêti hpôk rax kot arĩgro ho mõi ã ho amnhĩrĩt xwỳnhhta pyrãk. Anê.

Nhũm pre ã Jejus inhmã kapêr anê. 17Tĩrtũm Karõ mẽ Jejus kwỳjaja na htem ã Jejus kot amnhĩ jarênh anhỳrja ma nê hkĩnh nê. Nê kãm kapêr o:

—Hêxta waa nê. Kwa amnhĩm anojarêt nê tokyx akupỳn mẽ ixwỳr wrỳ Pahĩti. Pa mẽ tokyx ã amnhĩ nhĩpêx anhỳr o ri war akôt ixpa. Anê.

Nê mẽ ate ja mar xwỳnhjaja kêr ka mẽ urãk nê ã kãm akapêr anê.

Nê te mẽ amã kôr nê ri mẽ apa pyrãk xwỳnhjaja kêr ka mẽ te Jejus wỳr amrar nê õ gô ho akõm pyrã nê hkôt amnhĩ xunhwỳ. Te Jejus amarĩ mẽ pamã õ gô nhõi pyrãk o mẽ panhĩpêx pu mẽ hkôt amnhĩ xunhwỳ nê ra pahpê pahĩr tũm nê papa mã xwỳnh. Hãmri nê amnhĩ pãnhã tanhmã kãm amnhĩrer to hkêt nê.

Nhỹrmã mêmõj nyw par ã harênh jatúr xà

18E ixpê Juãw na pa Jejus nhỹ hã mẽ amã mêmõj tanhmã kot amnhĩ nhĩpêx to hkukamã ã mẽ amã hã kagã anê. Tã kwa mẽ o kora. Kêr ka mẽ atõ amnhĩ krã hkôt ri ajamaxpêr o te ho ja pyrã nê hijuk ri axte mêmõj nhĩpêx kêt nê. ãm kwarĩ ho kwarĩ. Kot ka mẽ atõ anê nhũm Tĩrtũm ja hã apumu nê kagãja kamã tanhmã mẽ hipêx kati hto xàta o tanhmã anhĩpêx to ka arĩ amnhĩ pumu.

19Rỳ ka mẽ atõ kagã kamã harê nê ama nê tanhmã ajamaxpêr to nê ajamaxpêr o:

—Nà ja kot anhỳr kêt. Na mẽ ãm harênh o hêx. Kot paj kuma nê ãm kuma.

Anhỹr o ajamaxpêr japêr. Hãmri nhũm Tĩrtũm amnhĩ tã ama nê kagã mexta kamã kot tanhmã mẽ ho mex toja o ato mex kêt nê. Ka õ krĩ hwỳr axàpir nê mêmõ pĩ xõ mẽ kot hkur nê htĩr tũm nê pa kaxyw mã xwỳnhhta ka amnhĩm hõ hyr nê hkrêr kêt nê. Jakamã e kwa mẽ o kora. Kêr ka mẽ



kagàta kamã ã mëmoj kot amnhĩ nhĩpêx anhÿr mã xwÿnhhta jarênh ma nê aprĩ hã piitã hkôt ajamaxpêr tÿx rãhã ho ri apa.

20E Jejus kot inhmã mëmoj kukamã tanhmã ujarênh to xwÿnhhta na pre inhmã amnhĩ jarênh o: “Kot paj tokyx akupÿn mẽ awÿr wrÿ.” Anê. ãm hãmri na pre ã amnhĩ jarênh anê. Kojã tokyx akupÿn mẽ pahwÿr wrÿ hãmri nhúm mëmoj piitã mex o mex.

Jakamã kwa kêr ka amnhĩm anojarêr nê tokyx akupÿn mẽ ixwÿr wrÿ Pahihti Jejus.

21Nê ixpyrà nê mẽ apê Tirtũm krajaja na pa hte mẽ ato Pahihti Jejus wÿr rãhã ho ri ixpa nê kãm:

—Kwa akwÿjê pumu nê mẽ kutã anojarêr rãhã ho ri apa Pahihti. Anê.

E mẽ ujarênhja na hapêx. Ixpê Juãw na pa Jejus kot inhmã tanhmã ujarênh toja pa amnhĩ xô ri mẽ amã hã kagà hpa. E na hapêx.